

THE HISTORY OF THE CITY OF BOSTON

FROM THE FIRST SETTLEMENT TO THE PRESENT TIME
BY
JOHN B. HENNING

VOLUME I
FROM THE FIRST SETTLEMENT TO 1780

BOSTON
PUBLISHED BY
LITTLE, BROWN, AND COMPANY

1890

NEW YORK
LITTLE, BROWN, AND COMPANY

1890

PHILADELPHIA
LITTLE, BROWN, AND COMPANY

1890

CHICAGO
LITTLE, BROWN, AND COMPANY

1890

ST. LOUIS
LITTLE, BROWN, AND COMPANY

1890

INDIANAPOLIS
LITTLE, BROWN, AND COMPANY

1890

欽定平定陝甘新疆回匪方略卷一百二十二乙丑年

十一月二十八日己丑訥爾濟奏言據勇目張和

稟稱前奇台知縣恆頤派帶戶勇由木壘西剿節節獲勝將賊追至阜康迤西卽就彼處駐紮九月初六七等日賊匪撲營戶勇與賊接仗中計潰敗衆勇紛紛逃散恆頤不知下落奇古一帶復失現在戶民男女約有萬餘均在鄂隆吉

溝躲避挑選壯勇可得二千名賊匪現踞木壘
等語 臣查前任奇台縣知縣恆頤帶勇數千先
得木壘卽當隨得隨守乃該革員進至濟木薩
駐紮以致得而復失事機至爲可惜 臣觀勇目
張和狀貌魁梧情殷報效擬賞給五品頂戴令
其帶勇西征添派巴里坤已革防禦惠琳督同
張和並戶勇二千餘名趕赴木壘一帶相機堵

勦此次應需軍械口糧等項皆係張和與衆勇
目自行籌備至於哈密賊匪盤踞該城交界之
柵門口所有偵探官兵不能前進臣仍當督飭
弁兵巡防要隘以杜窺伺惟兵力過單祇能固
守待援刻下大兵尙無信息合無再懇

天恩飭下成祿等趕緊出關西勦以解倒懸奏入

上命軍機大臣傳諭楊岳斌成祿聯捷訥爾濟曰奇台

濟木薩城垣前月甫據該大臣等奏報收復此次官兵復行失利賊勢又復猖獗請爾濟摺中並有奇古一帶復失恆頤不守木壘輕進濟木薩以致得而復失之語是否該二城又經失陷聲敘殊未明晰關外兵勇全不可恃成祿聯捷之軍屢經申飭仍在甘境逗留實屬疲玩已極著楊岳斌傳諭該提督等迅卽整隊出關會同訥爾濟等籌商進剿總期得步進步

爲節節進取之計儻再遷延國法具在不能爲成祿
等稍貸也訥爾濟現派已革防禦惠琳與勇目張和
會帶戶勇二千前赴木壘進剿此等民勇雖不可恃
然藉以牽掣賊蹤亦未始非計著訥爾濟激勵該民
勇等力籌堵禦毋任賊氛日肆蔓延其勇目張和一
名卽准由該大臣賞給五品頂戴以資統帶哈密賊
匪雖無西犯情形訥爾濟等仍當嚴爲備禦毋任疏

虞

十二月初二日癸巳趙長齡奏言臣在華陰途次

接奉

諭旨飭查楊能格叅奏參將周顯承各節遵卽馳回西
安省城一面飛咨雷正綰將周顯承在涇所招
潰勇妥爲撫馭統率前進另揀妥員接辦營務
並咨楊岳斌卽飭周顯承孟樹森林發深趕緊

前來聽候查辦此案頭緒紛繁情節重大必須
逐細確查且聞周顯承現擁重兵與雷正綰互
爭曲直辦理稍涉張皇難保不別生枝節臣現

擬馳赴慶涇附近一帶督飭幹員分途前往明

查暗訪務得實情秉公審辦斷不敢稍涉偏徇

同日楊能格奏言臣自奏叅甯陝營參將周顯

承後連日據甯州知州張掄文先後稟稱十一

月十一日周顯承親帶三營馬隊至甯州擅自
入城兵勇分駐民家銀錢衣物概被搶掠焚燬
淫擄無所不至當有增生栗承祚上前攔阻被
洋槍擊斃並將酒頭堡及太昌城外百姓搶掠
一空遊擊張潤槐指稱太昌王姓爲富不仁該
參將卽令兵丁將其衣物銀錢糧食搜掠並責
打馬棒該州向周顯承哀懇撤兵許將抗糧百

姓提案解涼究辦一面會同委員趕緊將四鄉
兵糧陸續運送周顯承堅不允從十三日周顯
承自帶親兵數十名前往棗社鎮張潤槐率領
兵勇行抵店頭堡居民閉門不納周顯承委員
裴輔晉在彼辦糧開門放入百姓跳城逃走撲
跌溝下死傷甚多十四日兵勇四出擦掠附近
店頭堡之良平鎮各村莊恣意淫擄十五日聞

提臣雷正綰已到涇州周顯承恐奪伊兵權始帶親兵乘夜回涇仍留二營分紮南北鄉肆行搜掠該州兩年以來共運過市斗小麥八千餘石每石民捐運腳錢二千文送至涇州共捐運腳錢一萬六千餘串運過白麩三萬九千餘斤又解過捐輸銀一萬八千餘兩未運兵糧尙有三千餘石張潤槐裴輔晉探知店頭堡客貨甚

多垂涎已久周顯承遂以辦糧爲名親督三營
前來揆搶因係官兵民人不敢抵禦懇請設法
退兵等情臣不意該參將慘毒成至於此極
一面飭委署慶陽府葆鏞馳赴甯州督同張綸
文驗收受傷屍身查明被難各堡妥爲撫諭相
應請

旨將陝西甯陝營參將周顯承革職拏問嚴行懲辦並

請

飭下雷正綰迅速另簡妥員接辦營務仍將同惡相濟
之儘先遊擊張潤槐把總裴輔晉一併革職審
辦以昭炯戒

楊能格又奏言四川河南解存陝西藩庫協餉
銀三萬兩經臣札委候補知縣吳功全迎提行
抵長武縣正在護解前進突有周顯承差弁王

新元帶領弁兵六七十名到彼截留吳功全與
陝縣知縣張景福將銀寄庫堅不允從王新元
令馬隊環立城外日夜在城門把守聲言餉鞘
出城卽行搶回涇州周顯承復派記名總兵劉
正高帶勇催提該印委等仍未允行周顯承親
帶馬隊至縣自行進庫喝令弁勇擡取餉鞘全
數裝運赴涇吳功全不得已亦卽隨往涇州據

該印委先後稟報前來 臣查外省協餉解到寥寥全在酌盈劑虛勻撥散放今周顯承輒敢帶隊威逼擅自入庫搶取行同寇盜若各營紛紛效尤尙復成何事體理合據實奏參

同日楊岳斌奏言前聞提督周顯承譚玉龍收撫潰勇十餘營恐事權太分軍心無所繫屬曾經檄委該提督等分統各營專辦東路防剿嗣

後陸續報撫共得馬步二十營兩次攔截竄回
均獲勝仗軍威復振沈大興現紮平涼雷正綰
親隨隊伍不過雷恆馬隊二營李高啟步隊四
營耳茲據遊擊秦國勝自涇回省面稱周顯承
等奉雷正綰行知調派分紮鎮原平涼一帶伊
等以涇州爲陝西門戶恐一旦空虛致爲回逆
所乘未敢妄動雷正綰責以不遵調遣伊等以

固原本爲回踞雷恆雖已入城順逆尙不可知
雷正綰駐紮平涼與逆蹤若卽若離難分阜白
進止無所適從故派該遊擊來蘭請示 臣查雷
正綰部下精兵健卒均經涇州收集若使軍械
足用卽可責其立功惟與雷正綰互有猜疑暫
難合併若迫使聽雷正綰調遣軍心惶惑譁潰
堪虞自應另樹一幟扼守涇州藉通東道惟須

得力大員統率則號令歸一臣相距太遠未能
東向魏添應資望素淺難資約束聞陝西巡撫
趙長齡業已抵省劉蓉計已解任尙未回籍合
無仰懇

天恩飭下劉蓉親統一軍駐紮長武等處令周顯承譚
玉龍等悉歸節制所需糧餉軍火卽

飭劉蓉在陝籌辦涇州軍情亦由劉蓉隨時奏報以免

遲誤

楊岳斌又奏言疊據提督周顯承等稟報雷營
潰勇現已就撫回逆亦未竄入陝疆是東路軍
情比前較鬆臣已派李助發帶兵前往靜隆會
同涇州各營相機勦辦兵力較厚至曹克忠現
紮鞏昌雖城圍已解而附近餘寇尙須搜勦甯
遠遊匪亦未肅清且該逆尙有邀同河狄及撒

拉回匪前來報復之語亦不可不嚴爲之防 臣
體察南路情形曹克忠一軍一時尙未能調赴
東路

楊岳斌又奏言 臣查哈密失守驛路不通甘涼
肅一帶節節阻滯戶部准撥巴里坤之餉亦未
解到應請

旨飭令殺虎口監督先行撥解以應急需

楊岳斌又奏言欽奉

諭旨飭催應行補製軍械等件迅解伊犁 臣查甘省兵
燹連年物價昂貴雖經設局採買製造各營請
領往往不敷尙須仰給外省伊犁地處極邊程
途遙遠運費不貲現在西路一帶驛道梗阻礙
難轉運請俟逆氛掃平驛路通暢再行補製解
往

楊岳斌又奏言據藩司林之望詳稱各省協餉
不到滿緣各營窘迫固不待言而在甘剿賊兵
勇餉既不敷糧又缺乏皆有思歸之念查山陝
兩省所欠協餉甚多此時斷難責以全解上年
陝回初靖叛產甚多在廷 臣 奏奉

諭旨興辦屯田寓兵於農誠爲良策顧屯田所以養兵
而收效較緩若將此項叛產變賣令山陝商民

承領管業較之捐輸必更樂從於軍餉尤有裨
益至甘省秦州亦經平定叛產均可變價以應
急需臣查該藩司所籌不爲無見擬咨商陝西
撫臣酌量辦理並飭藩司選派委員前往秦州
先行清查俟奉

旨後再行變賣充餉均奏入

上命軍機大臣傳諭楊岳斌趙長齡劉蓉雷正綰楊能

格曰前因楊能格奏叅周顯承狡詐把持侵蝕帑項帶隊勒捐等情當經諭令趙長齡先赴慶涇一帶查辦如訊有端倪卽將周顯承奏請革職嚴審茲據楊能格奏周顯承親帶三營馬隊至甯州親兵各入民家搶掠淫擄無所不至槍斃增生粟承祚復分隊駐酒頭堡及太昌城外將兩處百姓搶掠一空令遊擊張潤槐往東鄉良平鎮店頭堡堡民閉門不納委員

裴輔晉啟門放入百姓逃避死傷無數聞雷正縮到
涇周顯承始行折回仍留二營分紮南北鄉又將河
南解存協餉銀三萬兩帶隊劫去似此喪心病狂倚
勢虐民大爲地方之害若不嚴行懲辦何以肅軍律
而警效尤周顯承著卽行革職交趙長齡拏問其同
惡相齊之遊擊張潤槐把總裴輔晉均著革職一併
歸案審辦趙長齡現由西安赴慶涇一帶著卽將周

顯承等提解秉公逐款審辦毋稍寬縱周顯承如有不服拘拏情事或至激成禍變著楊岳斌雷正綰楊能格派兵嚴密防範雷正綰現已到涇著將周顯承招集之潰勇並所帶各營妥爲撫馭統帶相機進剿其留甯州之二營著卽撤回毋任別滋事端正在寄諭閒據楊岳斌奏請派劉蓉節制涇州各營駐紮長武等處一摺劉蓉現已仍署陝西巡撫豈能由省遠

駐長武周顯承所招潰勇本係雷正綰舊部仍歸雷
正綰統帶自無兵將不協之慮雷正綰受朝廷倚任
之重務當振刷精神力圖報稱固原平涼涇州等處
均須兼顧若有疏失惟雷正綰是問楊岳斌另片奏
曹克忠一軍未能調赴東路伊犁軍械請俟驛路通
暢再行補製解往各等語均著照該督所請辦理又
片奏請將甘省秦州一帶叛產變賣充餉著卽督飭

藩司遴派公正員弁認真經理期於兵民兩有裨益
毋任吏胥舞弊其陝西各處叛產如何辦理之處著
劉蓉迅速妥籌具奏至所謂飭令殺虎口監督先行
撥解巴里坤餉銀一片已傳諭王榕吉照辦矣

上又命軍機大臣密諭趙長齡曰本日據楊能格奏周
顯承切餉擾民各節業經有旨將周顯承革職拏問
諭令該撫秉公查辦正在寄諭閒復據楊岳斌奏雷

正綰部下精兵健卒均經涇州收集若使軍械足用
卽可責其立功惟與雷正綰互有猜疑暫難合併若
迫使聽雷正綰調遣軍心惶惑譁潰堪虞等語與楊
能格所奏詞多歧異楊能格所叅周顯承各節如果
屬實必須秉公執法嚴懲雷正綰業已回駐涇州該
提督舊部能否恪遵調度抑或軍心渙散雷正綰竟
難挽回趙長齡現赴涇州著卽將雷正綰軍營近日

情形嚴密訪查據實具奏如雷正綰挾回自重該將
領等無所適從則涇州各營自應另行派員統帶曹
克忠威望頗著如能接統其衆卽著知照楊岳斌一
面奏聞一面調派如曹克忠不克赴涇楊岳斌卽當
另派委員前往接替毋誤事機該撫於此事務當妥
慎辦理不可稍涉偏執以顧大局

上又命軍機大臣傳諭王榕吉曰巴城需餉孔殷亟須

設法籌撥惟關內外道途阻滯自應改道妥解以昭
慎重卽著王榕吉將殺虎口監督應解巴里坤餉銀
派委委員由草地一路解至烏里雅蘇台轉運以濟
要需毋稍延緩

初四日 乙未 楊岳斌奏言欽奉

諭旨查辦聯捷被叅各款伏查聯捷抵陝與 臣 同處一
城已逾而月所叅在陝拜客乘坐八人大轎 臣

實未見亦未聞在行營日與新放各路大臣開筵痛飲劉蓉所叅勒折酒席錢文一節咸長二縣因係歷來兵差所無未經應允至臨行需索車輛等事臣時拔營在途無從深悉惟查該大臣行抵甘境後逗留騷擾情事尙多七月間據代理會甯縣事典史姚振湘稟稱六月十五日該大臣馬隊進城立索鋪墊席桌挂發銀兩不

住店寓自占文武各廟數日後聯捷方到所帶
步隊及隨營各員復擇縣署暨火神各廟駐紮
遷延不行日索木柴油燭碗碟等件並將文廟
中門窗什物及導經閣書籍祭器大成殿後欄
杆以及縣署門窗煖閣地板桌檯任意燒燬兵
勇日將牲畜牧放民田秋禾悉遭殘害而以領
去草料變價入己瀕行復聲言馬匹缺少種種

刁難不勝枚舉駐紮將及一月被控不止一案
民間有畏兵如賊之謠復據涇州知州林發深
來稟聯營此次兵差除折車價不計外共用牛
馬車一百二十六輛驢馬羸六十五頭均由涇
州里下攤派計期已逾兩月並無一車一羸回
涇該營起程後車羸各夫遞呈者五十餘紙往
來差弁僉稱該兵等將車牛任意宰殺自行變

價車輛則劈作柴薪陝西咸甯縣托克紳長安
縣馬綸篤供應無誤橫被叅劾相率具稟前來
臣以該二縣之事應歸陝西巡撫辦理其會甯
所稟各情派員前往密查事皆不虛涇州所稟
當卽照咨該大臣查辦旋准該大臣極力駁辯
先是聯捷行抵會甯曹克忠新經挫敗稟請臣
移咨該大臣就近往紮半角城暫資鎮撫臣以

該大臣係奉

命出關之員未敢擅留當將來函鈔寄商令酌辦聯捷
卽借此折赴蕭河城不分良莠出示招降砌詞
延宕臣屢因

諭旨嚴切促令起行現在退紮靜甯尙無起程之信仍
應請

旨嚴催該大臣並成祿迅速出關以重軍務

楊岳斌又奏言疊據曹克忠函稟謂聯捷招撫
之回有爲雷正綰所已撫者有爲曹克忠所欲
誘降而因以圖之者該大臣不查虛實不辨良
莠率然收撫殊屬非計臣查撫之一字施諸良
回則可施諸叛回則不可施諸甘省與陝省互
相勾結之叛回則尤不可蓋良回每顧身家稍
假詞色卽亦帖然若叛回則顧家之念不勝其

喜亂之心且叛而僅在甘回或者懾於兵威猶
冀一朝悔悟所最難者勾結之陝回耳思陝則
故土難歸在甘則託足無所於此而謀招撫則
必有地以安之有食以養之否則雖撫與不撫
等耳聯捷之撫馬化澂始則欺都興阿繼則欺
曹克忠近且附三壽而欲以欺臣聯捷亦明知
無裨實事不過藉事敷衍冀緩西行相應請

旨飭下該大臣星速出關毋許逗留抑臣更有請者該

大臣若知主撫之議被臣奏叅必且播造謠言

謂臣不分良莠必殺盡回民乃止此言一出恐

良回亦聞而蠢動關係非輕臣章應請暫勿宣

露庶勦撫事宜臣可從容布置

楊岳斌又奏言據甘涼道黎獻稟稱十月閒肅
城兵潰退紮金塔請催成祿鶴齡二軍迅速西

行等因 臣查成祿一軍已到涼州因有賊匪撲
城正在撥兵勦辦鶴齡一軍因平涼劫去餉銀
無食無衣瑟縮如丐暫寄食於平番之連城堵
禦米拉溝回匪該營本皆川兵不耐關外寒苦
日前屢有逃亡若再迫之使西竊恐潰散必盡
至於聯捷一軍現尙逗留靜甯州騷擾地方耽
延時日爲今日計與其嚴加策遣不如量爲變

通因思提督雷正綰徘徊於平固兩地李高啟
雷恆踰伏於固原州城部曲離心逆回逼處若
非遷地爲良斷難及時自效合無仰懇

天恩飭令該提督率領雷恆李高啟剋日西行會同成
祿出關勦賊自效如能收之桑榆在該提督固
可重承

恩眷雷恆李高啟亦藉免愆尤聯捷不念時艱不恤民

隱應請撤其管帶

飭令該部營官各帶馬步隊伍星赴成祿軍營聽候調遣其鶴齡一軍暫請留於關內歸臣節制以待川餉雷聯二軍俱有降回應令各安本業免其隨營至於聯捷本有應得之咎應如何處置俾不能脫身事外之處出自

聖裁奏入

上命軍機大臣傳諭都與阿穆圖善楊岳斌成祿曰哈
密辦事大臣聯捷奉命出關勦賊沿途騷擾逗留不
前實屬可惡第立予罷斥該員轉得置身事外本日
已明降諭旨將聯捷降爲藍翎侍衛毋庸幫辦成祿
軍務以示懲警矣著楊岳斌傳知聯捷迅赴成祿軍
營聽候調遣其所帶馬步各隊均著交成祿節制儻
聯捷仍敢任意遷延託故不進卽著按照軍法從事

至西路軍情正當告急成祿總未帶兵出關亦屬懈弛著懷遵疊次諭旨剋日西行如有意遲延則聯捷覆轍具在必當一併執法嚴懲不能稍從寬貸也聯捷前次奏稱在好水川一帶招撫四十四村回戶匪首馬化澂亦來乞降等語朝廷慮其爲該逆所給會令楊岳斌斟酌妥辦現在聯捷已令西行自不敢藉詞撫回再稽進發所有一切勦撫事宜著責成楊岳

斌妥爲籌畫務當分別良莠相機而行不得稍有貽
誤都興阿等前因聯捷專差佐領德清額持函議撫
情節可疑會將該佐領摘頂拘留現在聯捷咨覆已
否到甯並著都興阿穆圖善詳察情形與楊岳斌妥
商辦理勿墮回匪狡計至雷正綰一軍疊次諭令收
合潰卒重整軍聲力圖勦賊此時若令統兵出關則
朝令夕改非特無所適從且恐滋其疑惑殊爲非計

楊岳斌所請量爲通變之處著毋庸議鶴齡一軍缺
餉軍士困苦顛連甚爲可憫著楊岳斌寬籌餉項源
源接濟催令隨同成祿出關毋任逗留其成祿等軍
並著楊岳斌設法濟餉俾資飽騰不得稍有缺乏致
令有所藉口

欽定平定陝甘新疆回匪方略卷一百二十三 乙丑年

十二月初八日 己亥 楊岳斌奏言據署甘涼道黎

獻稟稱十月初八日南山一帶有西甯大通賊

匪竄擾當派遊擊楊天興帶隊堵禦賊由山邊

潛入肅城十一日夜繞襲我軍後路羅鑑督隊

力拒適值火藥延燒當率親兵救護賊亦退去

十四日楊天興帶兵馳回賊出千餘騎要截我

軍失利十六日臨水後路糧臺又被米拉溝竄
匪攻破軍心不固因卽潰散現存兵二千移紮
金塔寺請催成祿等軍西行等語 臣聞之不勝
焦灼因在水準河抽出兩營交總兵王仁和管
帶前赴平番相機進剿提 臣成祿前已派總兵
趙德正統率兩營赴援大靖查大靖與平番相
近鶴齡一軍現在平番之連城 臣仍咨會成祿

鶴齡兩軍乘勢夾擊勿使西竄黎軍自潰散後
合之張大倫王斌等軍二千餘衆猶可再振 臣
現飭黎獻收復潰卒會合各軍協勦惟此次援
賊屬至雖由藥盡糧絕以致潰退而該道旣不
能豫防於前復不克堅持於後咎實難辭相應
請

旨將署甘涼道黎獻先行摘去翎頂以示薄懲

同日成祿奏言刻因黎獻一軍失利請援又聞
鎖罕頭大股賊匪欲撲涼郡分擾省垣臣以平

番雖蘭省咽喉而涼州為出關後路未敢顧此

失彼當經飛咨督臣撥營防守平邑仍飭鶴齡

暫紮連城靜候更替臣親率全軍星夜進發比

我軍抵涼而大靖土門賊圍正急當飭趙德正

管帶親舊二營先往赴援行至離城七十里之

李家東莊地方安營甫定賊匪大至四面圍攻
臣聞報後督率馬天祥等各營連夜進援次日
距趙德正之營十餘里挖壕築壘賊知大兵繼
至夤夜分股來撲我軍固守營柵約計馬賊數
千步賊萬餘更有大車數百運載輜重裝曳柴
草填塞道路密布二十餘里將後隊數營層層
圍困我軍併力衝突一可當百賊衆晝夜環攻

被圍五日糧路斷絕掘取草根野芋充飢臣重
加激勵各營將士奮勇齊出立潰重圍賊勢不
支敗退三十餘里我軍一面窮追一面拔營進
紮與趙德正之營聲勢聯絡臣恐衆寡不敵飛
檄涼州綠營官兵百名添助親兵又調滿營壯
丁三百列成後隊遙爲聲援至十五日黎明賊
果擁衆前來臣豫飭各營無與接仗待其氣衰

然後奮擊賊衆紛紛亂竄自相踐踏我軍乘勢
攻撲奪獲擡槍十餘桿戰馬數十匹器械旗幟
無算十六十七等日賊匪逐日挑戰我軍奮力
接仗復多斬擒賊自西竄以來初受鉅創遂於
十八日夜半潛行遠遁我軍馬隊過少未能窮
追是役統計斃賊不下二千餘名市旬之間疊
獲全勝合無仰懇

天恩俯准 臣彙案保奏以示鼓勵所有尤爲出力之總

兵銜儘先副將趙德正等先行開列請

旨從優獎勵陣亡都司徐安邦等並請從優

賜卹至陣亡弁兵趙鴻升等三十五名由 臣造冊報部

彙請優卹日來大靖又復被圍請援甚急 臣因

鶴齡一軍尙紮連城飭令就近赴援並飛咨督

臣撥營往助緣 臣所部過單勢難兼顧且准黎

獻呈稱退駐金塔各營潰散遂飭馬天祥等管帶新舊四營復派已革河南知縣竇型督率新募一營剋期進發先保甘州高臺等處並收合黎獻散卒俟臣後軍繼進大舉恢復刻下賊勢猖獗馬賊尤多臣前派遊擊丁文學等星夜回豫招募數營咨由山西司庫撥發銀三千兩以備長途口食臣馬隊不過百騎前以都興阿馬

軍甚夥奏請分撥數起實於彼軍毫無所損而
於臣營大有裨益仍祈

飭下都興阿酌撥馬隊一二起迅由草地馳赴臣軍聽

候調遣至臣軍營日食麩斤暫資民力敷衍所

需月餉全無著落昨准四川督臣駱秉章咨稱

解銀二萬兩轉運秦州又准陝西撫臣劉蓉咨

覆每月籌撥數千無法設措等情是臣軍餉既

覺虛懸而甘州以西蓋藏早盡更虞枵腹惟有
籲懇

天恩嚴諭各省大吏設法協濟徑解山西由草地解赴

臣營庶足以資飽騰而免譁潰

成祿又奏言據永昌協穆克登布等稟報南山
踞逆於十月二十六日直撲新城堡水泉等處
經該營都司永恰布及該縣知縣阿爾薩蘭督

率官兵民團獵勇前往堵剿行至距城二十里
與賊接仗因衆寡不敵立時潰敗把總秦殿試
陣亡永恰布尙無下落該縣潰圍馳回料理城
守請援前來臣現飭馬天祥等星速赴援并飭
寶型先行馳赴永昌保固城防再當整隊前進
逐節勦辦

成祿又奏言鶴齡川兵前在平番因川餉不至

相率潛逃經臣痛加懲辦始漸歸伍昨令暫紮
連城現復遣援大靖屢據鶴齡代衆乞憐不欲
西進且川餉欠缺誠堪憫惻臣若強爲調取將
士思歸深恐難期得力此項川兵應否遣撤之
處伏候

聖裁

成祿又奏言臣軍次涼州適鎮迪道文麟入關

來營接見據稱奇台失後退保巴里坤彈丸孤
城人心潰散斷難固守今繞道入關冀請援師
幸遇大兵情願軍前效力等語臣察其情詞懇
切決非取巧規避且昨准督臣來咨業經奏請
將該員留臣軍營自應遵照伏查臣軍糧臺需
員辦理文麟人極老成操守尙好前署藩司於
各屬錢糧虛實素所周知自可設法抽撥且監

司大員呼應較靈合無仰懇

天恩於甘肅藩臬中

欽派一人總理糧餉事務並請

特派文麟督辦臣行營糧臺將來大舉出關即可設局

轉運以專責成

成祿又奏言據涇州知州林發深稟報陝省批
解火藥行抵平涼地方被潰勇搶劫又據山西

軍需局呈稱遵解火藥鉛丸於八月杪起程迄
今未見到營是東路梗塞已可概見合無仰懇

天恩傳諭山西撫

臣

嗣後凡遇各省運解軍火協濟餉

項改由山西出口行走草地徑送 臣營以昭慎

重而免阻滯

同日聯捷奏言疊據甘肅回日穆生花陝西回
日孫義章分遣回民馬翼如等來營求撫經 臣

再三面詢僉稱回民起釁非敢別有異謀實由漢人逼迫官吏偏袒是以鋌而走險今得跪聆聖諭只分良莠不分漢回仰見

聖德如天不肯滅絕回教情願悔罪投誠只求貸其一死使甘回得以復業陝回得以還鄉但回民有新教老教之分東也西也之別人數衆多現散處於鞏昌狄道河州洮州岷州平番肅州靖遠

甘州等處情願分投勸令一律歸正如有不遵
擬卽自行翦除只求將此次稟帖代爲具奏俾
下情得以

上達等語事關重大不敢壅於

上聞謹鈔錄該回目等疊次來稟封送軍機處備查

聯捷又奏言前據靈州回目馬朝清遞稟投誠
昨復呈請繳械經 臣差人前往甯靈兩城查看

城內衙署民房均尙完好回漢民人亦俱安堵
甯夏回民現具請撫稟帖復派回日吳鳳儀等
親來臣營懇請收撫臣諭令暫回靈州聽候據
情代奏謹將馬朝清並甯夏回民來稟一併鈔
錄封送軍機處備查

聯捷又奏言據管帶馬隊營總博多洪武管帶
步隊連九皋等稟稱甘肅兵燹連年商販絕跡

糧草昂貴該馬兵應領鹽折馬乾以甘省市價計之日僅得錢二百餘文卽按月發給亦不敷一人一騎之用乃積欠至三月有餘人食麩糠馬齧枯草且天氣嚴寒體無完衣數月以來兵丁病故不少馬匹倒斃亦多若各省協餉再事遲延萬難支持請飛催協餉等語 臣前因月餉不繼已將新收海字二營勇丁遣散一半查北

路賊衆不下七八萬臣以飢軍千餘人維繫其
閒幸回衆紛紛來營請撫兩月以來尙無挫失
合無仰懇

天恩飭令山西巡撫將欠解臣營月餉迅速批解以濟
要需均奏入

上命軍機大臣傳諭都興阿穆圖善楊岳斌成祿曰黎
獻一軍向尙得力此次進勦肅州逆匪因火藥失火

延燒後路糧臺又被匪攻破軍心不固旋卽潰散該
道員督率無方著先行摘去翎頂以示薄懲現在官
兵新挫逆燄愈張該營存兵僅止二千餘名難成勁
旅著楊岳斌一面責成黎獻收撫潰卒會合各軍協
力堵剿重振軍威一面卽飭總兵王仁和管帶之軍
迅速由平番一路節節進剿以爲西軍後路聲援此
時河西三郡賊勢日益蔓延若不早籌埽蕩恐與關

外之賊連成一氣收拾更難楊岳斌務當統籌全局
選派得力將弁添調勁兵實力進剿無誤事機成祿
一軍疊次剿賊不無微勞出力陣亡各員本日業經
明降諭旨分別獎卹矣該提督現在已抵涼州著卽
督率所部迅速西行儻再藉詞逗留定行從重治罪
聯捷所部各營前已有旨併歸成祿統帶著卽催令
前進毋任遷延鶴齡一軍前經楊岳斌奏請留於甘

肅未經允准著楊岳斌仍遵前旨嚴催鶴齡一軍隨同成祿星速啟行所有成祿等軍餉需除已飭四川山西籌解外楊岳斌亦當設法源源撥濟俾利遄行毋令該軍士等有所藉口南山賊匪竄逼永昌成祿已飭馬天祥等軍拔隊赴援並著楊岳斌分兵兼顧毋使滋蔓隆調鎮迪道文麟前已令其隨同成祿出關茲據成祿奏稱請於甘肅藩臬中派一人總理該

提督糧餉事務並令文麟督辦行營糧臺設局轉運
等語著楊岳斌酌量辦理甯靈攻剿亦甚緊要成祿
所請飭都興阿派撥馬隊之處著毋庸議至聯捷所
稱甘肅回目穆生花陝西回目孫義章率領各路回
目遞稟投誠並甯靈兩城回民稟請求撫由聯捷將
各回首稟詞鈔錄進呈著都興阿穆圖善楊岳斌斟
酌情形辦理此等回衆如係甘心倡逆或曾經踞城

三才圖會卷一百三十三
三
戕官焚掠殘殺及屢經投誠反覆難信者罪在不赦
斷不可輕行議撫致貽後日無窮之患若其中果有
畏禍被脅出於勢不得已者自應准其投誠以示區
別總須詳加察看分別良莠不可豫存成見

上又命軍機大臣傳諭王榕吉日成祿一軍現由涼州
進紮肅州餉項旣虞支絀運道尤恐阻滯設因軍食
不繼致令軍士枵腹荷戈何以收飽騰之效著王榕

吉將應解成祿之餉查明數目按期報解卽由草地
迅速解赴成祿軍營以免阻隔聯捷現已降爲藍翎
侍衛歸成祿調遣並所部兵勇均歸成祿統帶所有
山西應解聯捷之餉卽著統交成祿支放其各省應
解聯捷成祿兩軍餉銀由山西經過者俟行抵該省
時卽由該護撫傳知各省委員改由草地趕緊解赴
成祿軍營毋稍濡滯山西所解火藥鉛丸等項於八

月杪起程迄今尙未到營是東路梗阻勢難繞越著
王榕吉嗣後將應解成祿軍火等項併各省應解軍
火概由草地徑解成祿軍營俾免耽延而資利用

上諭內閣曰甘肅逆回分股赴犯涼州經成祿派兵迎
勦槍礮齊施殺斃賊匪二千餘名奪獲軍械無算勦
辦尙爲得手在事將弁均屬著有微勞自應量予鼓
勵副將趙德正著交軍機處記名遇有總兵缺出請

旨簡放馬天祥著賞加總兵銜並賞給壯勇巴圖魯
名號楊廣德著以總兵用參領明春著以副都統用
都司張起龍趙德魁均著以遊擊儘先補用並賞加
參將銜軍功王蘭譜石成器均著以千總儘先補用
並賞換花翎都司謝長春著以遊擊儘先補用並賞
換花翎其陣亡之都司徐安邦著照遊擊例從優議
卹守備周定邦著照都司例從優議卹以慰忠魂

楊岳斌又奏言 臣於十月間接准署川督 臣崇

實來咨以川省防務未清釐金減色撥款繁多
未能按成撥解擬將先後奉撥慶陽新疆及 臣

營餉銀一併覈計除鶴齡一軍每年共需銀十

萬兩仍由川省籌解外再於鹽貨釐金項下按

月籌銀一萬兩自九月初一日起解交陝西藩

庫由 臣統籌緩急量爲分撥等因 臣查川省應

解甘肅新疆等處餉項合計每月約在二十萬兩以內現在該省防務未清釐金減色若將疊次准撥之款全數籌解固屬力有未逮第每月籌銀一萬兩則較准撥之數不及十分之一而以一萬兩之餉徧給各軍杯水車薪何濟於事

臣體察川省情形量爲酌減除鶴齡軍餉仍由川省籌辦外每月籌銀三萬兩協濟甘省由

臣

分撥諸軍在川省易於籌措而甘省亦得稍資
轉輸合無仰懇

天恩飭下署四川總督崇實按照臣酌定數目每月籌

撥甘省銀三萬兩解交秦州由臣統籌慶陽新

疆等處情形酌量分撥應用經此次酌定之後
務須源源接濟毋得再有減少致誤要需奏入

上命軍機大臣傳諭崇實駱秉章曰川省應撥甘肅新

疆等處月餉合計不下二十萬兩爲數甚鉅該省現
在防務未清釐金減色若令將疊次准撥之款全數
籌解固屬力所不能而甘肅新疆等處需餉甚多若
每月僅解銀一萬兩交楊岳斌酌量勻撥杯水車薪
其勢萬難分給楊岳斌現在酌定數目請飭月撥甘
省三萬兩在川省旣易於籌措而甘省亦得稍資轉
輸著崇實駱秉章按照楊岳斌所定餉數除鶴齡軍

餉照舊由川省籌解外每月再籌銀三萬兩解交秦州由楊岳斌斟酌慶陽新疆等處情形分撥提用甘肅新疆各處用兵甚亟該處地方瘠苦每以協餉未到致令軍士枵腹荷戈時虞譁潰川省若再不力顧大局籌濟餉需則各營勢將瓦解必至決裂不可收拾則川省亦不能辭咎也崇實駱秉章務須按照此次酌定數目源源接濟不得稍有減少致誤要需至

鶴齡一軍現亦因川餉久缺不能西進該營亦極形困苦崇實駱秉章卽將應解該營軍餉迅速籌解毋再遲延

同日德勒克多爾濟穆精阿奏言前奉

諭旨飭令副都統桂成統帶所部官軍嚴防磴口業經遵照移紮茲據副都統桂成咨稱花馬池時有回匪窺探情形尤爲喫緊到防甫經兩月逆回

已結隊出邊數次均督飭蒙兵擊退並槍斃賊
匪數名奪獲旗幟軍械多件其寶豐平羅磴口
等處將軍都興阿已分兵駐守惟靈州賊匪不
時竄擾彼處軍情比之磴口更形喫緊况邊外
綿亙千里所部蒙兵僅一千數百名旣已不敷
防剿兼屢次撥派護解大營軍需若再常駐磴
口誠恐花馬池邊外空虛儻有疏失誰職其咎

謹將緩急情形詳細聲明請卽據情轉奏前來
臣等伏查該副都統親臨察探自必確切且軍
情靡定自應先其所急仍飭桂成駐紮花馬池
地方實力嚴防以昭慎重至前此賊匪雖有圖
竄磴口之信已經該副都統會同貝子札那格
爾第派兵扼要堵禦應請

飭下阿拉善王貢桑珠爾默特就近添兵助防以臻穩

固其前由臣派撥綏遠右衛官兵二百名交該副都統統帶已飭分爲四起按站前進今桂成旣不能折赴磴口該處雖有防兵無人統帶應請將此項官兵二百名調赴包頭駐紮備將來磴口花定一帶援應之需惟副都統桂成現以花定橫城一帶距磴口千餘里之遙有鞭長莫及之勢請以該處駐紮解任公貢蘇隆札布所

帶官兵五百名仍歸該副都統統轄以期聯絡
聲勢奏入

上命軍機大臣傳諭都興阿穆圖善德勒克多爾濟桂
成曰前因逆回有北竄磴口之信該處防務緊要疊
經諭令桂成統帶所部官軍移防磴口俾資扼堵茲
據德勒克多爾濟等奏稱花馬池時有回匪窺探較
前尤爲喫緊權其輕重自應先其所急請仍飭桂成

駐紮花馬池以昭慎重各等語所有桂成一軍卽著
仍駐花馬池地方實力嚴防毋稍疏懈並著都興阿
穆圖善酌量情形嚴飭在防各軍與桂成各軍協力
守禦互相援應其包頭鎮添設官兵二百名著仍歸
桂成統轄以期聲勢聯絡寶豐平羅磴口等處都興
阿等均已分兵駐守磴口要隘並經桂成會同貝子
札那格爾第派兵堵禦惟恐兵力尙單著都興阿穆

圖善速行知照阿拉善王貢桑珠爾默特就近添派
勁兵嚴防磴口與在防各軍會合堵禦毋稍疏虞

十一日壬寅掌福建道監察御史張觀鈞奏言臣

伏讀

上諭聯捷奉命帶兵出關到處藉詞逗留已屬大負委
任復敢肆意需索騷擾地方可惡已極著毋庸幫辦
成祿軍務降爲藍翎侍衛交成祿差遣仍著迅帶所

部剋期出關勦賊等因仰見

聖主黜陟自有權衡不勝欽佩第臣尙有不能已於言者從來使過之道必其人尙有可取始可予以自新策其後效若聯捷者縱兵殃民威福自作未聞勦賊尺寸之勞已負驕縱不法之罪揆諸使過之道難收晚蓋之功且臣聞其在山陝境內到處需索騷擾貽害非止甘省就令目前迅

速出關轉恐流毒更甚若不嚴加懲辦亦慮諸將效尤擬請

旨將留營差遣藍翎侍衛聯捷革職拏問按律治罪以爲帶兵不法者戒奏入

上諭內閣曰前因楊岳斌查明聯捷在甘肅境內逗留騷擾各節聲明該員本有應得之咎如何置議俾不脫身事外等語是以將聯捷降爲藍翎侍衛交成祿

調遣仍令剋期出關並嚴諭該員再敢逗留騷擾卽
按照軍法治罪朝廷於聯捷加以降黜而仍令其出
關者所以杜其趨避比中自有權衡並非曲法以行
也茲覽張觀鈞所奏深以聯捷罪重罰輕無以肅戎
行而儆貪劣請卽革職拏問以爲帶兵不法者戒聯
捷之罪卽予革職亦所應得惟將該員拏問來京轉
得置身事外聯捷著卽行革職暫緩拏問仍交成祿

差遣飭令迅卽出關儻再有不法情事不難將聯捷
按照軍法從事以昭炯戒

十三日

甲辰

楊岳斌奏言據升任河州鎮總兵曹

克忠呈稱鞏昌解圍該逆並未遠颺其大股麕
聚城西四十里外熟陽城地方意圖復逞因於
十一月十一日晚閒出隊進剿黎明行抵該處
賊已列隊而待我軍施放槍礮斃賊一百餘名

逆衆大亂各軍爭先猛進縱火燒開堡門堡內
賊匪千餘人盡行揆斬乘勝追至董家堡該堡
回逆亦望風而逃沿途復斃賊九百餘名生擒
馬魁馬進義等賊酋七十四名將董家堡賊巢
一律平毀天晚收隊我軍略有傷亡臣查曹克
忠自調赴鞏昌立解城圍茲又力疾督隊大獲
勝仗實屬異常出力昨據部咨該總兵已蒙

恩授甘肅提督其麾下尤爲出力之提督張在山陳開
秦王得勝等前此隨同攻克固原州鹽茶廳蕭
河城白季村等處此次又復攻毀賊巢應如何
獎勵之處出自

天恩該營將弁兵勇可否准臣擇尤保奏伏候

聖裁

楊岳斌又奏言新授河州鎮總兵李助發呈稱

十月二十六日行抵會甯探得該縣乾溝驛地方有大股賊匪盤踞遂於初四日寅刻出隊初五日黎明探有馬賊七八百人來自河西步賊一千餘伏於街東木卡右營吳文瑞先由河西敵住馬賊左營劉清河由河溝鑿冰開路而上併力截擊前營李春海移兵街東放火燒燬木卡乘勢衝入殺賊數十人生擒十餘人正法該

逆棄糧北竄卽派馬隊幫同追剿復殺賊百數十人仍回街西駐紮賊遺糧石盡以分給該處飢民會甯現已肅清奏入

上命軍機大臣傳諭楊岳斌曰鞏昌府城解圍後該逆仍麇聚城西四十里外熟陽城地方復經曹克忠督飭所部張在山等跟蹤追剿生擒逆匪馬魁等多名並將董家堡等處賊巢一律平毀剿辦尙屬得手所

有此次出力之張在山等本日已明降諭旨獎勵矣
現在該逆被勦窮蹙訊據賊供有率衆東竄之語著
楊岳斌飭令曹克忠迅率各軍分投追勦務期掃盡
逆氛會甯雖已肅清各路餘匪恐仍乘閒竄擾並著
楊岳斌檄令李助發等認真搜捕務絕根株

上諭內閣曰甘肅鞏昌府解圍後大股賊匪麕聚城西
熟陽城地方提督曹克忠督兵分路追勦陣斬悍賊

一百餘名縱火燒開堡門一擁而進控斬無遺乘勝
進勦將董家堡一律平毀勦辦甚爲得手所有尤爲
出力之提督張在山陳開泰王得勝等均著交部從
優議敘其餘出力員弁著該督查明擇尤保奏毋許
冒濫

楊岳斌又奏言 臣前在陝西設立轉運局奏明
飭令藩司林壽圖兼管該藩司現已降調卸事

所有轉運局務查有候補道岳雲溪爲守兼優
堪以總理奏入得

旨允行

欽定平定陝甘新疆回匪方略卷一百二十四 乙丑年

十二月十九日

庚戌

武隆額奏言逆回自哈薩克敗散後仍盤踞禮拜寺壑匿不出八月初一日

臣知會轉世喇嘛設伏防守西南一帶一面移營城西頭工逐日設法誘敵派驍騎校興凱等帶領兵勇密伏城外西河沿子一帶初五日辰刻賊列隊來犯勢甚兇猛我兵乘勢出攻前後

夾擊自辰至午斃賊多名奪獲器械無數賊始
敗潰我兵追至寺後賊於牆內密施槍礮未能
攻入十一日探知哈薩克竄據炭窩溝 臣囑轉
世喇嘛督兵進剿殺斃哈薩克一百數十名奪
獲牛羊三百餘隻餘匪北遁卽將所獲牛羊分
給蒙兵食用該喇嘛復恐東路賊匪潛出將營
移至東六工駐紮其西南一帶仍派馬隊官兵

防堵九月初九日土爾扈特親王策琳拉普日
等親統游牧官兵千餘名到城臣會同轉世喇
嘛固帑幹札拉叅領隊大臣圖庫爾布爾和德
等公同接見詢其因何屢調不至該親王以巴
彥圖傳述塔城已失無可救應爲詞察其詞色
殊無爲

國宣力之意此次勉強帶兵前來實不足恃隨令

暫在城東紮營九月十二日臣又知會轉世喇嘛並令領隊大臣布爾和德等帶隊進攻賊寺該逆由牆孔施放槍礮我兵仰攻未能得手十四日探聞西北卡外一帶屬聚哈薩克游牧數處俱係賊匪外援轉世喇嘛帶領蒙古馬隊及土爾扈特官兵二千餘名馳往勦辦十六日途遇哈薩克馬隊千餘人我兵奮勇迎擊該匪敗

走追至哈薩克游牧殺斃大小男婦數百人奪
獲牛羊甚多餘匪越山而遁臣隨將所得牛羊
分給各官兵民勇作爲口食二十八日臣復令
興凱李鈞等由城西進攻賊寺臣登城親執桴
鼓一面暗設伏兵賊從寺後擁出百餘人伏兵
突起擊之西門城頭亦開礮轟賊後隊賊卽敗
回我兵追至寺後該逆復從牆內暗施槍礮仍

未攻入臣查該匪屢次勾結哈薩克來襲分我
兵力空壕築塹拒守甚嚴臣惟有設法速破賊
寺以期早靖邊圉

武隆額又奏言十月初二日領隊大臣布爾和
德來城面稱土爾扈特親王策琳拉普旦帶領
游牧官兵一千名於二十九日夜間潛遁派兵
追尋渺無蹤跡臣查該親王首鼠兩端竟敢率

領全軍逃回游牧實屬目無法紀惟逆回未除
勾結可慮擬請暫緩置議以杜亂萌

武隆額又奏言塔爾巴哈台解圍後

臣

兩次拜

發奏摺派呢柯布雙成等先後齎送八月二十

日呢柯布回稱齎摺至科布多所屬烏梁海地

方該處全無臺站隨將摺報齎至科布多交給
轉遞被其扣留十日始令旋回行抵烏梁海因

無臺站馬匹稽留三十八日幸遇土爾扈特喇
嘛赴哈薩克貿易便中攜帶回城等語九月初
七日雙成回塔所言與呢桐布同並稱係自雇
馬匹兼程前往於六月十七日抵科將摺包夾
板咨部公文併交該處轉遞亦被扣留二十餘
日嗣隨新任塔爾巴哈台領隊大臣阿隆阿自
科起程行至距城五站沙子蓋地方因無臺站

馬匹阿隆阿不能前進卽派雙成馳回科布多
面稟參贊大臣廣鳳請飭蒙古撥派馬匹該參
贊大臣及該管章京皆言沿途哈薩克阻塞並
未安臺無從支應亦無處代爲雇覓馬匹雙成
馳回沙子蓋面見阿隆阿將該章京所言回明
阿隆阿因無臺站馬匹仍回科城幸值科布多
派出訪拏巴霞巴彥圖之筆帖式二員在彼居

住雙成當向再四懇告該筆帖式始飭該處蒙古派兵護送過境曾在哈薩克蘇牧一宿烏梁海有哈薩克數十家詢係歷年在彼並非近日遷往該大臣及章京所言盡係推諉再有山西綏遠城撥解餉銀二萬兩經烏里雅蘇台將軍明誼派新放塔城印務章京賡音布等沿途小心解運並咨科布多參贊大臣俟軍餉到科迅

派官兵幫解赴塔乃該參贊竟將軍餉寄庫並
將運餉官員扣留云恐途中有失必須塔城派
兵到科方可起運又臣因塔城軍器缺乏曾於
五月閒行文科布多調取戰箭鉛丸火繩等件
旋據咨覆因古城失守派兵分赴本屬各游牧
駐紮堵禦箭枝等僅敷自用無從撥給臣思科
城軍器固不缺乏且可向烏里雅蘇台調撥彼

處旣無賊蹤理當移緩就急何得僅以空文塞責致誤要需至其所屬烏梁海蒙古七臺原因烏魯木齊回亂伊犁塔爾巴哈台摺報不通是以前任參贊大臣錫霖等奏明添設臺站以便馳遞文報運送軍餉今塔城軍務喫緊科城乃以哈薩克搶掠爲詞竟不派兵設臺且臣派往摺弁呢柯布等不過二三人往返該境並在哈

薩克蘇牧住宿亦復安穩如常是道途並未梗塞現在摺報軍餉該大臣均置不問實出意外擬請

旨飭下科布多參贊大臣遵照上年原奏趕緊安設烏梁海蒙古臺站並派員帶兵沿途駐紮梭拏外匪護送軍餉庶於軍務有裨

武隆額又奏言塔爾巴哈台自咸豐四年裁減

屯田每年入不敷出今春軍興以來守城官兵
並關外進城難民共計一千數百餘人每日官
給口糧新麥早經用盡現在又有蒙古援兵到
城人多糧少誠恐一旦告匱現在樽節支發並
將轉世喇嘛先後奪獲哈薩克牛羊逐日勻放
稍資接濟計期至十一月底卽當告罄 臣前曾
奏請由科布多借用小麥五千石懇

恩飭催科布多參贊大臣廣鳳等卽在該處倉存項下
如數借撥趕緊運塔如科城糧亦不敷卽就近
向歸化城一帶採買以濟軍食萬勿遲緩致誤
要需奏入

上命軍機大臣傳諭武隆額廣鳳奎昌曰回匪盤踞禮
拜寺內恃有哈薩克援應牽掣官兵經武隆額派令
布爾和德會同轉世喇嘛疊次擊退外援奪獲牛羊

無數甚屬奮勉可嘉現在該逆困居寺內爲數無多
著武隆額督飭各軍合力圍攻悉殲醜類毋任久踞
哈薩克貪利助賊情殊可惡惟人數衆多去來無定
勢難悉加誅滅武隆額當一面督軍追剿一面設法
解散免致勾結爲害土爾扈特親王策琳拉普旦所
帶官兵輒敢私自潛回游牧此等怯懦無能之輩卽
責令剿賊亦必不得力該親王前經理藩院議請革

爵業已降旨允准免其再行置議烏梁海蒙古地方
前經錫霖等奏明添設臺站以便馳遞文報該處現
在並無匪蹤且據武隆額差弁呢柯布雙成等往返
如常道路並無梗塞廣鳳奎昌何以輒將該處臺站
裁撤致文報軍餉等項全行阻滯廣鳳奎昌著先行
交部議處仍著將烏梁海臺站趕緊安設遇有文報
立時轉遞並將賡音布等管解之塔城餉銀二萬兩

迅速派兵護送儻再不顧大局任意推諉定行從嚴懲處武隆額前經咨調科布多戰箭鉛丸等件並著酌量撥給塔城軍務緊要兵民飢困亟應撥濟糧食以固軍心武隆額請於科城倉存項下借撥小麥五千石卽著廣鳳等照數撥給護解塔城儻科城存糧不敷卽著派員於歸化城一帶設法採買應需銀兩卽於各省解到新疆餉內提用並著趕緊辦理毋稍

延緩

武隆額又奏言查額魯特部落原任副總管毛哈拉前因年老乞休自塔城回亂該員首先招集蒙古人等來城救援中途遇賊未能得手嗣於五月跟隨轉世喇嘛到城解圍臣屢派該員帶兵打仗身先士卒不畏艱險每遇哈薩克藏匿處所兼能引導指點熟習地理土爾扈特官

兵疊次託故遷延該員冒險馳往反覆勸諭該
親王始帶兵來城臣查該員老成練達勤奮有
爲實係蒙古官中出色之員懇

恩賞給二品頂戴以總管卽補出自

逾格鴻施達爾達木圖金廠總頭目劉廣厚首先倡議
團練於三月閒隨毛哈拉赴城救援旋會同穆
隆阿等募勇造礮前後所需口糧工料均係捐

資備辦又自措資斧親至土爾扈特游牧請救
因該親王不肯發兵復往小拐地方招集民勇
二百餘人來城會勦洵屬深明大義應請

旨賞給五品頂戴花翎以示破格獎勵奏入

上諭內閣曰蒙古額魯特休致副總管毛哈拉於塔城
變亂後帶兵救援疊次冒險不辭勞瘁勇目劉廣厚
捐資練勇首先應援均屬著有微勞前任副總管毛

三原縣志卷之二 二二
二
哈拉著賞給二品頂戴以總管卽補勇目劉廣厚著
賞給五品頂戴花翎以示鼓勵

二十一日 壬子 趙長齡奏言疊奉

諭旨令 臣 查辦周顯承叅案並雷正綰部卒均經涇州

收集互有猜疑各節據實具奏 臣 前由華陰折

回西安卽選派員弁馳赴涇甯一帶查訪楊能
格原叅周顯承狡詐把持侵匿帑項一節尙未

得切實證據至續添帶隊搶擄滋事釀命則衆
口一詞無可遁飾况聞周顯承原管雷正綰營
務業已交替所集雷正綰舊部經楊岳斌另派
提督譚玉龍統帶其親兵迅字五營亦經臣咨
商楊岳斌交譚玉龍兼統周顯承現辦督臣營
務仍駐涇州督辦各營糧餉臣已一面札調周
顯承等查訊一面飛咨楊岳斌另派委員辦理

糧餉至雷正綰往來平固及涇州附近一帶親
隨隊伍聞止雷恆馬隊二三百名李高啟步隊
四五百名雷恆李高啟均係奉

旨交楊岳斌查辦之人至今延未交出屢接雷正綰來

咨亦無切實言詞臣查雷正綰屢樹戰績素非

桀驁祇因初聞被議語言失檢遂爲羣小要挾
以致軍心渙散幾於一蹶不振此軍歸譚玉龍

統帶以來軍心尙洽曹克忠威望較著第遠在鞏昌能否更調已遵

旨密咨楊岳斌酌量辦理臣原擬赴慶涇一帶駐紮因

思涇州爲周顯承等屯兵處所深恐事機洩漏陝省與慶涇相距匪遠是以臣仍駐西安以昭

慎密惟去楊岳斌旣遠路又梗阻文報往返動須四五十日中途尤慮遺失將來或會商具奏

或由臣一面據實覆奏一面飛咨楊岳斌查照
覈辦總期持平辦理不敢偏執已見奏入

上命軍機大臣傳諭楊岳斌趙長齡劉蓉曰周顯承被
叅各款經趙長齡疊派員弁馳赴涇甯一帶查訪據
稱周顯承狡詐把持侵匿帑項尙未得確實證據而
帶隊搶擄滋事釀命各節則衆口一詞是周顯承劣
跡業已昭著亟應逐款查辦以肅軍律趙長齡因涇

州係周顯承等屯兵處所現駐西安省城札調周顯承等查訊自係爲慎重起見周顯承本係革職拏問之員如已遵調赴陝趙長齡自不難向其嚴切根究如該革員託故逗留或抗不遵調趙長齡仍應遵照前旨馳赴慶涇提集人證秉公查辦該撫如慮到涇州時或有掣肘之處卽酌帶闔文忠親兵一營前進督同譚玉龍傳旨將周顯承拏問諒不至有他虞此

事務須持平辦理兼顧大局使兵民之心均皆折服
方爲妥善周顯承現在涇州督辦各軍糧餉著楊岳
斌迅卽另委妥員前往接替並著該督嚴飭周顯承
恪遵諭旨聽候趙長齡查辦毋得藉端狡展自干重
咎雷恆李高啟二員前經降旨交楊岳斌審辦雷正
綰總未將該二員交出亦未將作何辦理情形據實
具奏殊不可解著楊岳斌劉蓉等傳諭該提督務將

雷恆李高啟設法押赴蘭州交楊岳斌審明辦理如
敢任意抗延或有心庇護卽著從嚴叅辦西安距蘭
州甚遠趙長齡奏請將查辦事件一面據實奏聞一
面飛咨楊岳斌查照覈辦著照該撫所奏辦理

二十五日

丙辰

上諭內閣曰都興阿已調補盛京將軍所有甘肅軍務
著甯夏將軍穆圖善督辦

二十八日己未楊岳斌奏言臣抵任後本擬先攻

狄河再圖西北顧自陶軍潰於金縣雷軍退擾

平涇計可移攻狄河者惟曹克忠暨臣部兩軍

耳而該逆盤踞三城縣互數百餘里依山阻塞

兼據洮河之險必須分道出師方能奪所憑依

遏其奔竄查甘省之兵譚玉龍等所部近二十

營魏添應所統六十餘營一則扼紮涇州一則

駐守慶陽爲回牽掣不能調赴前敵都興阿穆
圖善亦頓兵堅城曠日持久爲今日計非調防
兵作戰兵不可非藉防陝之兵暫作防甘之兵
不可相應請

旨飭下陝西撫臣劉蓉將防守鄜定之兵就近移紮慶
陽並將防守汧隴之兵越境移紮鞏昌扼狄河
之賊不令出援南路庶甘省各路防兵得以次

第調出分道進剿查慶陽統將陝安鎮總兵魏
添應嗜好太深打仗難期得力應請

旨飭赴本任其所部各營擬令曹克忠營中提督張在
山接統仍歸曹克忠節制作爲由環縣進規靈
州之兵涇平各營擬令譚玉龍統帶作爲由固
原進剿靈州之兵其曹克忠一軍作爲由四百
戶直擣靈州之兵臣將省防布置周妥卽親率

一軍出省前往策應俟靈甯二城克復然後會
合都興阿穆圖善移得勝之師規取狄河如蒙
俞允其各營糧餉俱照舊章支應譚玉龍月餉仍責成
慶陽糧臺支應周顯承向供靈營軍糧甚爲得
力仍請責令該提督捐辦俾資飽騰

楊岳斌又奏言欽奉

諭旨陝西甯陝營參將周顯承支放餉需遇事把持令

趙長齡審訊知縣孟樹森令 臣飭赴慶涇一帶
聽候查辦 臣跪聆之下欽佩實深然自 臣愚觀
之

皇上自因慶涇相近楊能格見聞較確而不料該臬司
但欲甘心於周顯承樹德於雷正綰不顧甘省
大局至此也 臣請備細陳之周顯承辦理雷營
營務適遇餉項奇絀竭力搜羅供給雷營一萬

餘人二年來毫無貽誤其有功於雷營者甚鉅
雖其借資民力有勒派捺查等情未免爲衆怨
所歸然甘省籌糧實有難以常理論者卽如 臣
抵任以來初則持銀購買漸因餉缺遂至勸捐
乃捐輸則無困可指購買則奇貨可居竇窖深
藏謂無儋石準是以推該提督之刻意梭尋誠
屬萬不得已 臣 昨奏擬令仍辦譚玉龍軍糧者

實以任勞任怨非是人莫屬也今楊能格輒以
該提督恐雷正綰叅辦故爾架詞陷害等情率
行入告殊不知雷正綰之擁衆東趨也臣處警
報紛至並非出自周顯承之口且被縛之蔣方
直有稟被劫之張允熙有稟卽謂因飢而潰何
以夾帶逆回若謂就糧於涇何以搶劫平涼若
謂別無邪謀何以副將朱淮潮戈什王仲仁營

官王國良夏廷鉞等恐株連而紛紛逃避且金
占元及百餘人之性命誰實害之鶴齡一軍解
存平庫二萬餘兩之餉銀誰實劫之平涇隆固
一帶數百餘里之民人廬舍誰實焚之殺之律
以人臣無將之義雷正綰固無詞解免矣臣爾
時未經具奏而爲此事後之論者蓋逆料雷正
綰一時輕躁必有悔悟之萌其所部百戰餘生

儘多忠義之士且當各處告警之時正值該營
遊擊秦國勝來蘭之後臣與密籌終夜令持札
諭星速前往遣散招撫爲釜底抽薪之計未幾
而雷正綰來咨有屢尋自盡之語臣竊喜大局
無妨故有代請免議之奏迨周顯承等於涇州
招撫十餘營秦國勝於隆德誘回胡大貴而雷
恆李高啟仍肆兇殘雷正綰心迹難明涇平各

軍無所適從故又有十月二十三日及十一月
初二日之奏嗣聞鶴軍將潰聯軍不前成軍太
單又爲雷正綰熟籌變通請令屏絕逆回帶隊
西行會同成祿剿賊凡臣前後所疏陳無非仰
體

皇上始終保全之意而欲雷正綰收之桑榆也乃該提
督始固不慎於言語近復不揣夫事機欲藉降

回成晚蓋之功適予逆回以焚掠之柄軍民惶
懼必致終負

聖恩自全無術

臣

之欲保全雷正綰者在此涇州各軍

之不便再受雷正綰節制者亦在此而當局之
雷正綰不悟旁觀之楊能格不察深可歎也該
臬司於雷正綰曲護其非遂於周顯承故入其
罪曾亦思馬步萬人竄逼涇州回衆數萬緊隨

其後若無周顯承等力捍孤城涇事尙可問乎
陝局尙可支乎而乃以把持誣陷等詞聳動

聖聽此臣所萬萬不解者也至於涇臺之有無侵蝕慶
臺之有無浮銷該二員互相攻訐各有稟函臣
未知底細不敢冒昧具陳此次趙長齡奉

旨查辦必能水落石出所慮者涇平各營張頤待餉辦
糧無人必致再潰合無仰懇

天恩准令周顯承一面聽候查辦一面仍令辦糧伏候
聖裁再據知縣孟樹森稟稱雷軍潰變之時日擊情形
因恐波累乘閒脫出行抵秦州曾向林藩司面
稟一切遂卽復回涇州等語應請
飭令趙長齡就近傳質

楊岳斌又奏言 臣 欽奉

諭旨楊能格本係棄瑕錄用之員究竟能否勝任令 臣

詳細訪查據實具奏臣查楊能格支放各營月
餉不能權其勞逸緩急慶陽防軍十營均無缺
乏而雷正綰前敵一軍反不過稍爲點綴雷正
綰本與交厚未嘗明言其部下早懷怨望近復
強分畛域於周顯承譚玉龍等先後在涇州收
集之二十餘營竟同膜視前聞涇州各營勢將
再潰臣因於到陝協餉內撥給銀二萬兩並將

慶臺應撥 臣營餉銀三萬兩一併飭周顯承赴
陝迎提以固衆志若楊能格在慶日久必致激
成事端仰懇

天恩俯如該臬司前次所請

另簡大員辦理糧臺以弭後患查有降調陝西藩司林
壽圖操守甚好辦事認真堪以接辦如蒙

俞允擬仿照楊能格之例懇

准專摺奏事以一事權

楊岳斌又奏言據署臬司英奎詳稱甘省連年
烽火各路援師及滿綠營兵所需糧餉捐借兩
窮請派員先赴陝西設局專辦捐輸並委員分
赴川晉豫等省辦捐以資接濟並自願出省籌
辦等語查臣前請於川陝兩省籌捐糧石已蒙

允准陝甘接壤轉輸尤便臣一面咨商陝西撫臣飭屬

捐辦一面派員馳往催提並卽在該省設局照
陝西捐米章程籌捐另委妥員分赴晉豫一體
捐辦俟有成數彙解陝局隨時採買糧食接濟
軍需署臬司英奎才具優裕堪以檄往陝西辦
理捐輸糧餉事宜其臬司篆務署蘭州道西甯
府知府華祝三通達治體堪以署理並就近兼
辦臣營事務至川省籌捐糧石已派甘涼道楊

柄銜赴川會辦其本省南路軍糧委署鞏秦階
道張瑞珍籌辦東路軍糧委署平慶涇道豫師
籌辦以專責成

同日劉蓉奏言 臣前奉

諭旨趙長齡著懷遵前次寄諭將周顯承被楊能格奏
叅各款有無冤抑逐一查明等因 臣現聞趙長齡欲
急赴晉撫之任又因楊能格續叅周顯承在甯

州催糧滋擾

諭旨並未提及前叅各款意圖迅速完結不復詳查前

後情形

臣

惟此次雷軍潰退是否係赴涇州向

周顯承索餉或係雷正綰失職怨望率師東犯
二者實爲緊要關鍵現在涇卒議論紛紜楊能
格多方播弄事變所激關繫匪輕應請

旨飭下趙長齡暫緩赴晉悉心訪察確情會商楊岳斌

秉公辦理庶幾厭服衆心實於大局有益

劉蓉又奏言接譚玉龍稟稱據涇州各營將弁
勇丁聲訴前次全軍東退實由雷恆李高啟執
傳雷正縮令箭逼令拔營同叛金占元力諫不
從卽被雷恆殺害並殺兵勇一百八十名雷恆
等并約回逆同破西安各營哨被逼無奈只得
棄械逃至涇州會同整備城守此等情形衆所

共見乃臬司楊能格不聲明叛將之罪轉以各營因雷正綰撤去幫辦保舉絕望及久缺糧餉相率謀變等詞誘咎兵勇殊不可解同日又據稟稱該提督經督臣楊岳斌委統捷字馬步等營正在力籌整頓忽接慶陽糧臺六百里照會令全歸雷正綰統帶各營以雷正綰方與回合不肯附入叛黨惶惑莫知所從楊臬司並欲將

駐守荔家堡西峯鎮各軍撤調於東路大局殊
有關係等語臣查雷正綰率師赴甘各營將士
雖值餉匱尙未離心自雷正綰失職怨望雷恆
等倡首爲非而變亂始作然各將士究具天良
不甘從逆旋卽潰散雷正綰自知衆心已去公
論不容悔悟痛哭始有拚死報效之語

聖恩寬大准予自新仍令率師剿賊而雷正綰郵書哀

三國志卷之三十三
三十三
三十三

懇到處干求由是異論百出聯捷以雷軍激變
入告彼時楊能格亦稱固原勇變慶涇危急請
將雷營歸魏添應統帶又稱幸周顯承將何成
蛟等捕誅各勇始感畏折回並貽書周顯承獎
其力保涇州厥功甚偉其後又爲雷正綰請復
幫辦復叅周顯承把持糧餉以致軍潰其前後
矛盾情形自必難逃

聖鑒然使雷正綰果能悔罪卽亦何必深求今旣抗匿
叛將又縱雷恆結連回會擾亂城鄉李高啟攻
毀平固村鎮堡寨陝甘大道梗塞不通是否真
心反正趙長齡在陝查辦諒能詳察前後情形
剖白是非據實具奏惟臣頗聞雷正綰因聲名
敗裂士卒不附而叛將雷恆李高啟又礙難交
出屢浼聯捷成祿楊能格德興阿代奏或出關

效力或赴楚豫勦擒蓋知甘省不可託足猶覬
掌握兵符而楊能格心慮雷正綰離甘則糧臺
無所附麗無復專摺奏事之權不肯代爲陳請
且其管理糧臺祇顧慶防各軍不恤涇州士卒
屢因涇營撥糧請餉積啟猜嫌現雷正綰所積
馬步不過千餘慶陽魏添應僅祇八營且多虛
伍獨涇州營數最多慮歸譚玉龍等統帶之後

卽應受督 臣楊岳斌節制又恐糧餉勻撥不公
或致糧臺被撤而平日藉口督辦慶防調撥營
伍之私心不能自遂於是不計軍心向背事勢
順逆挾私偏袒專事牴牾必欲使涇防各營胥
歸雷正綰統帶此則大局之可慮者也伏查雷
正綰首冒不韙狡焉思逞而將士秉義弗從兵
勇投戈而散實爲生靈之大幸今楊能格不顧

國家公義罔上行私淆亂黑白殊不可解 臣思涇
州各營旣恥雷正綰背逆之名又忿楊能格誣
奏之語如必歸雷正綰統帶不惟激成禍變抑
慮敗壞紀綱旣經譚玉龍據各營訴詞轉稟 臣
不敢壅於上

聞至周顯承一員現已來城聽候查辦矣

同日楊能格奏言已革陝西甯陝營參將周顯

承前在甯州帶隊槍斃生員攻堡淫擄逼斃多

命經臣飭委署慶陽府知府葆鏞前往督同該

州知州張福文查驗撫綏茲據稟稱查明被害

紳民一千一百六十二戶男婦死者十九人擄

去幼孩十一人其餘被傷者指不勝屈赴州呈

控稟詞現已有六百餘紙並據該州先行照鈔

五十張呈送前來已咨送署山西巡撫臣趙長

三
卷一百一十四
二
齡詳查審辦均奏入

上命軍機大臣傳諭都與阿穆圖善楊岳斌趙長齡劉
蓉曰甘省賊衆兵單回匪占踞三城地勢廣袤自應
統籌全局會合陝省兵力分別緩急情形以定進剿
先後楊岳斌擬令曹克忠等先行會攻甯夏令張在
山譚玉龍等分路進剿靈州俟北路平靖再行南剿
狄河等處並請飭令陝省各營分路移紮甘省防剿

所籌均合機宜楊岳斌俟布置稍定後擬卽出省先
赴北路自應首往靈州一帶將此路肅清則甯夏固
原兩處之氣可通南北援應仍可靈便均著該督察
度情形何路喫緊卽先馳往何路援剿至陝省各營
兵勇與其防守本塊何如進剿甘回肅清鄰疆卽以
自固藩籬著劉蓉卽飭鄜定一帶防兵進駐慶陽並
飭涇平各營歸譚玉龍統帶由固原進剿靈州俾回

匪各路均有牽掣不得肆出蔓延阻止官軍進攻之路該督所陳雷正綰兵潰始末情形較爲詳盡雷正綰前在軍營帶隊奮勇屢克堅城殲除巨股賊匪朝廷因該提督爲部下李高啟雷恆所誤屢經降諭明白開導曲意保全並令趙長齡馳赴涇州將周顯承與雷正綰交涉各案訊明辦理著趙長齡卽行馳往該州就近查辦並剴切曉諭雷正綰令其將雷恆李

高啟速行交出聽候訊辦不可代人受過致負朝廷
始終成全之至意至雷正綰與周顯承同在一路積
不相能互相訐告勢必激成事端若令雷正綰前往
甯夏軍營隨同穆圖善辦理軍務該提督與穆圖善
會同隸多隆阿麾下共事有年諒可合力同心共爲
國家出力此係朝廷曲示保全之苦心著楊岳斌劉
蓉斟酌情形速行覆奏如果事屬可行卽著先將朝

廷恩諭宣示雷正綰令其酌帶隨身弁勇迅赴甯夏
軍營仍著將朝廷委曲保全之意向該提督宣示令
其感激圖報並傳諭該提督不可專事招撫懈於防
剿致爲回匪所乘貽誤事機至周顯承前在涇州力
行防堵並招撫潰勇回營轉危爲安若日以圖謀兵
柄等情何以明賞罰而服人心周顯承現已親赴西
安聽候查訊尙無跋扈情節其把持誣陷各情有無

確據趙長齡馳抵涇州後不難逐細訪查以期折衷
至當並著楊岳斌繞赴慶涇一帶會同趙長齡秉公
查明據實具奏現在涇州軍士議論沸騰趙長齡若
不從公剖斷是非但以顛預了事希圖速離陝省設
或貽誤大局咎將誰歸至周顯承在涇州以揆括糧
米爲勸捐恐閭閻被害者多或至激而生變楊岳斌
請令周顯承勸辦糧米殊非所宜該革員現已赴陝

聽候查辦所有勸辦糧米事務卽著責成譚玉龍辦理如譚玉龍不能得力著楊岳斌另派委員接辦現據楊能格奏稱周顯承前在甯州有帶隊搶掠逼斃多命等語是否確實並著趙長齡會同楊岳斌查明覆奏楊岳斌所叅楊能格支放各營月餉不分勞逸緩急於涇州各營隔膜相視涇營勢將再潰本日復據劉蓉密奏楊能格不顧國家公義罔上行私淆亂

黑白等款糧臺支放餉需總宜相度緩急秉公勻撥
該臬司如果有挾私偏袒及與涇營專事牴牾不顧
大局各情卽著認真確查嚴叅懲辦現在涇州軍心
危疑恐激事端楊岳斌趙長齡務當秉公密查不准
稍涉含糊洩露致貽後患懷之慎之涇營缺餉甚久
仍著楊岳斌劉蓉設法籌濟以安軍心魏添應所部
虛伍甚多此軍旣歸楊能格節制何以如數給餉不

行查覈著楊岳斌查明具奏一面將魏添應勒赴本
任如查有劣跡再行嚴叅一面另派得力之員統帶
該營將士至涇營將士既不願歸雷正綰督帶著楊
岳斌卽飭譚玉龍統率以釋羣疑而服衆心楊岳斌
所派道員英奎等分赴川陝辦理捐輸糧餉事宜並
委員在甘省分路籌辦軍糧等務均著如所請行都
興阿昨已有旨補授盛京將軍現尙未經啟行所有

雷正綰隨同穆圖善辦理軍務於大局有無窒礙之處並著都興阿穆圖善會商覆奏

卷之四十四

四十四

欽定平定陝甘新疆回匪方略卷一百二十五

丙寅年

五年正月初四日

甲子

穆圖善奏言十一月二十

七日據甯夏回目馬萬選等自縛來營乞降並據漢民紳耆聯名遞稟代懇收撫當經都興阿會臣受降批令趕緊獻城繳械並派文武員弁辦理安撫事宜旋據該回衆於十二月初二日遵將城池及城外圩卡全行撤空各堡回人俱

移往城南納家開一帶散處村落聽候安插繳
礮二十六尊槍千餘桿刀矛萬餘件銀米馬匹
亦陸續呈繳並將爲首倡亂之千總納萬有送
營正法臣等卽於初七日派黃金山等帶領各
營分駐各城關內外漢民亦均進城安業忽於
十五日都興阿先將留營辦繳銀米質押投誠
之回目保立等十一人駢誅卽帶總兵陳天佑

等營入城聲言回人城內窖藏軍械帶隊誅洗
不分漢回殺斃老幼數百餘人且將城內完善
房屋焚燒多處以致人情洶洶兵勇搶掠自相
攻殺變在頃刻幸提督劉定邦黃金山副都統
善山保總兵程興烈胡世英李曙堂等極力阻
擋方始撤隊出城臣聞報驚惶飛札黃金山胡
世英等六員迅卽照常入城防守以安回衆而

固民心正在發札忽據探報是日酉刻兵勇又復入城恣意焚掠屠戮黃金山等彈壓不從自定更至天明城內焚掠一空居民自盡者數千人燒死者無數並將已交銀米搶掠殆盡伏思甘省徧地回氛甯回已屢在楊岳斌雷正綰聯捷處具稟報稱真心悔罪而各處回衆皆觀望甯郡舉止以爲順逆自應懷遵疊次

諭旨不分漢回只分良莠勦撫兼施可冀各回聞風向
化今遽爾殺降何以示信且回衆獻城之後移
紮納家闡等處者尙多難保不因城回被洗茲
生事端現仍派總兵程興烈三營會同胡世英
二營駐紮西南北三面防守城池以備不虞
臣
目擊心憂籌畫無策惟有仰懇

天恩嚴治 臣罪

簡派大員迅速來營查辦以維大局

穆圖善又奏言准都興阿咨稱前經因病乞罷
未蒙

恩准現更心志謖亂已具摺請假調理此時應辦之事

令臣酌辦臣查此次甯郡回衆投誠業經獻城

繳械其銀米馬匹亦繳有成數而十五日之事

非撫非勦情形變易辦理尤難臣身任幫辦雖

尙抱病何敢稍存觀望現已將郡城各門派員
駐紮加意防守並飛調地方官星速來城辦理
善後至移紮納家關一帶回衆臣自當權爲安
撫俟

簡派大員來甯再行酌度情形辦理

同日都興阿奏言官兵攻克城南賊圩後旋據
甯郡回目馬萬選等稟稱回衆悔罪投誠懇准

獻城繳械並情願報效銀米聽候撫卹難民當
經會同穆圖善於十一月二十七日傳該回日
等來營訊供遂限令於二十八日起至十二月
初三日將城圩一併獻出該回等暫移距城四
十里之納家闡迤南居住聽候安插並限於初
四初五兩日將器械軍火馬匹全數呈繳乃該
回等至初七日始將圩卡全行撤退獻出郡城

而城內逗留回民仍復不少屢經展限催移並
派員催繳軍械馬匹俟查辦確有實際再行奏
聞惟臣身弱多病痰嗽帶血神思恍惚深恐籌
慮未周貽誤事機仰懇

天恩賞假兩月俾資調理現在應辦事務臣一面咨會

穆圖善妥辦臣病稍愈卽行會同辦理均奏入

上命軍機大臣傳諭都興阿穆圖善曰回目馬萬選等

懇請投誠經都興阿會同穆圖善批准勒限獻城繳械據穆圖善奏稱該回衆於十二月初二日俱已遵批將城池耳卡全行撤空各堡回人俱移往納家開一帶繳出槍礮刀矛多件並陸續呈繳銀米將倡亂之千總納萬有送營正法是該回等已屬真心悔罪何以都興阿將留營辦繳銀米之回目保立等十一人誅殺並於十五日督帶陳天佑等入城各兵勇肆

行槍殺殊不可解都興阿是否因該回等逾限至初
七日始獻郡城且城內尙有回民逗留迹涉可疑是
以督隊入城誅洗以杜後患抑係另有別情著卽將
前後辦理實在情形明白回奏都興阿前已調補盛
京將軍茲據奏稱病勢較前尤增懇請賞假調理現
在奉省馬賊猖獗都興阿當恪遵前旨速赴新任毋
庸給予假期穆圖善現任甯夏將軍責無旁貸所有

納家開等處回衆如何妥籌善後之處著卽責成穆
圖善妥爲辦理毋令已成之局又生他變其甯夏郡
城防守事宜仍應認真籌辦以備不虞所請另簡大
員來營查辦之處著毋庸議

初九日 己 都興阿奏言 臣 奉

命督師入甘以來不敢因地苦糧少曲意主撫蓋以回
人反側難信非勦不可言撫本年夏閒穆圖善

營務委員知縣舒之翰來營持有聯捷發給招
降回人告示黃旗請示如何辦理臣言此乃聯
捷所辦與我營無涉並令回稟幫辦不可因此
懈怠軍心不數日又由聯捷專差西安佐領德
清額送信臣嗔其先至甯城因摘頂戴押交平
羅縣看管一面咨詢聯捷迨聯捷函請釋回臣
未置答遂將德清額撥入西安營充當兵差嗣

後各營紛紛傳言此次回人真心投誠只有督
辦一人不願受降 臣知各營因地方瘠苦俱願
敷衍了事遂連日督催各營出戰以冀激勵軍
心十一月二十四日總兵胡世英等來稟稱有
回目馬萬選等六人乞降實係真心投誠 臣遂
會同穆圖善派提督黃金山等六員訊取該回
確供據稱該回目等真心乞撫並願卽時獻城

撤圩繳呈器械馬匹報效銀米贖罪等語 臣復
會同穆圖善於二十七日傳該回目等來營親
詢一切情狀尙屬可信遂批限三日撤圩五日
獻城七日繳齊軍火馬匹竭力報效銀米移居
納家開迤南聽候代懇

天恩分別安插仍責成黃金山催督辦理至本月初七
日該回始將甯城獻出而城內逗留回人仍復

不少呈繳軍火亦覺所短尙多馬匹均未繳出
初九日有回目曾任甯夏遊擊納忠守備納萬
有花馬池參將保立及千總外委等十五名來
營呈遞履歷臣擇其職銜較微人稍怯弱者三
名飭令催出城內回人及應繳各項予限二日
畢事又查出城陷時首先內應之守備納萬有
一名當飭正法一面將納忠等十一名扣留作

質迨十三日僅據繳到馬十匹皆疲乏不堪城內回人仍未搬出察其情形叵測未便稍事姑容又聞城內窖藏軍火器械該回聚守城圩我軍腹背受敵所關殊非淺鮮遂連夜趕辦曉諭兵勇告示十五日先將扣留之回人十一名正法臣帶隊聲言進城查看衙署一面將撥查驅逐之意知會穆圖善而穆圖善未來僅令善山

保帶領九營列於城外各營統將見臣告示亦
均有不願之意臣忿甚卽令杜嘎爾等督催臣
部各營勉力前進不過食頃均行撤轉待衛常
順馬隊陣亡一名陳天佑步勇陣亡受傷者二
十餘名執械相拒者是勇是回一時未能查出
日中以後聞兵勇紛紛進城藉勢焚掠不辨何
營不知何人主使臣見此情形憤發舊病萬難

支持昏迷之際遽具摺請假調理伏念 臣督兵
進戰日久遷延上勞

聖慮下失兵心勦撫無定自相矛盾又復率請病假實
屬辜負

天恩現聞西們克西克不日到營仰懇

鴻施將 臣部各營及西們克西克馬隊均歸穆圖善統

率並請將 臣交部詳細訊明從重治罪穆圖善

心地誠實才亦開展不辭勞瘁甚得兵心此時
城南各營布置已妥回衆亦甚安靜仰祈

聖明垂念大局卽飭穆圖善督辦甯夏軍務兼辦安撫
事宜於刻下深爲有益奏入

上命軍機大臣傳諭都興阿穆圖善楊岳斌曰都興阿
因該回等未能遵限獻城且城內逗留回人不少所
繳馬匹又皆疲乏不堪該匪等首鼠兩端都興阿將

保立等正法並帶隊進城稽查驅逐恩威並用所辦
甚屬認真現在城南各營布置已妥回衆亦甚安靜
都興阿自請從重治罪之處著加恩寬免惟奉省賊
勢猖獗亟盼該將軍會同文祥等督兵進剿著恪遵
疊次寄諭星速起程馳赴奉省以副委任穆圖善身
爲甯夏將軍且有督辦軍務之責所有甯夏善後事
宜及納家開安插回衆諸務穆圖善務當斟酌輕重

三
二
一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

緩急妥協辦理聯捷業經革職應卽遵旨隨同成祿
出關剿賊諒不敢再行干預辦撫爲逗留計穆圖善
切不可再信其言致誤大局都興阿離營後穆圖善
責無旁貸設或善後一切事宜未能周妥致已成之
局又生他變屆時縱思誘過他人以善自文飾朝廷
惟知治穆圖善以辦理不善之罪杜嘎爾木係甯夏
副都統所統馬隊數百人仍留甯夏軍營最爲得力

著都興阿斟酌情形妥籌調撥迅速奏聞都興阿前
往盛京隨身親兵可以酌帶惟所募之勇須酌量裁
汰歸併穆圖善軍營不可帶往盛京至收復甯夏時
藉勢燒房搶擄之兵勇著穆圖善嚴密訪查將爲首
滋事者正法以肅軍律不准含糊了事甯夏府城業
已收復亟須文武員弁前往料理著楊岳斌嚴飭道
員三壽知府孫家穀等速赴本任以重職守毋任遷

延

二十日庚辰雷正綰奏言臣荷蒙

聖恩疊次

諭令仍統各營進剿臣查東北靈州一隅毗連陝界尙
爲回踞自應先行撲滅以顧山陝門戶現在都
興阿穆圖善兩軍合圍甯靈城中回逆漸缺糧
食臣復分兵扼要雕剿斷其糧路原期一鼓蕩

平無如甘省糧餉羅掘已空陝省協濟雖疊奉

諭旨嚴催撥解寥寥臣初八甘時呼應較靈故得力效

驅策現歸督臣楊岳斌調遣督臣意在先剿河

狄使近城無賊省垣得安而臣所慮者有三督

臣所部僅止十數營必須調臣與曹克忠兩軍

始敷布置第兩路之兵若撤靈州等賊必至竄
出陝西餘孽不忘故鄉一旦南擾不惟全陝震

動卽賊騎四掠資糧充裕都興阿穆圖善兩軍
何由得手此竄逸之宜防一也况河狄之賊猝
不易破各處逸衆必躡我後餉道難通援軍易
絕此西行之未見勝算二也且曹克忠一軍已

經督臣調去而都興阿穆圖善圍勦甯靈功在

垂成臣會同楊能格扼紮環縣安化等處實以

斷賊之東竄若再撤臣軍則靈州垂成之功棄

之可惜此事機之不容坐失三也計不如先清
東北仍令臣與曹克忠會勦靈州翦河狄之羽
翼俟兩城旣拔合軍西行則破竹之勢旣成河
狄雖強不難刻期勦洗矣奏入得

旨甯夏業經收復靈州一路有穆圖善等勦辦涇州各
營已歸譚玉龍統帶該提督應於何處進勦當靜候
楊岳斌調遣以一事權

雷正綰又奏言靈州回民生員周雲龍等來營
乞撫情願交納城池器械馬匹臣責令將逆首
馬化澂父子捆獻再行奏請

恩施該回民等應允臣現已派員同往相機辦理俟有
確實消息請

旨遵行至已革總兵雷恆李高啟前奉

旨交陝西撫臣趙長齡審辦臣卽飭該革員等將所部

各營一併交出迅速赴陝聽候訊問嗣因趙長
齡奉

命署理山西巡撫是以未及解往又接陝甘督臣楊岳

斌函商令該革員立功自贖維時靈州乞撫當
差雷恆前往偵探賊情復飭李高啟協守固原
旋奉傳

諭將雷恆李高啟改交督臣楊岳斌審辦臣卽遵

旨令其赴省候審並派弁押解起程奏入得

旨雷恆李高啟業經該提督派弁押解起程著卽迅速
解赴蘭州交楊岳斌訊辦毋稍違誤

同日趙長齡劉蓉奏言 臣等接據統帶防涇楚
軍提督譚玉龍稟稱前竄陝西隴州逆回現由
靈臺崇信一帶竄回平固此股回匪探係固原
叛將雷恆李高啟等暗招前來其由平涼竄回

固原雷正綰駐紮平涼城內佯爲不知回目孫
義章日寄雷正綰數信閱畢卽焚情形詭秘亟
應防範惟涇州一軍餉盡糧絕詢之雷正綰所
派營務處副將李世福面稱甯州安化之糧據
楊臬司云必須由慶臺承辦解交該副將李世
福收支斷不運至涇州等語至餉銀一項曾經
慶臺撥發二萬兩被李世福中途截去銀一萬

一千兩涇州僅得銀九千兩又據涇州提案委員回省面稟譚玉龍各營駐紮涇州軍糧萬分喫緊周顯承前在甯州勸捐經紳民認捐一萬三千餘石詎楊能格札飭甯州知州張掄文將已交數千石解赴慶臺未交者全行蠲免另派慶陽府葆鏞前往重捐大張告示不許運涇致使涇營匱乏譁潰堪虞等語臣等聞之不勝駭

異查慶陽糧臺專爲甘省東路一軍而設雷正
綰所部祇有三百餘人況與逆回勾結肆擾何
待接濟譚玉龍統帶各營駐防涇州慶陽糧臺
自當專顧涇營乃楊能格將捐定糧石勒解慶
陽轉解雷營並令葆鏞另行勸捐似此袒庇雷
正綰必欲使涇防飢潰歸咎譚玉龍不能統率
以實其言不知是何肺腑現經臣長齡飛咨陝

甘總督臣楊岳斌並分咨楊能格札飭慶陽府
葆鏞甯州張掄文妥諭甯州紳民速將認定糧
石剋日運解涇州藉資軍食伏祈

皇上嚴飭楊能格勿存私見趕將甯州安化等處所捐
糧石飛輓解涇以收飽騰之效並請

飭將雷正綰所委營務處副將李世福通判吳玉輝撤
回責成督臣原派總理營務處遊擊秦國勝兼

籌軍糧庶於涇防有裨

趙長齡又奏言遵查已革參將周顯承知縣孟樹森等均已遵調來陝旋聞慶陽糧臺臬司楊能格藉前奉

諭旨大肆張皇派委員弁查拏人證並行知譚玉龍令將各營交雷正綰統帶議論沸騰臣恐激成事端當卽咨明楊能格所有案內人證已由臣分

別提傳毋庸另派員弁查拏並咨譚玉龍遵照
督臣楊岳斌前檄妥爲統率不得擅動嗣接譚
玉龍來咨並遊擊秦國勝來陝面稟雷正綰於
十二月十八日來涇調隊各營譁然不服經譚
玉龍再三彈壓勉將迅字五營撥去現仍紛紛
逃回各等語臣以涇州爲陝甘門戶防範宜嚴
雷正綰旣爲衆所不服自未便聽其爭統搖惑

軍心當擬奏請

飭下督臣楊岳斌轉飭涇州各營統歸譚玉龍督率以
專責成並將雷正綰妥籌位置俾令立功自效
涇營糧餉卽由楊能格趕籌接濟以固士氣正
在繕摺拜發間又奉寄

諭雷正綰前在軍營帶隊奮勇屢克堅城等因欽此仰

見

聖明燭照籌畫周詳曷勝欽佩 臣遵卽移咨雷正綰諭
以大義令其速遵疊次

諭旨將雷恆李高啟速交楊岳斌訊辦並咨令楊岳斌
察看雷正綰前往甯夏軍營能否得力斟酌具
奏一面飛咨譚玉龍遵

旨統帶涇防各營布置防剿事宜仍聽楊岳斌調遣 臣
奉

命查辦周顯承被叅各款前因風聞慶涇官紳將士各
懷疑慮互相邀結一經前往勢必紛紛糾稟轉
難得其實情是以奏明在陝查辦現已遵

旨飛咨楊岳斌約期前赴慶涇會查惟探逆回逼近蘭
州防剿正值喫緊一時恐難出省應俟督臣訂
期咨覆臣卽馳往會商辦理茲就現到人證逐
細根究據周顯承堅供去秋雷營猝變涇州朝

不保暮商同知州林發深招集潰勇合力防守
嗣雷正綰來涇欲將潰勇招回該勇等均不肯
從衆目昭彰各營餉銀向由慶陽糧臺派員赴
涇經理散放伊祇勸辦米糧並未經手餉項至
長武截餉係楊能格咨令截留二萬兩伊因營
數衆多不敷分撥是以全數截留並非搶劫前
在涇州二十里鋪被劫餉銀一萬二千兩當時

卽行通稟經雷正綰將勾結回匪馬永和搶劫
餉銀之營官參將徐太真查明正法首級解涇
示衆有雷正綰批稟呈驗可據實無狡詐把持
侵吞餉項並串通林發深捏稟陷害等事覈與
採訪輿論大略相同至楊能格續叅周顯承帶
隊赴甯州勒捐糧石弁勇騷擾據周顯承供係
甯州知州張掄文函邀前往彈壓所帶馬步隊

共止三百餘人初至甯州時聞有生員栗承祚
被洋槍打傷之事當將滋事之把總田丕江正
法梟示並將帶兵官副將李鳳岡稟請叅辦此
外有無騷擾應請確查等語現復派員前往甯
州一帶嚴密查訪並酌傳被擾紳民前來對質
總期恪遵

諭旨辦理斷不敢草率完案

同日楊岳斌奏言十二月二十一日據聯捷營務處都司海瑞稟稱聯捷因接替防兵已抵靜甯定期十二月初六日帶隊進省忽於初五日晚間嘔血不止初九日子時溘逝各營暫赴涇州就食等情並將遺摺稟請代遞臣查該大臣來甘數月積勞病故殊堪憫惜其遺摺謹代爲陳遞伏候

恩施其所部馬步各軍聞定字一營先於初十日乘機
索餉紛紛肆擾現雖就食涇州誠恐統轄無人
或生他變當卽飛飭譚玉龍暫行兼管步隊其
黑龍江馬隊擬檄調來省俾臣營馬隊隨同學
習操演一俟訓練嫻熟仍令該軍馳赴成營以
便出關均奏入

上命軍機大臣傳諭楊岳斌趙長齡劉蓉林壽圖曰楊

能格自叅劾周顯承後與涇州營將積不相能若仍
令管理慶陽糧臺恐難得力本日業經明降諭旨楊
能格無庸辦理慶陽糧臺卽著楊岳斌趙長齡劉蓉
飛速傳知署陝西藩司林壽圖迅速馳赴慶陽接辦
糧臺事務並准其專摺奏事將各營糧餉酌度緩急
均勻撥解以利軍行其陝西藩司一缺著劉蓉派員
署理以便林壽圖交卸前進並著楊岳斌檄飭楊能

格俟林壽圖到慶陽接替後卽赴甘肅臬司本任仍
一面聽候楊岳斌等查辦毋許逗留甯夏府城雖已
收復穆圖善尙須督兵規取靈州及金積堡等處自
應厚集兵力藉資攻勦雷正綰應否調赴甯夏軍營
隨同穆圖善辦理軍務之處著楊岳斌劉蓉遵照前
旨迅速奏報前據劉蓉奏雷正綰馬步不過千餘茲
據趙長齡奏譚玉龍將迅字五營撥交雷正綰帶赴

平涼統計雷正綰所部仍不下二三千人若竟斷其
接濟是激之使變也林壽圖仍當斟酌情形量爲解
濟俾免譁潰滋事趙長齡另摺奏查訊大概情形飛
咨楊岳斌前赴慶涇會查具奏等語逆回逼近蘭州
防剿正當喫緊楊岳斌一時恐難出省趙長齡若必
俟楊岳斌到涇會查轉恐耽延時日著恪遵疊次諭
旨迅赴涇州將周顯承被叅各款及所供各節秉公

查辦近來外省積習往往偏執已見迴護前說趙長
齡務當破除情面認真查訊一秉大公毋得稍涉瞻
徇致負委任正在寄諭閒據雷正綰奏陳甘省現在
情形並布置前敵靈州回衆乞撫各摺片所奏先取
靈州以翦河狄之羽翼各情不爲無見靈州回衆能
否將馬化澂父子捆獻投誠雷恆李高啟曾否解到
著將雷正綰摺片鈔給楊岳斌閱看由該督酌度現

在情形妥籌辦理楊岳斌奏聯捷因病出缺所部馬
步各軍暫行分別管帶等語聯捷係革職之員毋庸
議卹所有黑龍江馬隊卽著照楊岳斌所請檄調來
省藉資訓練如查有疲乏不堪策遣者仍當隨時遣
撤以節糜費其定字營勇現已就食涇州著暫歸譚
玉龍兼管以資鈐束所需餉項仍著林壽圖酌量接

濟

二十一 日 辛巳 劉蓉奏言 臣前奉

上諭楊岳斌請將甘省秦州一帶叛產變價充餉其陝西各處叛產如何辦理之處著劉蓉迅速妥籌具奏等因 臣與司道就陝省情形詳察通籌變價一層有不能行者一不可行者四請詳陳之陝省殷實之戶向惟西同鳳三府較多而受回逆之害亦最烈本年五月閒興辦營田酌量等則凡

承領者准俟一年後每畝按則交租以六年爲限滿限交足者換給契紙作爲永業覈計租值不過民間常價十分之三而又寬以年限並令有力之家不待六年補足租額卽爲永業乃半年以來各州縣丈量報案者一千九百餘頃而認種者僅九百餘頃是其無力承買不問可知蓋殷實之家盡遭焚掠其事後逃歸者舊產尙

荒何暇另置此變買荒產之所以不能行也至所謂不可行者本省既無富民必將求之鄰省然來者合計往返資斧及牛種等費已覺得不償失且官欲速售則價不得不減官司有減價之議奸民存希冀之心歲月耽延仍無實效其弊一地之肥磽惟里胥糧正知之值此籌餉維艱亦往往倡爲變產充餉之議然其實不過欲

乘官司之急售圖遂平日之侵吞其弊二軍興
以來地方官供支兵差賠墊不堪其閒移緩就
急徵存正款尙且不免虧挪此項變價之款陸
續報收未可限以時日更屬難於稽查其弊三
如或另派賢員設局招買計現報有叛產者二
十餘州縣不惟無此多員其薪水局費就中提
取歷時旣久或致所入不敷所出其弊四臣再

四籌思不若籌辦營田漸次開墾成效尙可豫
計奏入得

旨所奏尙係實在情形卽著設法招墾納租認真籌辦
務使野無曠土以裕國課爲經久之計不得徒託空
言一奏塞責

欽定平定陝甘新疆回匪方略卷一百二十六 丙寅年

正月二十三日 癸未 劉蓉奏言據隴州知州楊敏

稟稱上年十二月二十四日逆目馬永和假冒

官兵由固原繞路回至陝邊馬隊千餘竄至該

州之馬鹿鎮故關一帶 臣 派總兵邱時成等會

同截剿該匪聚眾攻城該州督率勇丁開礮抵

禦賊向南塬斜趨後隊仍紮黃家峪沙岡子一

帶約有三千餘衆經提督譚玉龍等派隊馳剿
鏖戰時許賊勢稍卻前隊卽行東竄我軍四面
圍擊殲其後隊五六百人奪獲馬匹器械無數
賊之前隊由隴州杜陽鎮等處道還甘肅靈臺
縣之上店提督劉正高等整隊急追賊復列陣
回撲我軍勇氣百倍斬賊甚多賊衆兵單相持
正急幸總兵譚玉明步隊追及靈臺縣亦督圍

勇繼至立斬執旗賊目一名逆勢披靡潰散旋
竄至娘娘廟沈家河一帶劉正高商請總兵劉
效忠督帶所部由涇州星夜進剿該逆連夜逃
遁我軍奮力跟追沿途復多擒斬餘匪膽落竄
回固原汧隴一律肅清此次該逆突竄陝疆著
謀甚狡幸涇防將士戮力同心立時擊退力保
完善之區勦辦尙屬得手現仍將馬步調回扼

要駐守以備不虞

劉蓉又奏言 臣查甯夏未復之先賊恃靈州爲

犄角誠得一軍徑擣靈州則甯夏失其所恃攻

剿較易今甯夏幸已收復靈州亦有乞撫之說

惟固原爲賊久踞陝甘咽喉梗塞比聞蘭州糧

食奇窘麥石價至七十餘金尙苦無從購買紳

民或扶攜老幼投河自溺士卒日求麪水一餐

而不可得相率逃散如此情狀省城實已坐困
臣屢思運糧接濟而平固道梗必須由隴州小
道繞越馱運之價每石需十六七金猶時慮被
匪截奪其由漢中採辦運赴秦州者又僅足供
曹克忠一軍不能轉解蘭州若不速將平固大
道疏通蘭州官民兵勇勢將束手待斃且平固
聚賊數萬均係陝回日思回竄昨已分股竄擾

隴州現在雷正綰旣奉

恩旨前赴甯夏伏懇

飭下楊岳斌酌帶親兵數營督飭曹克忠鞏昌之軍進

擣固原臣亦派劉玉興會合涇防譚玉龍之師

由平涼進剿以收夾擊之效臣與署藩司林壽

圖等總當竭力同心顧全大局惟各省協濟甘

餉積欠太多仰懇

聖慈從速催解至於慶陽防務俟平固肅清楊岳斌派
員替換俾魏添應得以帶兵進剿臣亦卽遵

旨派兵換防

劉蓉又奏言據甘肅提督曹克忠函稱探悉固
原等處回逆盤踞數萬現以糧食短絀議乘春
融之際紛竄陝疆並稱有吉字營勇丁從賊中
逃出言亦相同嗣接涇防統將譚玉龍稟報雷

正緒親兵陸續逃來者前後約數百人平涼各
營勇丁亦陸續逃至涇州現在涇防勇數日增
糧食日絀設該逆猝至戰守兩難請速籌接濟
等語 臣查陝省兵力尙可勉支惟餉項積欠太
多羅掘俱窮實難兼顧伏懇

皇上飭催署四川督 臣崇實督 臣略秉章將前此勸辦

援甘捐輸銀兩速撥十萬兩運解來陝並請

嚴飭慶臺楊能格迅速撥餉解赴涇州仍催甯州安化等州縣將勸捐糧石飛速運涇並交譚玉龍軍營驗收以救眉急庶於危局有裨

劉蓉又奏言周顯承與雷正綰同籍四川彼此甚洽逮雷正綰紅溝師變聲言直犯陝西以涇州安置眷口知州林發深等倉皇告急請速撥邠長防兵救援旋接涇州委員陳爾第稟函言

涇城危急幸周顯承譚玉龍等相與歃血定盟
誓不從逆並招撫雷營千餘人入城固守當無
他虞嗣後陸續招徠雷營部曲盡散雷正緒知
事不可爲乃於二十六日親至城下痛哭悔悟
言事由部將妄爲今惟拚一死以謝天下但求
給麩萬斤卽赴前敵並遺書周顯承以家口後
事爲託周顯承憫其情詞哀切始稟陳事由胡

大貴雷恆李高啟等迫脅而成且陳雷正綰有
誓死報

國之語不期雷正綰還至平涼復被逆回煽惑反
怨周顯承等招去部曲詆爲忘恩負義周顯承
每日接濟該營麪六七千斤雷正綰均以散給
回部與逆酋孫義和赫明堂穆三楊大娃子等
聯爲腹心並派雷恆李高啟分赴靈州金積堡

收召陝回屬聚平固其包藏禍心挾回自重行道之人皆知之茲奉

恩旨飭令雷正綰赴甯夏軍營隨穆圖善辦理軍務誠

屬委曲保全之苦心

臣謹卽恭錄

恩諭宣示雷正綰令其勉立功勳仰圖報答穆圖善性

情寬厚與雷正綰共事多年必能推念舊情曲

加撫恤惟臣竊有慮者雷正綰旣與靈州金積

堡等處回會潛結難保不首鼠兩端穆圖善自
收復甯夏以來意頗偏重於撫比聞靈州送回
亦有投誠之信若不察真僞惟雷正綰之言是
聽實慮貽誤事機伏祈

密飭穆圖善詳慎體察勿稍徧徇儻雷正綰始終執迷
不肯遵

旨前往則是逆迹昭彰我

皇上亦必有以處之矣

劉蓉又奏言查楊能格自辦理糧臺以來專顧東路一軍各營將士咸謂其私於慶防薄於涇防臣以爲此軍營悠謬之詞未及詳察逮雷軍潰變涇州收集營數最多而楊能格所收各省協餉既不均勻分撥卽甯州安化已經勸收之糧亦令徑解慶陽不許運涇以致涇防軍士待

哺嗷嗷旦夕譁潰則其挾私心以撓大局實已
昭然可見比由周顯承鈔呈慶防統將魏添應
信函據言慶陽糧臺所發各營月餉無論哨官
什長親兵正勇一概折錢三千六百文長夫折
錢三千文卽營官月支公費銀一百二十兩亦
扣平十一兩僅發銀一百九兩而冊籍均令按
照楚章哨官月領九兩六錢什長四兩八錢親

兵四兩五錢正勇四兩二錢長夫三兩之例彙
冊呈報且所領麪價每名日支麥麪斤半每斤
扣折錢二十四文又不按日支放等語卽此而
論楊能格不但挾私偏袒撥餉不公並難保無
侵蝕肥己之弊應請

飭下撫 臣 趙長齡會同督 臣 楊岳斌秉公確查據實叅

奏抑 臣 更有請者自粵逆倡亂以來東南用兵

積十餘年一切選將調兵設臺籌餉悉聽督撫
自揀員弁酌量調用爲督撫者旣躬任地方之
責又深悉各路行軍艱苦緩急之故往往先以
體恤州縣愛惜百姓籌備糗糧拊循士卒爲急
統將或有治軍失律滋事擾民者糧員或有徇
私任意濫支浮冒者疆臣皆得以時稽察撤而
去之大者奏聞小者專決此委任得人事權歸

一之明效也自回氛西熾遣將入關將兵者忘
民情之疾苦司餉者昧軍情之勞逸任地方者
亦無以行其統轄軍民兼籌兵餉之志門戶各
別事權亦分民心軍心兩不得安比歲甘省軍
務未見起色大端不出於此前督臣熙麟以總
督辦理通省軍務自不得不募選親軍設立隨
營糧臺爲總攬全局之計迨熙麟去任而糧臺

一仍其舊所收協餉既祇爲隴東一路之圖而
所養防軍亦僅爲保護糧臺之計現在甘省各
路軍帥以次裁損事權亦稍稍歸一或者可有
轉機惟兵事餉事未可分圖可否撤去慶陽糧
臺由該督臣自擇一員經理以免分歧而歸畫
一伏候

聖裁

劉蓉又奏言據署陝西布政使林壽圖詳稱甘
省糧餉奇窮曾奉

諭旨於江蘇浙江湖北湖南等省按月派定協餉數目
源源接濟而勇衆餉寡卽使如期不誤已覺分
潤無幾乃統計半年以來各省欠解銀數竟積
至四十餘萬之多陝甘總督所部二十四營始
以麩水餬口近則斷炊他如涇州防軍及都營

曹營成營皆須量爲兼顧且擬於漢中鳳翔兩
府採買軍糧並飭副將林春在陝設局製造軍
火帳棚俱望於協餉內勻撥而來源不繼束手
難籌何以固軍心而支危局秦隴相隔窻遠若
由局詳甘奏催轉延時日應由陝代爲奏催等
情臣查甘省各軍飢困情形不堪言狀若不急
圖挽救譁潰堪虞惟有仰懇

天恩飭下江蘇浙江湖南湖北等省務將同治四年欠
解甘軍月餉及來歲按月應解之款兼新帶舊
移速補遲加批旺解俾資轉運奏入

上命軍機大臣傳諭楊岳斌趙長齡劉蓉曰逆目馬永
和假冒官兵由固原繞路回至陝邊撲擾涇州經涇
防將士戮力同心立時擊退勦辦尙屬認真現在固
原等處回匪盤踞數萬意欲乘此春融紛竄陝疆著

劉蓉督飭防邊將士實力堵禦毋稍鬆懈固原平涼
一帶爲陝省赴甘大路回逆麕聚其閒聲息阻隔蘭
州省垣米糧因此奇窘勢成坐困劉蓉現擬派兵由
平涼進剿疏通甘省糧路實能不分畛域力顧大局
並著楊岳斌酌帶親兵數營督飭曹克忠鞏昌之軍
進擣固原與劉蓉所派劉玉興譚玉龍進剿平涼之
師前後夾擊先清東面以期疏通糧路雷正綰旣經

劉蓉傳知令赴穆圖善軍營所有該提督部下將士
及逃赴涇州之親兵並平涼赴涇之勇丁均著楊岳
斌與劉蓉飭令併歸譚玉龍統帶免致散而無紀劉
蓉所叅楊能格分撥各營糧餉不均並營私侵蝕各
情著楊岳斌確實查明會同趙長齡覆奏昨已有旨
令楊能格回甘省臬司本任慶陽糧臺事務令林壽
圖接辦現在涇州需餉甚急卽著劉蓉迅飭林壽圖

撥解餉銀接濟毋稍延誤四川前辦勸捐援甘銀兩
本日已寄諭崇實駱秉章迅解十萬兩赴陝劉蓉所
請撤去慶陽糧臺由該督擇員經理以免分歧之處
著楊岳斌劉蓉會同酌度情形奏明辦理劉蓉仍當
由陝省隨時籌撥銀糧源源接濟不得稍涉推諉

上又命軍機大臣傳諭官文曾國藩李鴻章馬新貽李
瀚章鄭敦謹曰前因甘肅軍務緊急需餉甚殷諭令

江蘇浙江湖北湖南等省按月派定協餉數目源源
接濟茲據劉蓉奏稱刻下楊岳斌所部親兵斷爨飢
困且涇州防軍以及穆圖善曹克忠成祿等營皆須
量爲兼顧乃半年以來各省欠解甘餉積至四十餘
萬兩之多各軍飢困不堪言狀若再不籌解濟譁潰
立見等語卽著官文曾國藩李鴻章馬新貽李瀚章
鄭敦謹迅將同治四年欠解甘軍月餉及本年按月

應協之款趕緊解陝俾資轉運現在甘省軍餉萬緊非尋常餉項可比該督撫等務當統籌兼顧毋得稍分畛域觀望遲延貽誤大局

上又命軍機大臣傳諭穆圖善曰前因甯夏收復所有善後事宜及納家聞安插回衆諸務疊經諭令穆圖善妥協辦理現聞靈州逆回亦有投誠之信該將軍務當熟察誠僞認真籌辦不可偏重撫議墮賊狡計

雷正綰與周顯承等意見齟齬已令其酌帶隨身弁
勇迅速赴甯夏軍營隨同穆圖善辦理軍務穆圖善
與雷正綰共事有年想必能戮力同心埽除賊匪惟
該提督近來專以招撫爲事恐爲孫義和赫明堂穆
三楊大娃子等所給穆圖善總當遇事詳慎體察毋
稍徧徇庶操縱有權機謀不致宣洩雷正綰何日抵
營並著穆圖善隨時具奏靈州爲首各逆必應擒獲

正法其投誠之衆非將軍械馬匹全數呈繳不准收
降經朝廷再三誥誠該將軍如不能悉心體會旨昧
從事致貽後患必惟穆圖善是問此係密旨著不准
一字洩漏

二十六日
丙戌都興阿奏言欽奉

諭旨令臣詳察回衆投誠事宜謹就現在情形縷晰陳
之查聯捷鈔呈靈州回目馬化澂初次投誠稟

內據稱前向雷正綰遞稟投誠已蒙允准旋因
曹克忠進兵強家沙窩以致難回疑懼等語該
回旣係真心投誠縱有疑懼亦當稟明情節豈
得復行抗拒且致雷營有金積堡之挫其餘穆
生花孫義章等各稟大略相同雖云乞撫尙無
要領臣思陝甘回逆到處荼毒黎民漢回讐怨
已深今欲投誠乞撫其甘心倡亂者固屬罪在

不赦果有畏禍被脅者自應准予投誠以示區別惟是回情詭譎心志固結窩巢徧地聲息相通僅此甯靈一帶乞撫尤宜慎益加慎務使漢回相安方免後患及十二月二十七日據後路營務處鈔呈告示一紙閱其前銜係總統忠義等營專辦招撫事宜副將孫義章交花馬池參將各處張貼者內稱該副將自固至靈節節撫

綏現令漢回百姓各歸各業等語臣以孫義章
何時投誠何時已保副將均無明文不勝詫異
當飛飭各營及地方官嚴行防範於未經查明
具奏以前不准回人私自往來以杜勾結續又
據烏蘭察布貝子沙爾布功格呈稱正月初一
日突有回匪擾及毛卜拉邊口當卽督率台吉
梅樹等統帶馬隊追至倒塔爾地方接仗獲勝

斬首三十三級生擒一人等語似此情形刻下甯郡雖經收復而河東花馬池定邊一帶後路亟應添撥勁旅倍加嚴密臣現今甯夏副都統杜嘎爾帶領黑龍江馬隊一百餘名馳赴安邊督飭在防馬步各軍妥爲布置又臣於上年十二月二十八日欽奉

諭旨所有駐紮花馬池之直隸官兵能否遣撤歸伍抑

可抽撥另枝勁旅前往接替之處令 臣 妥籌具奏伏
查花馬池防務日前萬難稍鬆而直隸邊防亦
關緊要若甯郡回衆實係投誠由穆圖善接辦
後 臣 當卽移紮花定一帶其直隸官兵能否遣
撤再行妥籌具奏奏入

上命軍機大臣傳諭都興阿穆圖善曰回目馬化澂旣
向雷正綰軍營具稟投誠當曹克忠進軍強家沙窩

之際何不將疑懼情節稟明輒敢聚衆抗拒致雷營
有金積堡之挫該回目等陽爲乞撫而詭譎反覆心
志叵測總因尙未大創之故穆圖善務當酌度機宜
勦撫兼施不得粉飾因循草率了事致貽後患儻偏
於主撫懈惰軍心或縱令回匪復行勾結生事則穆
圖善貽誤之罪斷難寬宥懍之慎之回匪孫義章何
時投誠保至副將何以擅出告示且擅稱總統忠義

等營名目著穆圖善詳細查明覆奏都興阿以撫局未定飭令各營及地方官於未經查明具奏以前不准回人擅自往來以杜勾結辦理甚屬認真穆圖善不可疏於防範漫無稽查致誤事機毛卜拉邊口尙有匪擾經都興阿派兵勦散現在河東花馬池定邊一帶後路均應嚴防穆圖善不得稍涉大意

二十九日己丑楊岳斌奏言接准甘肅提督曹克

忠咨稱所部抵鞏郡月餘將附近零星賊壘一律平毀十一月三十日派提督張在山帶兵扼紮鴛鴦觜地方十二月初三日黎明突有賊衆萬餘直撲營壘該提督飛請添兵一面整隊迎戰相持一日該逆未退曹克忠聞信帶領親兵力疾馳往督軍進剿十盪十決該逆雖敗抵死不
退曹克忠憤極卽率所部下馬各持刀矛衝

入賊隊諸軍齊奮其時開化右營河鎮左營業
由閒道斷賊後路逆衆驚潰我兵四面包抄殲
步賊一千數百人馬賊二百餘人餘賊帶傷棄
馬爬山而遁生擒馬玉林等二十七名大頭目
蕭阿渾一名悉數正法奪獲戰馬四百餘匹藍
翎儘先把總高貴元臨陣捐軀殊堪憫惻仰懇

大恩飭部從優議卹奏入得

旨覽奏均悉高貴元著從優議卹

楊岳斌又奏言金安一帶爲東路運道所經邇來時有梗阻臣近將駐紮金縣之楊明海四營分紮車道嶺二營甘草店一營並令駐紮安定之劉祥勝四營扼要控制以資守禦據楊明海稟稱酌帶騎隊巡至甘草店一帶探知有賊二千餘攻撲甘草店營壘營官余華龍竭力抵禦

中槍陣亡當令副將周保和代理安撫軍心是
夜該逆距營上下修造木卡二座當卽整隊轟
擊立將木卡燒燬該逆復出馬隊千餘兩面抄
襲哨官守備向連城陣亡勇丁傷亡四十餘名
旋派勇丁幫同堅守賊見防範益嚴悉數宵遁
左營營官都司杜葆蘭於初四日在小龕峪運
糧遇賊接仗因傷殞命又據劉祥勝稟稱十一

月三十日往勦李家堡賊匪乘勝追逐將至紅
土窰大隊回匪峰至勢不能支當卽敗入空堡
該逆改調賊衆將堡圍住屢次進撲均爲我軍
擊退黃昏時併力衝出繞從嶺上而回我軍傷
亡二百餘人營哨官亦均帶傷並遺失軍械等
語臣查金安一帶連日回逆攻撲營盤賊衆兵
單恐難抵禦當飭羅進賢兩營馳往協勦以通

糧路劉祥勝於李家堡之戰有損軍威應請

旨將該總兵卽行革職仍責令立功贖罪至記名總兵

余華龍守備向連城都司杜葆蘭或臨陣捐軀
或受傷殞命均堪憫惻仰懇

天恩飭部從優議卹以慰忠魂奏入得

旨劉祥勝著卽行革職仍責令立功贖罪總兵余華龍
等均著從優議卹

楊岳斌又奏言臣抵甘後原欲就現有兵力以圖進取自陶茂林軍潰於前雷正綰兵變於後不得已而有增兵之請乃鄰省援師無一至者而奉

准調甘之東南各軍又復不能應手現在平固河狄之賊擾於東南涼肅甯靈之賊擾於西北外察賊勢內度兵力實屬不敷分撥伏查記名提督朱

南桂記名按察使劉連捷勇略兼備現統兵在
江西瑞臨一帶相應請

旨飭調記名提督朱南桂記名按察使劉連捷卽率所
部星馳赴甘以資援剿再據提 臣曹克忠函稱
提督張在山帶領八營駐守鴛鴦埔現在新市
踞逆未殄南路運道難通賊衆兵單不敷分布
查有舊部明字四營現在楚省係記名提督藍

斯基歐陽春李玉麟魏元祿等四人管帶請奏
調來甘等語臣查曹克忠兵不滿萬兼顧各路
力實太單明字四營係其舊部恩義相維應請

旨飭下湖廣督

臣

官文湖北撫

臣

鄭敦謹催令記名提

督藍斯基等卽率所部星馳來甘援剿以資得
力其沿途口糧等項卽由湖北籌款從寬給發

奏入

上命軍機大臣傳諭劉坤一李瀚章曰楊岳斌奏甘省兵力不敷分撥請調朱南桂劉連捷迅統所部赴甘援剿等語前因李瀚章奏劉連捷等軍陸續裁撤現在甘省賊匪未平亟應添調勁兵以資援剿著劉坤一李瀚章查明朱南桂劉連捷兩軍是否已經裁撤抑仍在江境防堵卽飭該二員迅統所部星馳赴甘援剿毋稍延緩其沿途口糧一切費用並著江西湖

南兩省從寬籌撥俾利軍行

上又命軍機大臣傳諭官文鄭敦謹曰楊岳斌奏甘肅賊衆兵單不敷分布查有曹克忠舊部明字四營現在楚省請飭調赴甘協剿等語曹克忠一軍不及萬人若令兼顧各路實屬不敷調撥該四營係其舊部恩義相習防剿必能得力著官文鄭敦謹卽飭藍斯基歐陽春李玉麟魏元祿各率所部速赴甘省協同

剿匪其沿途口糧等項卽著官文鄭敦謹籌款給發
俾利軍行

楊岳斌又奏言甘省瘠苦向恃各省協濟無如
各省欠解纍纍而江南爲尤鉅近時各營月餉
全賴江南江蘇湖北浙江湖南所協十萬五千
之數業已積欠數月卽令撥定之款按月解到
不敷尙鉅而自臣抵任後僅解到二十餘萬若

再從中分撥萬難支持江南財賦之入勝甘倍
蕤前准部議江海關每月協甘銀二萬兩據李
鴻章咨每月僅解銀一萬兩將會國藩撥定三
萬兩之數奏請合併勻撥兩處軍需是減之又
減甘餉益形短少所有都興阿奏請在兩淮鹽
課項下月撥銀二萬兩臣擬請俟江省協餉到
陝時每月分撥銀六千兩由陝解赴甯夏軍營

其不敷銀一萬四千兩仍請

旨飭下署兩江督臣李鴻章另行籌撥徑解山西藩庫

轉解都興阿軍營並請

飭令護理江蘇撫臣劉卹膏查照部臣所議江海關每

月協甘餉銀二萬兩按月如數撥解臣營以濟

要需至前次江蘇解到協餉銀十二萬兩業已

支發罄盡無從籌撥奏入

上命軍機大臣傳諭李鴻章劉鄩膏曰楊岳斌所帶各軍需餉甚鉅雷正綰等軍約五十餘營而甯夏軍營尤爲甘肅要地現據楊岳斌奏稱各營月餉業已積欠數月卽令各款按月解到尙屬不敷分撥所奏自係實情江蘇財賦日充其情形迥非甘省之比所有鄩興阿前奏請在兩淮鹽課項下月撥銀二萬兩卽著李鴻章按月籌撥銀六千兩由陝解赴甯夏軍營

其不敷銀一萬四千兩仍著李鴻章設法籌措派員
徑解山西藩庫轉解甯夏軍營毋再延諉其江蘇江
海關每月協甘餉銀二萬兩日久未解該營支發罄
盡無款可籌並著劉鄒膏查照部議按月如數撥解
楊岳斌軍營以應要需毋得藉詞推延致誤戎事

楊岳斌又奏言甘肅滿緣各營歲需兵餉馬乾
及文武廉俸公費驛站夫馬工料站價等以及

新疆各城豫調經費銀兩例應先期一年分造
估冊咨送戶部於各省指撥解甘以備支放茲
據藩司林之望詳稱各屬乙丑年應造丙寅年
估冊因逆回煽亂地方文武日辦防勦兼以驛
路梗阻各路應造估冊年終尙未造齊送司其
新疆各城公文亦因哈密迤西道阻多未遞到
無從覈造清冊餉需緊要自應變通辦理查丙

寅年係無閏之年應請咨明戶部按照同治二
年歲需估册請撥銀二百六十二萬三千六百
餘兩在於應撥省分指撥解甘一俟各屬估册
到齊卽由司趕造總册補行送部如奉撥銀數
有餘卽留抵下年兵餉儻有不敷另請補撥以
符定制至甘省丙寅年兵餉前經戶部奏撥河
南山東江蘇江西等省地丁銀八十萬兩至今

未據報解現在甘省滿綠各營兵餉連年拖欠
口內外軍營盼餉尤切並請由部飭催趕解等
語除咨明戶部外請

旨飭部覈辦施行奏入得

旨戶部知道現在甘餉異常緊要著卽咨催應撥省分
趕緊照數撥解毋任延宕

楊岳斌又奏言據莊浪協副將張琮稟稱東路

回匪數千竄至岔口攻陷堡城次日賊退查明
千總尤誥外委馬萬鵬均已陣亡署額外外委
張存德受傷甚重都司關防遺失又據甘州府
知府崇福等稟稱東樂城垣被賊攻陷縣丞郭
毓才不知下落等語 臣查東樂距山丹甚近實
爲該邑藩籬雖有黎獻督師在郡而東樂踞賊
亟須殄除 臣已咨催成祿星馳赴甘與黎獻合

軍會勦卽行掃蕩至平番所屬之岔口營賊匪
雖未屯踞猶在近鄉擾害古浪之大靖土門一
帶蟻聚尤衆臣因檄令駐紮紅堡之王仁和李
雲祥二營會同營兵民練相機截擊毋令竄逸
其陣亡之千總尤誥外委馬萬鵬請

旨飭部照例議卹以慰忠魂奏入得

旨縣丞郭毓才有無下落及兵民殉難情形著卽查明

具奏一面咨催成祿黎獻等軍迅速將此股匪黨悉
數撲滅以便西征陣亡千總尤誥外委馬萬鵬均照
例議卹

楊岳斌又奏言甘肅回股林立通省沸騰臣抵
任數月適值軍政墮壞跬步之間動形牽掣雖
兩次出省終以外無接濟內無主持未敢久離
重地第念軍情瞬變未可坐困若不躬親督勦

終難挫賊勢而振軍心因檄調川北鎮鶴齡帶
所部一千餘衆到省駐紮並令藩司林之望署
督標中協提督羅宏裕等嚴密防守布置既定
臣准於本年正月初十日出省取道鞏昌與提
臣曹克忠面商機要次至涇州查勘從前收集
各營一俟部署稍周軍糧稍集卽行調齊兵力
相機勦辦奏入得

旨前有旨令趙長齡前赴慶涇一帶查辦事件該督現亦出省赴涇所有前此諭令會同查辦各件正可與趙長齡妥商辦理雷正綰是否可恃如何布置並著隨時察看密奏譚玉龍等軍糧餉亟須設法接濟慶陽糧臺已改派林壽圖是否可撤仍著會商劉蓉辦理

三十日

庚寅

穆圖善奏言伏查甯郡城池回據兩

年之久民居完整積儲甚多城外布置壕壘亦極嚴密該回如有詭謀豈肯繳械獻城自縛乞降十二月十五日之役該回如有埋伏亦必羣起抗拒又豈肯驚竄號泣閉戶自焚此等情形諒蒙

聖鑒惟我軍旣已殺降失此大信深恐該回猜疑滋變且甯郡城大地平四通八達極難守禦即使該

回依舊乞降亦須重兵彈壓方保萬全都興阿
因病具摺請假應辦事宜咨令 臣酌覈辦理嗣
又接都興阿函稱十五日之事實係冒昧孟浪
已經據實入告白請嚴議現在神思更形委頓
等語比至本年正月初四日 臣親往看視該營
巡捕官傳述都興阿之言云不能下牀見客亦
不能管理營務 臣因卽回營詎初八日據東路

探報都興阿所部副都統杜嘎爾帶領黑龍江
頭起馬隊撤赴定邊 臣聞信甚爲駭異杜嘎爾
因何帶兵赴定未據都興阿知會及該副都統
報明況定邊花馬池等處所駐馬步足資防勦
如有警報亦當通知何得率行撤往杜嘎爾係
甯夏副都統更不應擅離職守且恐一軍撤退
各營兵勇鹽糧欠缺久役思歸勢必同時渙散

都興阿調度乖方杜嘎爾輕率無識似此挾私
妄作必致貽誤大局應請

旨嚴飭都興阿各軍以及辦事各員毋許藉詞移動俟
地方一律肅清再行酌量撤遣

穆圖善又奏言接據都興阿咨稱前接後路營
務處鈔呈告示一紙閱其前銜係統帶忠義等
營專辦招撫事宜副將孫義章所出當以孫義

章究係何營副將招撫事宜係何人所委事涉
曖昧因檄飭後路各統將一體嚴防花城直隸
官兵因奉

諭旨飭令酌量抽撤是以檄令杜嘎爾先行督帶頭起
馬隊前往駐守係有檄派明文何得謂其率爾
遷移等因咨覆前來 臣接閱之下萬分焦急查
都興阿所稱接奉

諭旨飭令酌量遣撤花城直隸官兵一節 臣 毫未聞知

尤深詫異都興阿既奉

諭旨自當鈔錄行知乃事隔多日始於咨內敘及恐以

前欽奉寄

諭未經行知者尙多是否都興阿有意延擱仰係該營

委員朦混積壓懇請

嚴飭都興阿確查據實陳明並將因何不遵

旨行知臣營之處明白回奏以警專擅而杜欺隱

穆圖善又奏言正月初七日甯夏道三壽由中

衛軍次來營臣責成該道回甯辦理善後安撫

事宜旋據該道稟稱甯夏連年兵燹生靈塗炭
若不速修渠道招民歸業早事春耕則夏秋顆
粒不收兵糈民食無所取資斷難望有起色惟
渠工牛種等項籌措非易且一切設官置兵賑

濟遺黎皆屬刻不容緩仰懇

天恩飭下山西撫臣迅速籌撥銀十萬兩限一月內趕

緊委員分批解甯以濟急需奏入

上命軍機大臣傳諭都興阿穆圖善曰甯夏回人雖已
投誠然必須重兵彈壓方可資鎮攝而免疏虞都興
阿何以不與穆圖善和衷商榷將杜嘎爾所帶馬
隊撤赴定邊殊不可解現在都興阿已調補盛京將

軍疊經降旨催令赴任所有甯夏軍營馬步各隊均
令穆圖善督率調遣卽著都興阿懷遵前旨迅速啟
程前赴盛京將軍新任不准稍涉遲延杜嘎爾木係
甯夏副都統職守所關豈可調赴他處仍著飭回甯
郡聽候穆圖善調遣其餘各軍一併交穆圖善分別
布置都興阿不得有意爲難致誤大局都興阿於兵
勇入城抄掠旣未能彈壓禁止且將杜嘎爾馬隊率

行飭赴定邊辦理甚屬非是該將軍已調任盛京穆
圖善責無旁貸卽著懷遵疊次諭旨將剿撫機宜及
一切善後各事妥籌辦理儻偏於主撫爲賊所愚而
以都興阿辦理不善爲誘過地步必惟穆圖善是問
前據都興阿奏營務處鈔呈告示閱其前銜係統帶
忠勇等營副將孫義章所出事涉無稽當經諭令穆
圖善查明覆奏此次穆圖善片內但將都興阿查詢

孫義章原文敘入而於孫義章銜名原委並未聲敘
明晰殊屬含混著仍遵前旨查明具奏不准一字徇
隱至所稱上年十二月初五日寄諭事隔多日都興
阿始於咨文內敘及恐以前延擱者尙多請飭查明
等語著都興阿確切查明因何知照遲延及從前有
無擱壓之處迅速明白覆奏毋許迴護

上又命軍機大臣傳諭王榕吉曰穆圖善奏甯夏府城

興修渠道招民歸業早事春耕惟渠工牛糧籽種並
一切設官安兵賑濟難民等項需款浩繁請飭山西
就近撥銀十萬兩迅解甯夏以濟急需各等情該府
甫經收復籌辦善後事宜需項甚殷卽著王椿吉迅
速籌撥銀十萬兩限一箇月內趕緊委員分批解交
甯夏府城毋稍延緩

欽定平定陝甘新疆回匪方略卷一百二十七 丙寅年

二月初一日 辛卯

上命軍機大臣傳諭官文曾國藩左宗棠李鴻章馬新
貽劉坤一李瀚章曰甘省甯夏雖經收復而回匪到
處肆擾靈固及秦涼狄河等處盤踞勾結其勢甚熾
楊岳斌所部兵勇頗單不敷防剿之用現在江閩各
軍除應撥鄂豫江皖助剿外尙餘若干名可以調赴

甘省軍營將領中何人可以派令帶往總以精銳得力爲主此時江閩粵東軍務已平浙江江西湖南亦應撤防自可將各該省餉項移作甘肅軍需之用嗣後江西浙江湖南每月可協濟甘省餉銀若干兩江蘇省能否於現協甘省月餉外再行籌添若干兩均著官文曾國藩左宗棠李鴻章劉坤一馬新貽李瀚章妥籌速奏從前南省勇丁以甘肅地方瘠苦多不

願往此時若將調赴甘省勇丁酌增餉銀若干或再將員弁勇丁之從征西路者變通章程從優保舉當可樂於從事益加奮勉曾國藩左宗棠李鴻章識見素優此舉是否可行卽著詳晰奏聞儻南勇以水土異宜難於調赴甘省此外如有嘉謨碩畫可以統顧全局者亦當各抒所見以期謀出萬全早蕝軍事有厚望焉

初五日 乙未 都興阿奏言 臣 欽遵

諭旨通飭馬步各營及一切應交案卷均移歸穆圖善
接辦伏查奉省馬賊猖獗亟需得力馬隊防剿
現在所部馬隊杜嘎爾原統四起西們克西克
統帶二起楊州續到二起穆圖善所部金順統
帶兩起共爲十起擬抽帶四起前往於此閒軍
事尙無窒礙現與穆圖善商酌如能允許卽仍

令杜嘎爾統帶馳往山海關一帶駐紮杜嘎爾
諳練戎機惟不甚通達漢語地方旗務情形尙
未熟習如令遽回甯夏副都統本任實未相宜
惟有仰懇

天恩准其隨臣帶隊俾資得力出自

逾格鴻施臣現俟部署就緒卽行迅速起程馳赴新任

同日穆圖善奏言臣查甯郡回衆從前據城戕

官罪在不赦然倡謀滋變不過爲首數人上年
十二月十五日以來倡謀回弁納萬有等數人
均已駢誅及都興阿親軍馬隊入城大肆殺掠
臣深慮納中開一帶回衆或因我軍殺降疑懼
生變而連日偵探幸尙無動靜各營統領先因
都興阿撥發糧餉厚於馬隊薄於步隊已心怨
其不公今藉此事辦理失當又皆歸怨都興阿

議論紛紛 臣目擊情形萬分焦急因與甯夏道
三壽悉心籌酌令該道派署興武營都司馬兆
瑞持諭前往納中開一帶查看安撫並嚴禁該
回等猜疑滋事旋據納中開回民公具稟詞遣
回紳馬籌馬忠彥等詣營伏地痛哭叩頭乞命
堅稱情願投誠卽官軍進剿惟有跪受兵刃等
語向來都與阿奏事無不與 臣會銜此次奏報

收復甯夏府城一摺並未與臣會銜及鈔錄奏
稿行知亦未敘明何日繕遞不知是何意見刻
下甯郡回衆仍懇投誠究竟應勦應撫事關大
局都興阿又稱病請假擬請

欽派大臣接統各軍詳查情形據實覆奏

穆圖善又奏言准都興阿移咨欽奉

上諭都興阿調補盛京將軍其甘肅軍務卽令穆圖善

督辦 臣 跪聆之下感悚無地所有都興阿原帶各軍
歸 臣 統轄當已移咨都興阿懷遵

諭旨不得抽帶甘肅甯夏道三壽忠勤廉正才智素優
所有軍務糧餉摺奏文案擬令該道就近助 臣
籌辦又西安左翼副都統金順人甚剛直曉暢
戎機擬令充當翼長統帶英禮等營總兵胡世
英調度有方勇敢善戰如蒙

天恩簡授實任提鎮實於全省軍務有益均奏入

上諭內閣曰前據都興阿穆圖善先後奏稱甯夏回衆投誠郡城業經收復並據穆圖善奏稱該回衆於上年十二月初二日將城池圩卡全行撤空各堡回人俱移往納中間一帶繳出槍礮等件將倡亂之逆首納萬有送營正法官軍入城駐紮乃都興阿復將回日保立等誅戮兵勇乘機肆行搶殺當以情節參差

未卽查辦茲復據穆圖善奏該處回衆實係真心悔
罪投誠後頗能安靜接據都興阿信函亦自認冒昧
孟浪等語都興阿督辦軍務於勦撫機宜毫無定見
且於兵勇入城肆掠未能禁止致與穆圖善辦理兩
歧實屬錯誤著交部議處至回衆據城抗官固爲國
法所必誅惟朝廷以好生爲心其中果有被脅勉從
真心悔罪者自應寬其既往概予保全前經諭令統

兵大臣但分良莠不分漢回諄諄告誡至再至三此
次都興阿辦理不善業經加以懲處所有甯夏投誠
回民卽著穆圖善妥籌安撫俾得各安生業復爲良
民此外各處回衆如有能捆獻首逆誠心反正者亦
准一體免其前罪妥爲安插用示朝廷覆幬無私至
意

上命軍機大臣傳諭都興阿穆圖善曰都興阿前已調

補盛京將軍現在吉林奉天防勦正形喫緊該將軍務當趕緊起程就近來京陛見後卽行馳赴新任辦理軍務毋得稍涉遷延杜嘎爾帶隊旣能得力著准其隨同都興阿前往奉天本日已明降諭旨將杜嘎爾開缺所遺甯夏副都統一缺卽令金順補授矣奉天軍營本有吉林黑龍江馬隊杜嘎爾到彼自可交令管帶甯夏軍情尙未大定靈固等處勦辦回匪在

在需兵都興阿所請抽帶甯夏軍營四起馬隊赴奉之處著毋庸議都興阿辦理失當本日已明降諭旨將該將軍交部議處並將朝廷辦理此事但分良莠不分漢回及准令被脅回衆悔罪投誠之意明白宣示穆圖善接奉此旨後卽著剴切宣諭以安投誠回衆之心納中間回民前在甯夏城中被官兵殺掠現復赴穆圖善軍營懇請投誠情詞哀切出於至誠著

穆圖善妥爲安插毋令失所都興阿交卸起程後穆
圖善於甯夏軍營事務責無旁貸該處漢回人心尙
未大定自應妥籌綏輯並須留意隄防不可稍涉疏
忽俟甯夏善後事宜辦有頭緒再行進圖靈州至回
衆投誠時務當責令將戕官據城首要兇犯捆獻正
法并將軍械馬匹交出其脅從回衆酌量情形果係
真心悔罪方准受降不可輕率漫無區別致爲奸回

所給懷之慎之甯夏將軍本任事務卽著穆圖善趕
緊接辦胡世英俟有總兵缺出再行酌量簡放駐紮
花馬池之直隸官兵二千名著都興阿穆圖善酌量
情形能否回直歸伍之處妥籌辦理

初六日丙申署陝西布政使林壽圖奏言比見悍

將跋扈羣醜狡獪隨同撫臣劉蓉悉心規畫竊
謂必合兩省之力庶議防議勦畛域無分必居

四達之途庶籌械籌糧轉輸不竭陝屬邠鄜廷
榆鳳漢皆與甘相接距省匪遙故形勢利便莫
如西安臣在省督辦轉運凡糧餉軍火器械皆
視甘之所急於陝省通其有無前此臬司楊能
格或碾動倉糧或捐收折色亦取給於陝者多
而慶陽僻處偏隅運解艱苦諸形不便前督臣
熙麟赴甘時值賊氛阻塞蘭垣不能遽達雷正

三定學前書卷之二十一
力

綰等軍均在甘陝之交因而駐節慶陽設立糧
臺就近支應蓋亦時勢使然文煜楊能格沿而
未改皆祇顧東路不能控扼全局也 臣已稟請

撫 臣 委員接署藩篆以便交替馳赴慶陽惟糧
餉轉運恃西安爲後路藉輔慶陽所不及應由

撫 臣 督飭署藩司通籌妥辦使 臣 不致跼蹐偏
隅庶得勉竭涓埃徐圖報稱

林壽圖又奏言陝省距甘較遠聞雷正綰固原
三營自陸續潰敗後僅存百餘人而該提督來
咨乃有十六營之說多寡相懸刻下營數涇防

最多情形亦最緊臣接據譚玉龍函稱詢悉固

原逆回聚衆數萬將由新城奄至鎮原繞出涇
州窺伺陝疆官兵月餘未獲一飽恐難枵腹荷
戈等語又據秦國勝飛函馳告正月上元夜全

軍飢餒幾潰極力拊循始稍安戢懇請撥款等

語經 臣 稟知撫 臣 籌發大小槍四百五十桿火

藥一萬斤及火繩藥葫蘆等件解往分撥並於

未得涇信之先分派幹員赴鳳邠乾勸捐糧石

先將長武倉豆四千五百石醴泉捐麥五百石

三水倉麥一千石飛飭碾運第一時救急之謀

非久長慮後之策前准督 臣 楊岳斌牘告臘盡

春來將謀大舉諄託辦糧情詞急切臣與撫臣
劉蓉計議現在甘軍諸道並舉陝省糧餉亦宜
分路並籌擬於西安設立總局招徠西同蒲絳
米販廣聚雜糧由臣籌款董司其事正在計畫
適奉辦理慶臺

恩命僻處偏隅未得通籌全局此臣另疏所以將轉輸
後路望之西安也糧爲軍士養命之源目前涇

防飢潰事在旦夕卽慶軍雷部亦恐乘機生變
其患有不堪設想者所有慶陽協餉請

旨迅催四川山東河南山西督撫各飭藩司無論何款

湊撥銀十萬兩卽日起解慶陽地勢偏僻各省

委員視爲畏途應令解赴陝西藩庫收存由 臣

派員迎提較爲妥速 臣復查前經撫 臣趙長齡

劉蓉會奏自五年正月爲始四川山西各派解

二萬兩解交陝省代甘設局於漢中鳳翔兩處
採買軍糧茲據山西解到銀一萬兩臣不日交
替赴慶資陝爲助懇

恩並飭按月如數批解勿得減少延緩

林壽圖又奏言臣奉

諭旨准其專摺奏事

聖恩優厚感激莫名惟臣昔見賊擾江北時琦善陳金

三原縣志卷之三十一 三
綬德興阿雷以誠等同辦一賊每遇奏報軍情
異詞各執迄無成功迨後統帥任之督撫吳楚
閩越以次肅清夫權分則輕權專則重傾軋之
勢起則是非之實淆藉奏事之名恣攬權之意
墮臣節而誤

國事盜賊何由而平現在甘省用兵奏事過多軍
政各山綜糧臺者亦以統率自命乃至凌轢督

撫指使提鎮莫敢誰何似宜循體制以尊

朝廷不當侈虛名以撓職守臣誠不敢忝竊非分致

蹈愆尤嗣後各事擬仍由督撫代奏以一事權

同日楊能格奏言臣上年秋閒因甘省軍糧缺

乏奏奉

諭旨飭陝西撫臣撥運甘泉膚施二縣倉糧二萬石旋

准該撫咨令慶陽糧臺自備運腳往運經臣委

員前往查看該二縣不通車道覈計運費須數
萬金糧臺無此鉅款是以至今未往運取現在
甘省匱乏十倍上年彫弊情形不堪殫述前次
督臣楊岳斌奏請陝省飭撥倉糧四萬石並屢
奉

諭旨飭令陝省協濟銀糧勸捐接濟該省並未認真運
解臣屢次委員分赴陝省勸捐而該地方忽視

糧臺札文往往以地方窮苦一稟了事撫臣亦
卽據稟咨覆查陝省漢回構釁以致蔓延甘省
徧地賊氛現在甘軍如此飢乏設或因飢而潰
該匪復行回竄陝省亦豈能無事且國家設立
常平社倉等原備饑饉及軍旅之用陝省元氣
漸復儲待已充其於都營穆營每月閒有接濟
而於慶陽向無解款查慶涇與陝疆最爲密邇

豈容膜視惟有仰懇

天恩迅飭陝西撫臣劉蓉每月飭撥各屬倉糧四千石

趕緊分運慶涇兩處每月籌撥銀二萬兩解至

慶臺協濟運腳轉運鎮原平固各前敵以資進

勦一俟甘省捐輸辦有成效各省協餉應手臣

卽當自行設法辦理採買以資接濟均奏入

上命軍機大臣傳諭楊岳斌劉蓉林壽圖楊能格曰林

壽圖奏雷正綰固原三營陸續潰敗僅存百餘人該
提督咨文乃有十六營之語多寡相懸該提督之咨
固不足信卽秦國勝等之函亦恐有傳聞之誤仍著
楊岳斌劉蓉確切查明以昭覈實據稱固原回逆將
由新城奄至鎮原窺伺陝疆等語不可不豫爲之防
楊岳斌現已出省卽著督飭所部相機前進遇賊卽
擊毋令闖入陝疆並著劉蓉嚴飭防軍認真堵剿勿

得稍有疏懈林壽圖擬俟交卸藩篆後馳赴慶陽查
該糧臺前經劉蓉奏請裁撤當交楊岳斌等酌度情
形具奏該糧臺是否可以裁撤歸併西安省城能否
兼顧仍著該督會商劉蓉奏明辦理至林壽圖奏嗣
後擬請督撫代爲具疏以一事權等語所見亦是卽
著照所請行楊能格奏糧餉兩竭請飭陝西撫臣飭
屬按月運解倉糧並籌撥腳費銀兩等語著劉蓉妥

籌辦理

上又命軍機大臣傳諭崇實駱秉章閻敬銘吳昌壽丁
寶楨王榕吉曰甘肅餉需奇窘各軍因飢潰變者不
一而足現在固原回逆勢甚鷓張屢圖分竄楊岳斌
擬於春閒分道並舉而各營餉糈匱乏枵腹從事岌
岌堪虞四川等省協餉前經屢次飭催而撥解寥寥
何以固軍心而維大局著崇實駱秉章閻敬銘吳昌

壽丁寶楨王榕吉各飭藩司無論何款迅速湊撥銀
十萬兩並著王榕吉於河東鹽課項下速提銀十萬
兩卽日派委妥員解交陝西藩庫由林壽圖妥籌解
濟以應急需其四川山西兩省自本年正月爲始每
月各解銀二萬兩交陝設局爲採辦甘省軍糧之用
並著該督撫等源源協濟俾資飽騰

初七日

丁酉明緒奏言邊外行軍馬匹最要自錫

伯索倫兩營馬隊馳回後各營皆苦無馬又值
內附之哈薩克悉數叛亂購買無從目前軍情
危急萬分非得騎兵不能制勝查烏里雅蘇台
各部落蒙兵平日受

國深恩有事自當圖報乃自去歲軍興以來經革
任將軍常清屢次奏調而明誼藉詞苦累任催
罔應因憶明誼前與臣會辦分界事宜時由烏

至塔往返多次其按站所用烏拉馬匹每次不下數百匹均極臃壯若蒙古果係苦累該將軍何以驅策裕如應請

旨飭下明誼迅速挑派蒙古馬隊六千員名取道塔城親來援救儻官兵不能如數派撥務令備辦騾馬三千匹專派練達敏捷之員趕解伊犁交納如該官員等行走迅速馬匹臃壯足數 臣再當

奏請

恩施應發馬價卽由解到餉銀內坐扣以清款目蓋烏
科二城形勢與伊犁唇齒相依明誼如果不分
畛域率隊進援助剿鄰封卽所以屏蔽本境於
西陲大局實有裨益又伊犁防剿喫緊凡帶隊
守城製械轉餉各事均須專派大員而數年以
來內地換班調缺文武各官以及各省成員迄

無報到之人官缺虛懸無員派署茲查有甘肅
布政使恩麟現署蘭州道崇保熟習口外情形
已革兵部尙書穆蔭精通滿蒙文語已革總督
文煜久經行陣曉暢戎機以上四員請

旨飭令迅赴伊犁俾臣得收臂助和闐辦事大臣奎章
及因案遣戍之長庚瑛榮王履謙日久遷延不
至應請

旨一併飭部行知各省催令趕緊馳赴伊犁以杜巧避
而重軍務

明緒又奏言伊犁軍民飢困日久援兵不來岌
岌孤城危在旦夕兼旬以來天氣驟寒軍民飢
凍而斃者難以數計回匪於城外四面攻擊復
於霍爾果斯購糧要路糾集哈薩克數千人四
出攔截西五城聲息難通卽一二負販小民皆

被截殺城外東面大營祇步隊照舊防守兼顧
北面尙可勉強撐持西南兩面無兵駐紮全賴
城上槍礮轟擊稍壯聲威兵勇枵腹荷戈往往
凍餒而斃城內二萬數千口待哺嗷嗷不可終
日積屍枕藉舉目悽然揆度局勢萬難久支援
兵毫無消息軍餉未到分釐城內外數萬生靈
轉瞬將成餓殍至四愛曼官兵爲數尙多平日

粗暴梗頑均難繩以禮法其察哈爾官兵屢調不應反遷居與該回相近日加親密錫伯索倫兩營官兵向係自耕自食馬匹亦係自備歷年軍餉未給分毫臣辦理軍務以來始稍籌給鹽糧之費而該匪蓄意甚深設謀甚狡知錫伯索倫兵丁勇悍始則擾其牛豕使之回顧室家繼則以銀幣馬糧厚加結納錫伯各營果被煽誘

而去惟索倫營東左翼向稱爲老索倫者不過
二三百人賦性鯁直未被煽惑仍在該營駐守
未動而西右翼之索倫亦受該回銀馬互相勾

結不聽調遣 臣派員設法購馬二百五十匹行

至中途俱被截奪從逆背恩令人髮指現在局
勢危急相與固守者僅滿營綠營及民遣各勇
寥寥無幾飢餒不堪 臣前飭布爾和德檄調霍

伯克賽里土爾扈特官兵由塔城來援乃甫經
起程誤聽謠言仍復散歸游牧糧盡援絕憂憊
徒深臣現惟激勵文武堅忍苦守設法羈縻四
愛曼以免內變可否請

旨特簡久歷行陣大員授爲

欽差大臣統帶勁旅廣籌糧餉由北路草地馳赴伊犁
大彰撻伐西陲萬里或可次第克復轉危爲安

現在伊犁大城以外四面皆賊索倫所駐爲咽喉要隘所有文報均被梗阻此摺係 臣派員藏入衣襟乘夜暗赴該營以利雇覓該兵引導始得繞道呈遞合併陳明奏入

上命軍機大臣傳諭明誼曰伊犁情形危急日甚一日著明誼卽行挑派蒙古馬隊官兵六千員名由該將軍親帶取道塔城迅赴伊犁救援儻官兵不能如數

派撥務將騶馬認真備辦三千匹專派練達敏捷之官兵趕緊護解伊犁以顧急需必須解至伊犁大城交明後方准銷差烏科二城與伊犁唇齒相依明證務當妥籌應援如所需口糧不敷卽著一面調派一面奏聞不得藉詞推諉致干咎戾

上命軍機大臣傳諭楊岳斌曰前因伊犁軍情危急疊經諭令成祿等迅速出關援剿現在回匪於伊犁城

外四面環攻該城東北兩面尙可勉強支持而西南
兩路空虛無兵可以分撥萬難久支亟應添兵援救
以解倒懸著楊岳斌嚴催成祿鶴齡懍遵疊次諭旨
各率所部趕緊出關兼程前進協同勦洗速解伊犁
之圍經此次諭知之後儻成祿鶴齡仍前玩泄再行
託故遷延必治以貽誤之罪和闐辦事大臣奎章簡
放已久迄今尙未到任著楊岳斌嚴催該員迅赴新

任毋再遲延干咎

--	--	--	--	--	--	--	--	--	--

卷之四十一

四十一

欽定平定陝甘新疆回匪方略卷一百二十八 丙寅年

二月初九日 己亥

上命軍機大臣傳諭明誼麟興車林敦多布廣鳳奎昌
閣敬銘吳昌壽丁寶楨王榕吉曰新疆回匪變亂以
來西路各城聞風四起到處蔓延伊犁被困岌岌可
危設該匪乘勢竄突則北路極形喫重塔爾巴哈台
及烏科兩城所設額兵軍火不齊操防久已廢弛又

兼糧餉缺乏殊難枵腹荷戈前經戶部奏催同治五年分新疆南北兩路經費當經降旨令山西山東河南等省照數撥解現在北路防務喫緊待用孔殷著閻敬銘吳昌壽王榕吉丁寶楨懍遵前旨迅速籌解不得稍事遲延現在明緒因事機緊迫請調烏里雅蘇台蒙古官兵六千員名一應軍火尤須早爲籌備山西距該城較近著王榕吉趕辦火槍戰箭並一切

火藥鉛丸等件運交綏遠城由綏遠城從北路草地
解至烏里雅蘇台交明誼等接收撥給蒙古官兵迅
速起程赴援伊犁烏里雅蘇台爲北路咽喉明誼等
身膺專城責任綦重科布多塔爾巴哈台均係北路
扼要之區需餉均甚緊要一俟餉銀陸續解到卽由
明誼等酌定數目分給各城一面知照該大臣等迅
速迎提應用該大臣等務各督飭兵丁日夜訓練俾

成勁旅以備緩急儻泄沓不知振作致兵丁仍前疲
弱貽誤事機必將該將軍大臣等重治其罪懷之

同日廣鳳奎昌奏言欽奉

諭旨烏梁海臺站趕緊安設並將餉銀等項迅解塔城
查科布多原設臺站至今並未裁撤烏里雅蘇
台解到塔城餉銀因回匪變亂哈薩克助回爲
逆若遽令由科起解經過哈薩克境恐有疏虞

是以暫存科布多前奉

諭旨將此項餉銀迅速派兵護送可否仍俟武隆額派員前來迎提抑或派員護送恭候

訓示遵行武隆額咨調戰箭鉛丸實因科城原存軍火無幾僅敷操演之用無從撥給其借撥小麥五千石實因購運維艱未經撥解今奉

諭旨自應欽遵辦理惟駝運必須用駝五千餘隻儻各

臺無力供應必致辦理掣肘擬先知照前途各
臺之專管將軍大臣等豫將此項駝隻籌備俟
稍有端倪臣等卽趕緊派員前赴歸化城一帶
設法採買不致臨期有誤奏入得

旨知道了所需駝隻著卽知照前途各臺專管將軍大
臣等如數籌備一面趕緊派員採買麥石無誤要需
嗣後伊塔等城餉銀運解到科仍著設法源源解濟

毋稍遲緩

十三日癸卯穆圖善奏言查甘省自甯夏淪陷後

賊勢猖獗臣與都興阿帶兵渡河賊匪負嵎抗

拒迨官軍屢次獲勝大加斬馘該回始畏威乞

降又因上年十二月甯郡回衆獻城經都興阿

帶兵入城焚殺回民慘遭屠戮無不心懷疑懼

難保不猜忌反覆以致辦理掣肘現在納中聞

回民仍復具稟投誠靈州金積堡回目馬化澂亦曾兩次具稟求撫雖真僞難知但未便絕其自新之路致令回民間風側足再釀巨患刻下甯郡回衆雖已就撫事局尙未大定所有後路花馬池一帶毗連陝境仍須加意嚴防並探聞蘭州省城因陝回大股竄至秦王川水北河一帶肆行焚掠以致人心驚惶肅州踞匪官軍進

勦失利河狄西甯勦撫尙無定局平固鹽茶自
雷正綰營勇潰散後賊勢益形猖獗 臣愚以爲
甘省軍務宜先甯靈而後河狄甘涼肅等處先
內地而後新疆各城果甯靈早就救安則山陝
百貨疏通糧運無阻然後移師邁進專力河西
勦撫兼施不難傳檄而定雷正綰一軍現奉

諭旨令其來甯助勦查甯郡現已收復 臣所部兵勇就

近鎮撫已足以備不虞而陝回大股擾近省城
且恐分竄甘涼等處與肅州賊匪勾結亟須撥
兵追剿應請

飭下楊岳斌商令雷正綰將近省陝回節節掃蕩毋任
竄越並請

旨責成成祿一軍迅速前進剿辦肅州踞匪俟肅城克
復再行統兵出關責成曹克忠一軍趕緊剿辦

鞏昌等處股匪俟省南安堵如常再移師平固
一帶與涇州各營犄角夾擊庶無延誤奏入

上命軍機大臣傳諭穆圖善穆岳斌曰納中閘回民具
稟投誠靈州金積堡回目馬化澂亦曾兩次具稟求
撫真偽尙未可定卽著穆圖善懷遵疊次諭旨妥爲
籌辦務令將首要各犯設法縛獻方准投誠斷不可
專意主撫致爲奸回所紿現在甯靈尙未大定甘肅

近省之秦王川水北河一帶肅甘涼等州郡均有匪蹤肆擾該將軍所稱甘省軍務宜先甯靈而後河狄先內地而後新疆自係一定辦法穆圖善務當將甯夏善後事宜妥爲辦理並將靈州回匪迅速辦竣再圖移師進剿雷正綰前經諭令馳赴甯夏軍營茲據穆圖善奏稱甯郡各部兵勇已足鎮撫請飭雷正綰勦辦甘肅近省回匪免致勾結爲患等語卽著穆圖

善與楊岳斌體察情形斟酌辦理新疆需兵緊要成
祿一軍著楊岳斌仍遵前旨催令出關穆圖善奏責
成曹克忠勤辦鞏昌股匪俟省南安堵再行移師平
固一節現在鞏昌業已解圍著咨商場岳斌妥籌調
派楊岳斌現已出省赴涇務當督飭各軍將各路回
氛次第掃蕩以期肅清關內毋稍延緩都興阿辦理
甯夏軍務勦撫兩歧前已降旨將該將軍交部議處

諭令都興阿將馬隊四營仍留甯夏並將杜嘎爾開
缺諭令隨同都興阿前赴奉天甯夏副都統已著金
順補授卽著穆圖善將馬隊四營妥爲調派甯夏一
切事宜俟金順到任後會商妥辦

十四日

甲辰

上命軍機大臣傳諭明緒明誼曰前據明緒奏伊犁軍
務危急請派員帶兵會剿暨調撥蒙古馬匹已諭令

明誼親帶馬隊官兵六千名赴伊救援並將騶馬備
辦三千匹護解伊犁著明誼懍遵前旨迅速帶兵起
行其業經解到之伊犁餉銀並著一同護解以期聲
威漸振守城兵士不至枵腹荷戈該將軍總當以大
局爲重不得稍分畛域觀望遷延致滋貽誤關內成
祿等軍已諭令星夜出關赴伊會剿儻再徘徊不進
卽著明緒指名嚴叅從重治罪明緒當兵單餉缺之

時禦四面環攻之寇竟能衆志成城堅忍苦守忠悃
可嘉明誼援兵未到以前該將軍仍當拊循飢卒激
勵士心以冀力拯危局

十七日

丁未

穆圖善奏言甯郡回衆於上年十二

月初二日獻城並呈繳軍械初七日官兵收復
府城事局大定不意十五日都興阿率同總兵
陳天佑帶隊入城聲言回人暗藏軍械埋伏戰

手授意所部令其揆殺居民盡遭蹂躪漢回死者不計其數致令已成之局又生他變今奉

諭旨飭查爲首滋事之人

臣

查該總兵奉都興阿軍令

入城焚掠實爲滋事之由幸賴提督黃金山等竭力彈壓將陳天佑驅逐出城人心稍定都興阿自知措施乖謬人心不服十七日卽奏報收復一面請假兩月自稱病勢加增及奉到調任

盛京將軍

恩旨未十日遂由大營起程此等情形難逃

聖鑒刻下甯郡回目馬萬選赫壯圖均來營謁見俯首

投誠馬化澂亦不日來營謁見乞恩臣查該回

目等情詞雖甚懇切但恐其黨類中獷悍滋事

者尙多所有納中間等處回衆仍須設法稽查

安插斷不敢稍涉遷就貽害地方都興阿所募

勇丁現俱歸併臣營並未帶往陳天佑託病離營不知去向俟查明再行叅辦該總兵所帶東治兩營現已改派總兵鄭啟貴接統臣智略短絀不勝督辦之任仰懇

聖恩另簡大臣來甘督辦軍務並將此案確查覆奏奏
入

上命軍機大臣傳諭穆圖善曰甯靈回衆獻城之後陳

天佑帶隊進城肆行焚殺殊屬大干軍律陳天佑現
經在逃著趕緊查拏嚴行究辦該將軍有督辦軍務
之責卽當秉公查訊以期水落石出務須情真罪當
以服衆心正無庸另派大員來甯查辦陳天佑所帶
東治兩營旣經改派鄭啟貴接統卽著飭令該總兵
將所部兵勇妥爲管束以專責成回目馬萬選赫壯
圖馬化澁投誠乞恩該回目等曾經糾衆踞城戕官

稔惡多年若輕率准與投誠恐狼子野心難消反側
著穆圖善懷遵疊次諭旨查明真偽斟酌辦理納中
開降衆亦須妥爲安插該將軍當會同地方官悉心
經理以期與漢民永遠相安悉泯嫌隙

上諭內閣曰前因都興阿督辦甯夏軍務於勦撫機宜
毫無定見且於兵勇入城肆掠未能彈壓禁止降旨
將都興阿交部議處茲復據穆圖善奏稱都興阿於

回衆獻城之後帶隊入城任令兵勇肆行搶殺以致
死傷過衆民遭荼毒實屬辦理乖謬著再行交部議
處以示懲儆

穆圖善又奏言甘省軍興日久餉項缺乏刻下
都興阿所部兵勇歸臣統帶各處應解餉銀蒂
欠甚多仰懇

天恩嚴飭兩江四川山東山西陝西各督撫迅將每月

應解甯夏大營餉銀遵照奏案源源批解並將
以前欠款一併設法籌解奏入

上命軍機大臣傳諭官文崇實駱秉章李鴻章閻敬銘
鄭敦謹劉蓉丁寶楨王榕吉曰據穆圖善奏大營餉
糈不繼請飭迅速籌撥等語甘省地瘠民貧米糧昂
貴各營每月撥餉萬千皆係計口授食實爲刻不容
緩之需各該省積欠餉銀爲數過多若再遲延不解

深恐飢軍譁潰於西北大局甚有關礙著官文崇實
駱秉章李鴻章閻敬銘鄭敦謹劉蓉丁寶楨王榕吉
嚴飭該管司道迅將各該省每月應解甯夏軍營餉
銀按照數目源源批解並將以前積欠各款一併設
法籌解勿得稍存膜視致誤要需

二十三日

癸丑

楊岳斌奏言固原提督雷正綰

臣

昨已函邀到涇歷將

朝廷恩意盡情開導該提督感激涕零自願將李
高啟雷恆趕緊交出並願帶領降回進取金積
堡靈州等處以贖前愆臣已令其前往隨後相
機辦理奏入得

旨前據穆圖善奏甯郡各部兵勇已足鎮撫請飭雷正
綰勦辦甘肅近省回匪免致勾結爲患已寄諭該將
軍與該督酌辦卽著遵照前旨會商穆圖善相機調

遣可也

二十四日

甲寅

楊岳斌劉蓉奏言查慶陽山嶺崎

嶇民物窮瘁環縣以北並無水草人煙宜於設

防而不宜於輦運前督臣熙麟初抵甘肅其時

平涼固原不守崇信靈台阻兵雷正綰甫抵隴

邊陶茂林尙次鳳郡故就慶陽設立糧臺係一

時權宜之計然軍糧所需尙向各屬徵輸今一

州四縣之民脂膏已竭實難責以餉軍慶陽一
臺僅祇收發月餉專顧隴東一路而防兵增至
十餘營委員多至八十餘員徒滋糜費無裨大
局若撤去慶陽糧臺於涇州秦州慶陽等處設
立分局派員轉遞而以西安爲後路總匯則道
里居中形勢利便並將製造採買轉運等局歸
併糧臺亦免顧此失彼之虞相應請

旨改爲甘肅後路糧臺責成林壽圖卽在西安辦理實
於餉需有益如蒙

俞允伏懇

飭下山西河南山東四川各省卽將從前指撥慶陽糧

臺協餉按月委解陝西藩庫臣岳斌卽將慶陽

糧臺冗員裁汰並將現存防兵另派提督張在

山接統歸曹克忠節制調赴前敵助勦以期兵

歸實用餉不虛糜

楊岳斌又奏言接奉

諭旨令臣嚴催成祿鶴齡各率所部趕緊出關臣遵卽

分別咨催成祿一軍由甘州前進鶴齡一軍由
省城繼發現將四川解到餉銀四萬餘兩分給
兩軍並飭沿途州縣一體應付軍糧勿任缺乏
同日甘肅按察使楊能格奏言查前任陝甘督

臣熙麟副都統文煜任內撥發前敵餉項均係
徑解涇州糧臺由該臺按營分撥臣接任後一
切均照舊章辦理遇有各省協餉到臺立即撥
解前敵從無遲誤乃譚玉龍秦國勝等與周顯
承素相朋比挾臣奏叅周顯承之嫌思與糧臺
爲難屢次朦稟署山西巡撫趙長齡署陝西巡
撫劉蓉以臣不顧前敵糧餉意存膜視臣業將

辦理情形詳細咨稟現雖交卸在卽惟軍需大局所關非細籌辦不敢稍懈仍懇

天恩飭下陝西巡撫力籌糧餉接濟慶涇以免貽誤軍務均奏入

上命軍機大臣傳諭楊岳斌趙長齡劉蓉曰慶陽糧臺僻處偏隅難資轉運楊岳斌等擬撤去慶陽糧臺於涇州秦州慶陽等處設分立局派員轉遞而以西安

爲後路總匯並將製造採買轉運等局歸併糧臺提綱挈領所奏係爲因時制宜起見卽著照所請行並責成林壽圖卽在西安辦理甘肅後路糧臺認真擘畫以期呼應靈通有裨大局所有慶臺裁汰委員及接統兵勇各事宜著楊岳斌派員妥爲辦理毋稍稽遲成祿鶴齡兩軍楊岳斌已飭分餉銀催令迅速出關仍著遵旨嚴催毋許稍涉延玩至該軍出關以後

需餉尤關緊要楊岳斌務當設法源源接濟毋令稍有缺乏致誤師行本日據楊能格奏發餉均照舊章辦理並無膜視前敵之事等語著楊岳斌趙長齡秉公詳查據實具奏楊能格請飭陝省力籌糧餉接濟慶涇之處著楊岳斌劉蓉督飭林壽圖竭力籌辦陸續接濟以拯飢軍

上又命軍機大臣傳諭崇實駱秉章閻敬銘吳昌壽丁

寶楨王榕吉日慶陽糧臺僅顧隴東一路而防兵委員糜費頗多經該督撫等通盤籌畫擬撤去慶陽糧臺於涇州秦州慶陽等處設立分局而以西安爲後路總匯自係爲關隴全局起見所奏尙屬可行著崇實駱秉章閻敬銘吳昌壽丁寶楨王榕吉按月將慶陽糧臺協餉委員徑解陝西藩庫西安距各省道里較近且免繞越之虞各該督撫等務當隨時接濟勿

少缺乏

楊岳斌又奏言東樂堡城於上年十一月二十一日被回匪攻陷十二月初五等日該匪全行退出茲據東樂縣丞郭毓才稟稱堡城失守時該員適赴六壩催糧並未在城等語臣查該縣丞有守土之責所稱出城催糧恐係捏飾之詞殊難憑信應請

旨將東樂縣丞郭毓才卽行革職拏問如查有規避情
事再行嚴叅懲治奏入

上從之

二十五日乙卯兵部奏言二月初五日欽奉

諭旨都興阿督辦軍務於勦撫機宜毫無定見且於兵

勇入城肆掠未能彈壓禁止著交部議處

臣部

應照例議以革職正在覈辦閒旋於十七日欽

奉

諭旨都興阿於回衆獻城之後帶隊入城任令兵勇肆
行搶殺以致死傷過衆民遭荼毒實屬辦理乖
謬著再行交部議處應請將

盛京將軍都興阿革職從重治罪奏入得

旨都興阿著加恩改爲革職留任

二十六日

丙辰

崇實駱秉章奏言劉蓉所奏每月

四川省協撥陝西餉銀二萬兩 臣等自應遵

旨力爲籌畫惟通計歲需銀二十四萬兩川省庫儲罄

竭焉能籌此巨款且尙須按月撥解甘省餉銀

暨鶴齡軍餉實屬力有不逮 臣等督飭司道陸

續酌提擬自正月爲始至五月止按月解銀二

萬兩共銀十萬兩以爲採運甘省軍糧之費竊

維劉蓉在陝數年籌畫無遺近聞徵收錢糧日

有起色現復籌辦營田次第開墾計四五月閒
麥秋豐稔辦糧較易五月以後無須川省協濟
亦可少紓川省民力

崇實駱秉章又奏言接奉

諭旨楊岳斌奏酌定協餉數目令臣等每月再籌銀三
萬兩解交秦州查現在甘省軍務正在喫緊需
餉孔殷臣等何敢稍涉推諉惟川省庫款支絀

實屬力有未逮仰懇

天恩准將先後奉撥甘肅暨新疆各餉除按月已解銀一萬兩外每月再籌解銀一萬兩卽自本年正月爲始如期解往秦州由楊岳斌酌量分撥至鶴齡所帶川兵臣等聞其在甘不甚得力應請飭下楊岳斌就近察看如果日久師疲似可遣撤回川以免虛糜軍餉奏入

上命軍機大臣傳諭崇實駱秉章楊岳斌劉蓉曰據崇實駱秉章奏稱四川每月解陝銀二萬兩爲採辦甘省軍糧之用川省庫儲罄竭不能籌此巨款請將此項銀兩解至五月止少紓川力雖係實情惟陝省至五月以後於甘省軍糧能否竭力籌措無誤要需朝廷實難懸揣著崇實駱秉章劉蓉妥爲籌商定議以恤鄰封至楊岳斌前奏酌定川省每月協甘餉銀三

萬兩崇實等以力難兼顧請將先後奉撥甘肅及新疆各餉除按月已解一萬兩外每月再籌銀一萬兩解至秦州交楊岳斌酌量分撥之處並著楊岳斌斟酌情形與崇實駱秉章商定數目奏聞辦理

欽定平定陝甘新疆回匪方略卷一百二十九 丙寅年

三月初七日 丙寅 趙長齡楊岳斌奏言疊奉

諭旨飭雷正綰將雷恆李高啟交出歸 臣等審辦旋據

該提督調到雷恆等二人歸案候訊 臣等親提

研鞫據供因雷正綰革去幫辦軍務勇號黃馬

桂心懷憤恨遂與胡大貴倡亂率勇回攻涇州
營官金占元不從立即殺害嗣因勇丁逃散隨

卽折回等語訊明後當將已革總兵雷恆已革副將李高啟卽在涇州行營正法梟示並飛咨劉蓉將胡大貴卽在西安正法其同時潰亂之弁勇係爲雷恆等所逼脅仰懇

鴻慈概從寬假至固原提督雷正綰於雷恆等滋事之時誓死不從竭力攔阻臣等至涇以後該提督卽輕騎來見瀝陳旣往之非自願帶兵勦賊力

贖前愆現已赴鎮原一帶整飭營伍 臣等察其
情詞實屬出於至誠可否准其立功贖罪之處
出自

天恩奏入

上命軍機大臣傳諭楊岳斌趙長齡劉蓉曰前因雷正
綰勦匪失利降旨革去幫辦軍務勇號黃馬褂以示
薄懲雷恆李高啟輒敢與胡大貴乘機倡亂煽惑軍

心率同勇丁回攻涇州經該城文武竭力防堵將滋事勇丁曉諭解散始行逃回該革員等均係提鎮大員竟敢率衆謀亂實屬罪無可逭現經楊岳斌等訊明將雷恆李高啟卽在涇州正法梟示辦理迅速洵足以昭國法而定軍心胡大貴現在西安監禁楊岳斌等已咨明劉蓉將該革員就地正法卽著劉蓉趕緊辦理涇州軍營士卒經雷恆等正法之後順逆已

明軍心當已鎮靜其被脅潰亂之將士現均邀恩免
罪楊岳斌等當剴切曉諭令其各釋危疑以安衆志
雷正綰輕騎馳赴涇營聽候查辦現經楊岳斌趙長
齡查明該署提督於雷恆等滋事之時曾經以死自
誓力行攔阻尙知愧悔著楊岳斌傳諭該署提督奮
勉圖功以贖前愆

上諭內閣曰前因劉蓉楊能格先後奏稱雷正綰部衆

變亂回撲涇州經雷正綰極力阻截兵勇始回防所
復據劉蓉奏稱拏獲叛將胡大貴供係雷正綰之弟
雷恆及李高啟等首先謀逆當經降旨令雷正綰將
雷恆等解赴涇州交楊岳斌趙長齡訊明辦理茲據
楊岳斌趙長齡訊明覆奏此案雷恆李高啟胡大貴
等膽敢因雷正綰革去幫辦軍務頓起逆謀沿途殺
掠人民焚攻堡寨實屬罪大惡極業經楊岳斌等訊

明將雷恆李高啟正法梟示實足以彰國法而肅軍律胡大貴一犯卽著劉蓉提出正法其餘同潰各弁勇均係雷恆等威脅所致情尙可原著一併免其查辦雷正縮入甘以後頗著戰功乃金積堡失利不能自振咎無可辭惟於兵勇潰變之時以死自誓阻截亂軍且業將雷恆等交出訊辦尙知愧悔著加恩免其治罪仍責令整飭營伍實力勦賊以贖前愆營官

金占元拒亂被戕頗知大節著楊岳斌查明請卹

初九日戊辰趙長齡楊岳斌奏言楊能格奏叅陝

西參將周顯承帶隊勒捐縱勇擄掠並誣陷雷
正綰各節欽奉

諭旨令臣等確查具奏查周顯承原稟雷正綰營勇潰
變尙屬真情並非架詞誣陷亦無狡詐把持侵
蝕餉項情事惟勸辦軍糧輒帶隊前往以致兵

勇騷擾實屬辦事鹵莽約束不嚴因念該革員
前守涇州勞績頗著業已遵

旨革職應請留營責令立功自贖以觀後效其同案被
叅之已革遊擊張潤槐等查訊明確分別定擬
請

旨遵行奏入

上諭內閣曰此案周顯承原稟雷營潰變事屬真情並

非架詞誣陷亦無狡詐把持侵蝕餉項等事惟勸辦
軍糧帶隊前往以致勇丁騷擾實屬辦事鹵莽約束
不嚴該員業經正職著責令隨營立功自贖以觀後
效已革遊擊張潤槐雖訊無滋擾不法情事惟於裴
輔晉私賣軍糧擅作威福責打捐戶等事徇隱不稟
致令裴輔晉朦稟周顯承激使帶隊勒捐釀成巨案
著從重發往軍臺效力贖罪千總王丕承帶領馬隊

乘機搶掠同惡相濟著革職發往黑龍江充當苦差
外委羅鈺爲勇丁引路肆擄雖中途折回究屬多事
著革職逐回本籍已革把總裴輔晉擅責捐戶復敢
朦稟激成釁端業經楊岳斌等訊明與不守營規姦
擄斃命之隊勇王長興等先行正法梟示足以申軍
律而昭炯戒記名提督劉正高於部下兵勇騷擾事
前失於約束副將李鳳岡劉心灼遊擊王新元不能

嚴馭勇丁致多擾害咎無可辭均著革職暫行留營
效力儻不知愧奮卽著嚴叅治罪

十一日庚午明誼車林敦多布麟興奏言查烏里

雅蘇台庫倫兩城所屬喀爾喀東西四部落蒙
兵雖屬衆多向賴牧養牲畜爲業不知講習軍
旅實與內地營伍不同今奉

諭旨飭調自應設法籌辦惟有嚴飭該盟長副將軍等

每部落各湊撥兵丁一千五百名分作三起並
於王公札薩克大員內擇其幹練者每起選派
二三員責令統帶認真訓練聽候調撥再查伊
犁將軍明緒原奏內稱請

飭臣等備辦騾馬三千匹派員解至伊犁大城等語查
烏里雅蘇台距伊犁相隔四城之地沿途賊警
梗阻難行惟有知照明緒揀派官兵多名迅速

前來協同護解庶免疏虞至明緒摺內聲稱前
次奏調蒙兵臣明誼以蒙古苦累爲詞不肯調
撥所奏似多未合當此軍務緊急臣等何敢藉
詞推諉不顧大局謹據實陳明仰懇

聖明洞鑒

明誼又奏言臣蒙

恩簡任烏里雅蘇台將軍責任綦重刻下逆燄臨張軍

情喫緊臣年已七十有五現復感受嚴寒患病甚劇精力難支恐滋貽誤仰懇

天恩准予開缺回旗調理所有定邊左副將軍員缺請旨迅賜簡放以重邊寄奏入

上命軍機大臣傳諭明誼麟興車林敦多布曰明誼等奏蒙古兵丁不知講習軍旅與內地營伍不同雖係實在情形但伊犁待援孔殷自須設法籌調以壯聲

勢前諭該城派撥蒙兵六千名如萬不能足數亦須
挑選精壯數千加意訓練以備折衝之用明誼等現
已飭令各該札薩克旗下每部落湊撥兵丁一千五
百名並派該盟長副將軍等督率教練卽著趕緊札
調來城聽候調撥明誼年逾七旬礙難遠征麟興年
力正強卽著將調到蒙兵歸其管帶俟練習成軍卽
由該大臣統率前往援救伊城戰馬三千匹旣據明

誼等如數備齊著迅速知照明緒酌派妥員協同解
送以免疏虞至伊犁待援情形萬分危急明緒坐困
孤城奏牘中語言未免過於激切明誼等非但不必
與之較量尤當思設法救援以期顧全大局烏科兩
城當伊犁之衝防守事宜尤關緊要該將軍等務當
加意豫防一面將蒙古兵丁勤加操練一面將本城
防守先行妥籌布置以備不虞不可稍涉大意是爲

至要明誼現因患病自行奏請開缺邊疆重地簡用
乏人該將軍辦事素稱熟練著卽在任調理毋庸開
缺一切操防布置事宜務當與車林敦多布等熟商
妥籌以副委任

二十一日 庚辰 穆圖善奏言查甘省漢回平日本

無嫌隙總緣陝回煽惑而起況甯夏地處極邊
頻年兵燹漢回死傷甚衆漸皆真心悔禍此際

因其就撫似宜乘機利導靈州回目馬化澂原
係捐職衛千總人甚誠實雖被馬兆元逼脅並
未攻城作亂且甯夏回弁納萬有等陷城時馬
化澂亦未在內屢赴各處投誠現復在 臣大營
遞稟求撫如蒙

恩諭准令投誠該回目必感激圖報竭忠效力且馬化
澂爲甘省回民所信服若令前赴各路開導回

民大軍自後繼之各路回衆當可傳檄而定不
但西北屏藩安如磐石且覈計甘省兵勇百餘
營一歲餉糈卽節省銀一二百萬兩洵於全局
大有裨益

穆圖善又奏言甯夏納中閘王家疇莊楊和堡
等處回民一聞

恩諭仍令安撫無不歡欣抃舞情願盡繳軍械馬匹聽

候安插歸業除上年已繳槍礮刀矛一萬餘件
並銀米馬匹等項外現又呈繳軍器多件戰馬
多匹並認捐銀數萬兩爲修濬唐漢清惠四渠
之用臣恐不實不盡當於驗收後派副都統敦
奇祥阿等前赴納中開各莊按戶梭查僅存羸
牛牲畜未見馬匹亦無槍礮軍械遂飭趕緊造
具戶口清冊先將向居府城之三寺回民點驗

入城照舊安插 臣仍商令甯夏副都統金順暫

駐府城會同該鎮道等稽查彈壓以重地方其

靈州回目馬化澂從前屢次來撫現又具稟投

誠情願前赴各處收撫回民復捐輸渠工銀八

千兩米十五萬斗並呈繳刀槍馬匹均經驗收

該回目力圖報效覈其所稟與從前查探情形

大略相同事關甘肅通省全局 臣不敢壅於

上聞

穆圖善又奏旨刻下糧餉支絀自應隨時裁汰
官弁兵勇以節糜費現將已革總兵敖天印所
帶親兵一百五十名挑補貴字左右兩營並將
從前都興阿調來各營勇丁汰弱留強歸併一
營立爲貴字中營均令總兵鄭啟貴統帶並撥
給副都統金順親兵一百名復挑取水隊一百

名護解往來運糧船隻其餘勇丁分別挑入各
營補足額數俾利征勦至花馬池後路極關緊
要直隸等營官兵一時驟難移動俟靈州事定
再行撤遣歸伍其各營將弁兵勇征戍多年異
常辛苦幸叨

聖主鴻福收復甯郡所有出力弁勇可否由臣擇尤保
獎以勵軍心之處出自

天恩奏八

上命軍機大臣傳諭穆圖善曰馬化澂到營求撫穆圖善察其人尙誠實著准其投誠責令前赴各路開導回民立功自贖如有頑梗不法仍當立加剿辦不得稍涉遷就致貽後患甯夏納中間王家疇莊楊和堡等處回民一聞朝廷宣諭盡繳軍械馬匹礮位等項聽候安插尙知大義著穆圖善督飭敦敦奇祥阿等周

歷各莊查驗令各歸各業及時耕種不得藉端擾累
其認修渠工飭令認真辦理以期經久所奏各營分
別遣撤挑補均照所請行節次出力將弁兵勇著准
其擇尤酌保毋許濫

二十四日 癸未 明誼車林敦多布麟興奏言 臣等

遵

旨調撥蒙古官兵六千餘員名前赴伊犁援勦此項征

兵口糧所需甚鉅本境向無米麪附近又無處
購買歸化城雖係產糧之區近聞甯夏軍營及
烏科二處官兵口糧俱在該處採買此次調撥
蒙兵應需米麪若再由歸化城置辦實於彼處
兵民生計有礙請

旨飭下山西巡撫在於該省產糧處所飭令地方官趕
緊置辦白麪六十萬斤穀米二千石運至綏遠

城由該將軍派撥官兵分起由驛押解來烏以
備供應征兵迅速起程前進奏入

上命軍機大臣傳諭德勒克多爾濟王榕吉曰前因伊
犁待援孔亟曾經諭令明誼等調撥蒙古官兵六千
名前往援剿茲據明誼等奏本處向無米麩附近又
無處購買請飭山西巡撫派員採買轉運等語所奏
亦係實在情形著王榕吉卽在該省產糧處所轉飭

該地方官趕辦白麪六十萬斤穀米二千石迅速運
至綏遠城交德勒克多爾濟派兵押解赴烏以應征
兵口食之需

明誼車林敦多布麟興又奏言伊犁軍情危急
前經咨調蒙古官兵尙未調到惟有復行嚴催
飭令迅速趕援並飭令喀爾喀西兩部落王公
札薩克等捐備騾馬三千匹聽候護送伊犁臣

等恐其捐不足數一面飛咨庫倫科布多兩城
大臣迅飭所屬趕緊報捐馬匹以備撥解奏入
得

旨前諭令明證等飭令各該旗湊撥兵丁俟練習成軍
由麟興統率救援伊城卽著該將軍等遵照前旨辦
理駟馬三千匹俟捐備如數迅卽設法護解伊犁以
應急需

同日楊岳斌奏言 臣於三月初六日行抵慶陽
探聞初三日五鼓省城五營標兵擁至督署並
軍需局排門直入肆行搶劫將督署幕友及留
省委員並親兵百餘人概行殺害所存炸礮洋
槍火藥及標營武庫器械悉爲搶盡初三初四
初五等日緊閉城門糾衆搶殺官民被傷甚多
其餘文武各員俱被禁脅城垣之上皆安置礮

位嚴守並勾結北山回逆來省現踞北關黃河
對岸之廟灘並風聞叛兵等捏造摺件勒令藩
司林之望轉奏 臣聞警之餘不勝焦憤當經飛
飭各軍先往查辦一面趕緊啟行兼程赴省查
甘省各處標營積習驕橫此次竟因糧食缺乏
膽敢夥造逆謀 臣赴省後各該標兵等望風伏
罪猶可勦撫兼施儼復抗拒狡獪必應痛加勦

洗庶足以儆效尤惟省城重地臣未能先事豫防咎無可辭相應請

旨將臣交部議處俟查明確情再行具陳奏入

上命軍機大臣傳諭楊岳斌曰甘肅省城因糧餉缺乏督標兵丁竟肆行搶劫殺害官民並勾結回逆赴省盤踞北關黃河對岸之廟灘此時賊氛猖獗占踞蘭州勢必全省震動楊岳斌急應督兵星夜兼程馳回

省垣速將蘭城克復以期力顧大局鎮定人心此外
各路兵勇何處可以檄調卽著酌量情形先行撥往
助剿以厚兵力楊岳斌於省垣重地並不小心防範
以致標兵謀變毫無見聞咎無可辭著先行交部議
處儻再漫無布置不將省城速行克復自問當得何
罪林之望及省城文武各官下落著楊岳斌迅卽查
明具奏平涼固原軍務情形現在若何該督作何布

置並著隨時具奏涇防各營軍心已定楊岳斌自當
分撥諸軍前往該二城相機勦撫毋令東路回匪聞
風響應與省垣叛兵勾結肆擾致成燎原之勢仍一
面設法疏通陝西糧運分濟甘省各營軍食毋稍大
意是爲至要慶陽查辦糧臺事務卽著該督專交趙
長齡辦理所有慶陽留防事宜仍著楊岳斌分派將
士嚴飭防守本日復據林之望奏稱副將羅宏裕辦

理不善激變營兵等語羅宏裕分撥各營糧米有無
勇多兵少偏袒激變情事卽著楊岳斌確實查明秉
公嚴叅懲辦不可稍涉偏徇以平軍心林之望所稱
營兵僅因械鬪殺傷數人督署門尙未啟旋卽解散
並未敘及擁進署內並幕友委員親軍概行遇害槍
礮火藥均被搶劫等事與楊岳斌所奏情節迥不相
符其所稱飭令各營照舊分守城門嚴防外賊窺城

等語是否省城各門已爲叛兵占踞該藩司有無爲
叛兵所脅飾詞具奏情事楊岳斌卽行查明覆奏儻
該叛勇逼脅藩司飾詞奏事難免不僞用印文分向
各路軍營並各郡縣逞其詭計該督務當檄飭各該
文武嚴密訪察並著於回抵省城時設法將被脅滋
事營兵先行招撫解散以孤賊勢務當隨機應變謀
勇兼施不可稍執成見

同日甘肅布政使林之望奏言甘肅省城兵糧
久缺所辦之糧多半分與各勇營兵更苦該兵
丁於三月初三日羣向中營副將羅宏裕求撥
現買之糧復被斥逐各營因向該副將之勇分
訴又未允准遂至忿爭彼此械鬪各殺傷數人
營兵齊至督署門外求達下情督署門尙未啟
臣聞信急往安撫解散一面給各營麪斤一面

飭各營照舊分守城門嚴防外賊窺城以固根
本查督臣在外鞭長莫及各營皆因飢困無以
爲生亦係實情東西糧路未通兵勇之糧不能
視同一律難免不平現督臣相隔千餘里臣惟
有開誠布公力維大局以紓

宸念奏入

上命軍機大臣傳諭林之望曰甘肅省城營兵因軍糧

缺乏結衆滋鬧楊岳斌現經出省所有省城防守事宜林之望豈能辭責著卽將各營兵丁妥爲彈壓查明爲首滋事之犯嚴行懲辦並籌措糧餉均勻放撥以定軍心一面嚴防城外賊匪勾結窺伺毋稍大意羅宏裕支放軍餉是否有辦理不公之處並著查明實在情形稟知楊岳斌嚴行叅辦其餘一切應辦事宜著俟楊岳斌回省後妥商籌辦

欽定平定陝甘新疆回匪方略卷一百三十 丙寅年

四月初二日

庚寅

劉蓉奏言甘肅省城兵變據督

臣函述內訌情形急欲率師回省勦辦囑臣運

糧接濟臣維固原逆氛方熾近復勾結河狄悍

黨與相合併靈州金積堡各路陝回亦均聚於

鞏州等處聲勢相聯若督臣率師徑趨蘭州各

路逆回將併起以躡其後斯時前逼堅城後迫

強寇運道中梗實無制勝之方竊謂此時欲救
護省城當以疏通糧運爲急宜先將平固埽蕩
糧路暢通然後鼓行而西則聲威旣壯叛兵將
不戰自潰况省城無糧勢必不能久支該兵弁
等被人誘脅急之則合緩之則離卽有外援豈
能運糧相濟誠不宜以孤軍深入轉失應變之
宜臣已飛函馳商督臣先派曹克忠酌帶七八

營徑趨省城如能彼此相安即可入城協守否則暫紮城外扼河而軍斷其內外勾結之謀以爲目前羈縻之計請

旨飭令藩司林之望約束弁兵堅守待援毋使省外逆回乘機闖入一面

飭令楊岳斌督師歸蕩平固各處逆回肅清東路轉運糧餉接濟省城暫將省城弁兵變亂情形從緩

查辦

同日林之望奏言甘肅督標兵丁與楚勇構釁
勇丁被殺者百餘名兵丁亦被殺傷十餘名維
時臣與署臬司崇保等聞變先後馳往彈壓詢
知道員吳炳崑等同遭戕害該叛兵情形洵洵
臣暫將好言撫慰曉以利害始各環跪求生
路當諭以果能照舊守城禦賊尙可原情輕辦

臣屢次往邀各營將弁前來公議署副將羅宏裕等因傷未來不得已邀請在籍之參將馬福遊擊陳應春等至署與之熟商權委該員等督帶衆兵登城守禦以防奸匪乘虛窺伺伏思此次滋事標兵現雖勉聽臣言照舊上城防守但慮附近楚勇前來報復卽多方拊循其心終不無疑懼而西北各路賊巢距省甚近自有初三

日之變次日卽有賊騎千餘直抵黃河北岸距
城僅一二里雖省外駐有楚勇而於標兵已成
水火之勢斷難調省備遣城內倉庫空竭市無
現糧危急情形不堪設想臣惟有與在城文武
勉竭駑鈍悉力防守以待援師

林之望又奏言此次兵變之由實緣上年督臣
楊岳斌抵任後委署武職各缺多係隨征營官

於營務旣未諳練而於鈐束兵丁不無過於嚴
覈兵心頗懷怨望且勇丁餉厚差輕平日相見
語言復多欺凌因而激成事變臣體察情形不
但滋事標兵深懷疑懼而安分兵民亦同深憂
慮深恐株累波連是以臣斷不敢遽調附近楚
勇至省協防致生他變現在賊氛逼近城垣其
省東駐紮之營惟提臣雷正綰曹克忠二軍較

近可否仰懇

天恩於此二旅內揀派一軍

飭令飛速來蘭救援伏乞

聖裁均奏入

上命軍機大臣傳諭楊岳斌劉蓉曰據劉蓉奏甘肅省
城兵變酌籌緩急權宜辦理與朝廷所辦情形多相
符合蘭州文武各員多爲叛兵戕害四門已設礮位

閉守林之望兩次所奏摺件顯係被脅捏飾劉蓉以
楊岳斌移師回省恐各路回逆併起以躡其後請先
將平固埽蕩疏通糧路然後鼓行而西所奏不爲無
見此事本由楚勇與標兵領餉厚薄不均楚勇又從
而凌蔑之以致標兵積不能平劣將張玉春等從中
播弄遂至陡生變亂楊岳斌當分別首從勦撫兼施
不得概行殺戮致叛兵聞風畏懼益堅其抗拒之心

並須將偏袒不公之武員查明叅劾以平其心此等
叛兵倉卒起事急則合而緩則分總宜設法解散以
省兵力省垣城池堅固洋礮火藥均爲叛兵所擄該
督當自度兵力如何儻能剋期克復則兵貴神速自
應迅回省城辦理如探明賊中守備已固兵力未能
遽克或如劉蓉所籌先將平固回匪勦平疏通糧路
再行西進之處均著楊岳斌酌度緩急情形辦理林

之望此次所奏摺件詞旨與前次所陳大略相同其所稱督標各兵與楚勇不能同處省城請令曹克忠帶所部赴省等語是否叛兵有悔罪望撫之意抑或欲誘曹軍入城圖謀戕害楊岳斌當察訪明確相機調遣不可坐失事機亦不可冒昧從事蘭州城內無糧楊岳斌當分兵要路杜賊勾結外援斷其糧路勢將不攻自潰

上又命軍機大臣傳諭林之望曰甘肅省標各營兵丁
因平日楚勇餉厚差輕積懷不平又以飢餓索餉爲
署副將羅宏裕喝斥激成變端惟該兵丁等與楚勇
械鬪竟將道員吳炳崑等戕害實屬不法著林之望
迅速查明將爲首滋事之犯嚴行懲辦其餘被脅各
營並著曉以大義告以叛逆之人無不誅滅之理况
甘省標兵本屬無多指日楊岳斌統兵回省儻不及

早擒縛首逆解散黨羽將來大兵一到必致玉石俱
焚該兵丁等如能悔過自新朝廷亦當寬其既往不
事窮究也賊騎千餘直抵黃河北岸距城祇一二里
省城防守緊要林之望當約束各兵嚴行守禦不得
稍有疏虞被戕各官並著一一查明具奏此次省城
兵變督臣出省林之望未能先事豫防實難辭咎著
先行交部議處近日省城防守情形楊岳斌未到以

前仍著林之望隨時據實馳奏

初六日甲午劉蓉奏言接准楊岳斌咨稱西路大

股賊匪馬隊數千攜眷東竄將由蓮花城故關

隴州一帶入陝現飭提督譚玉龍派隊勦捕

卽撥營兜勦以收聚殲之效臣當卽飛檄駐紮

鳳翔之總兵蕭德揚駐紮鳳縣之總兵蕭德見

駐紮長武之總兵劉玉興各率所部就近堵截

復添派總兵邱時成等兩起馬隊馳赴鳳隴會
同各路防軍及涇州會剿之師分途迎頭截擊
期將此股逆匪悉數殲除以靖邊患

劉蓉又奏言陝省靖邊保安等縣均與甘肅慶
陽所屬壤地相連經臣札飭鎮西軍扼隘守禦

二月初十日甘肅鞏州蒙城踞回竄至鐵角城
地方四出焚擄經同知鄆太愚派左右兩營並

鐵騎營馬隊中營親兵前往堵剿殺賊甚多餘
逆紛紛敗潰當將鐵角城收復連日乘勝追殺
疊破逆巢節節掃蕩將此股賊匪盡數追出甘
境斬馘無算臣查鎮西軍此次疊獲勝捷剿辦
尙屬迅速惟該逆糧食缺乏時圖竄陝難保不
再來窺伺現在各路股數及木瓜城一帶盤踞
甚多均距陝邊不遠該軍堵禦西北勢難兼顧

南路臣已飭總兵楊得勝督率所部聯絡各軍
會同勦辦並悉金積堡靈州一帶陝回俱已竄
踞平固所存土著甘回近有赴甯夏投誠之信
是定邊縣境情形較鬆因檄飭駐紮該縣之總
兵段登雲一軍移紮鐵角城白家屯等處嚴密
堵勦以厚兵力奏入

上命軍機大臣傳諭楊岳斌劉蓉曰甘省西路大股賊

匪馬隊數千攜眷東竄勢將由蓮花城故關隴州一帶入陝楊岳斌已飭譚玉龍派隊勦捕劉蓉復檄令蕭德陽等各率所部就近堵截添派邱時成等兩起馬隊馳赴鳳隴會同涇防各軍相機截擊卽著該督撫嚴飭在防將士實力兜勦務將此股逆匪悉數殲除不得稍有鬆懈任令竄越靖邊等處防軍截勦竄匪疊獲勝仗尙屬出力惟該匪糧食缺乏時圖竄陝

現在各路股數及木瓜城一帶盤踞甚多均距陝邊不遠劉蓉務當飭令段雲登及鄆太愚等嚴密堵剿以顧疆圉毋稍疏虞金積堡靈州一帶陝回竄踞平固楊岳斌前由慶陽折回現在行抵何處著卽督飭諸軍將平固兩城迅圖克復毋任久踞省垣近日情形如何該督作何辦理之處並著隨時馳奏以慰廑

注

劉蓉又奏言據總兵段登雲稟報探得定邊縣屬馬家畔地方有回逆一股搶糧滋擾當卽派隊會同總兵趙有勝等馳往撲剿斃賊一百餘名生擒十餘名訊明後卽行正法並奪獲旗幟擡槍刀矛多件驢畜三百餘頭官軍乘勝追擊該逆四散奔竄臣現飭該軍移紮鐵角城會同鎮西軍實力防剿奏入報

初七日乙未林之望奏言甘肅省城糧道久梗兵

民飢困難支臣疊次札催秦州知州繆寶鈞趕

緊運糧接濟茲據稟稱陝省運到米麥經督臣

飭令悉數運儲靜甯實難兼顧省城臣思督臣

前請撥運川陝二省糧石原爲專濟各營軍食
但省城形勢危殆已極似當兼顧根本擬請卽

於陝省運解秦州軍糧內劃撥一萬石派員繞道運省以拯垂斃兵民

林之望又奏言省城兵勇械鬪之案臣於撫定

後體察衆兵辭色不免仍懷疑懼隨密囑參將

馬福等妥爲開導鈐束以資安輯衆兵齊來臣

署具稟略言三月初旬因飢餓難忍齊至督署

乞糧羅宏裕聲言

朝廷裁汰兵丁姑念爾等寒苦暫行容留此糧留
濟楚軍於爾等何與兵丁不服以致激變等語
臣不露聲色照常批發仍飭令迅回防守以備
不虞

林之望又奏言三月初四日突有北路回匪馬
士彥擁衆至廟灘地方與省城僅隔一河臣激
勵弁兵登陴固守復由鶴齡撥兵緊守河橋該

匪見城防整暇遂聲言並無他意因聞兵勇滋事疑與回民構釁特來保護排解並前聞甯夏回衆投誠曾遣人遞稟乞撫藉此來候明示等語當由鶴齡率同已革通判鄭聲文等親往河北面加開導飭令仍回北山聽候奏乞

恩施妥爲安插臣一面設法布置守禦加嚴賊見無隙

可乘甫於初八日撤退旋有另股陝回率黨至

河北窺伺亦卽退去初六至十一等日西南各路賊首馬阿渾謝二崔三等率衆逼近省垣詐稱乞撫意在盤踞要隘斷我糧道幸所謂張玉春等三營於初七日趕回省城官兵聲勢較壯逆賊無所施其技惟現在糧盡援絕軍無鬪志卽使熾宜安輯亦非久計仰懇

天恩迅飭雷正綰曹克忠兩軍飛速來省應援以拯危

急

林之望又奏言副將張玉春文象奎所部三營
前經調往貢馬井一帶勦賊連獲勝仗嗣因省
垣危急飛調該副將等回省駐紮東關教場以
資防守三月初十一等日賊股分擾買子堡
等處提督彭楚漢等接仗失利賊匪逼近城垣
當飭張玉春等馳往迎勦賊隊退至距城二十

里之東崗鎮適標兵及川兵亦聞信趕到奮力
合剿賊始敗竄惟春奎三營缺餉已久且東南
賊股甚多難保不去而復來現仍設法整頓嚴
加防禦奏入

上命軍機大臣傳諭楊岳斌劉蓉曰甘肅省城兵丁滋
事變起倉卒此事本由楊岳斌厚勇薄兵所部將士
又從而凌侮之以致兵心不服積憤日深一發莫遏

現在該標兵具稟向林之望申訴是尙有悔罪畏法之心楊岳斌當設法撫定查明激變之楚將及爲首滋事之標兵持平辦理並曉諭脅從附和之衆毋懷疑懼以安其心尤須先將省外附近股匪勦平後再行察看情形相機查辦不可鹵莽輕發並不可輕聽所部楚勇憤激之言不察起釁情由概行誅戮此次林之望所奏各摺片朝廷詳加披覽似屬實在情形

未必皆係被脅捏飾之詞羅宏裕以朝廷欲裁撤兵
丁之言捏造激變咎實難辭楊岳斌務將羅宏裕激
變情由查明叅辦不准稍涉徇省城以外附近地
方跬步皆賊藉乞撫之名爲斷絕糧路之計鶴齡現
率通判鄭聲文等將河北回匪先行開導權宜安輯
並調回張玉春文象奎三營回省以壯聲勢惟兵力
仍形單薄該藩司請將雷正綰曹克忠所部調回省

垣助勦著楊岳斌遵奉前旨迅速酌調曹克忠一軍
赴援鞏昌軍務該督另派得力之員前往督辦省城
以外各股匪環伺該督亦當分派將弁疏通糧路以
顧根本林之望所調之春奎三營餉缺過久困憊幾
不成軍省城糧路久梗兵民飢困難支實堪憫惻著
楊岳斌劉蓉迅將陝省運秦糧內割撥一萬石繞道
運赴省城以救然眉之急毋稍歧視致誤事機劉蓉

於陝省糧石仍當廣籌採買派委妥員源源接濟不
准推諉稽延

上又命軍機大臣傳諭林之望曰甘肅省城自兵勇互
鬪後北路回匪馬士彥等率衆逼近省垣西南各路
賊首馬阿渾謝二崔三等亦四出紛乘意圖窺伺因
城守嚴密均以乞撫爲詞暫行撤退林之望因內無
糧草外無援兵權宜安輯固屬萬不得已之舉惟回

性狡詐每以投誠懈我軍心林之望仍當督率在城
文武加意防範不得稍涉疏虞致墮詭計張玉春等
三營業經林之望調回省城駐紮要隘第爲數過少
尙不足丕振軍聲前已諭令楊岳斌飛飭曹克忠等
軍回援省城本日復令該督檄催趕緊前進林之望
接此旨後卽可一面稟商楊岳斌一面函商曹克忠
等以期援兵速到保全根本重地

初八日 丙申 楊岳斌奏言上年提督曹克忠移軍

駐紮馬營十二月二十六日分兵進剿華家嶺

牛營溝等處疊克堅巢斃賊無算本年正月二

十六日該提督親帶馬步各隊行抵距洮州十

里之李歧山察看地勢移營進逼城內逆回驚

惶無措回目馬芳率衆乞降當經飭令捆獻首

惡繳械獻城該匪隨交出滋事首逆丁重選等

二十八名並呈繳軍器多件戰馬多匹當將首
逆逐一訊明正法軍械馬匹分撥各營應用曹
克忠復親督各營入城搜查外來回衆悉令遷
徙土著回民編立保甲諭令各安生業並於降
回內挑選精壯令其隨營助勦其舊洮城千家
寨回民亦一律收撫此次在事文武員弁不無
微勞足錄可否由臣擇尤酌保之處出自

天恩

楊岳斌又奏言署陝西藩司林壽圖前因接辦
慶陽糧臺曾奉

諭旨准其專摺奏事嗣該署司懇收回

成命蒙

恩准行惟查慶陽糧臺現已改設西安蘭州去陝千有
餘里若糧臺要件仍須由臣代奏實有鞭長莫

及之勢 臣擬飭林壽圖凡事隸糧臺急應入告
者無庸拘泥前奏仍令專摺陳明以期事機迅
速呼應靈便奏入

上命軍機大臣傳諭楊岳斌劉蓉曰曹克忠一軍自移
紮馬營以來屢次獲捷平毀賊壘洮州繳械獻城兵
不血刃布置善後亦頗有條理所辦甚爲妥速在事
出力文武員弁兵勇均准楊岳斌彙案擇尤保奏毋

許冒濫昨諭楊岳斌將曹克忠軍調赴蘭州援剿鞏
昌軍務另行派員接辦卽著迅速調派蘭州標兵因
飢生變省外各回眈眈窺伺情形十分危殆而楊岳
斌本日來報絕未提及實堪詫異該督務當懍遵疊
次寄諭趕緊進兵先勦城外各回再行進省設法撫
定持平辦理不得稍存成見以副委任林壽圖前辭
專奏業經降旨允准以後糧臺事宜仍由楊岳斌具

奏如該督已回蘭州遇有糧臺急應入奏之事卽就
近由劉蓉奏報以期事權歸一

楊岳斌又奏言提督彭楚漢稟稱二月間賊匪
竄至金縣當卽帶隊攻勦疊有斬擒敗匪窮蹙
狂竄適提督楊明海等率領所部在清水驛堵
截該匪遂由山僻小路遁去現在金縣清水驛
一帶俱已肅清又據總兵劉漢勝稟稱安定東

路突有回逆一千餘名竄至青嵐山占踞民堡
肆行搶掠經該總兵帶隊迎擊殲擒悍逆多名
餘匪逃遁安定東路現已稍鬆臣仍嚴飭各該
營相機堵擊以杜紛竄奏入報

聞

十二日庚子楊岳斌趙長齡奏言接奉

諭旨飭查楊能格被叅發餉不公等情臣等詳細查訪

楊能格撥發慶防弁勇糧餉較之發給前敵及
涇防各營多至數倍顯有挾私偏袒勻撥不公
情弊其支發營防親兵馬隊餉項則照楚軍章
程八營弁勇則照熙麟等舊章減扣發給於魏
添應新招馬隊又照楚章支給實銀辦理實屬
兩歧至糧臺收支有無浮冒全以支發底簿及
歷任報銷冊爲憑楊能格以前辦糧臺之熙麟

文煜兩任報銷冊籍均未移交該臬司本任糧
臺收支各款業經奏准自行報銷所有底簿不
肯交出臣等無從查覈並請

飭令該臬司趕緊造冊報部覈銷奏入

上諭內閣曰楊能格自接辦糧臺後於支發糧餉意爲
輕重以致物議沸騰實難辭咎著先行交部嚴加議
處其經手糧臺收支款項著楊岳斌嚴飭趕緊造冊

報部覈銷以杜弊竇而昭覈實

十三日

辛丑

三品頂戴陝西布政使林壽圖奏言

臣管理糧臺正值甘省糜爛之時軍食難籌盡
資採買駐紮慶涇平固等處官兵不下數十營
需餉刻不容緩加以程途遼遠轉運爲艱比較
往時勞費數倍況自蘭州兵變以來督臣所需
糧餉軍火均由陝省運解出款愈增益形支絀

請

飭山西撫臣將河東乙丑綱劃撥蘭州餉銀二十萬兩

統解西安由臣權衡緩急均勻酌撥俾免貽誤
慶陽餉銀前蒙

恩准飭令山西山東河南四川等省各解銀十萬兩僅
據山西藩庫撥解二萬請

旨飭催各督撫迅籌解濟以應急需奏入

上命軍機大臣傳諭崇實駱秉章楊岳斌閻敬銘李鶴
年王榕吉日慶陽糧臺改設西安關係甘省全局若
不亟籌接濟則各營停兵待餉譁潰堪虞著崇實駱
秉章閻敬銘李鶴年王榕吉督飭各該藩司迅籌撥
解以應急需並著王榕吉迅飭河東道將劃撥蘭州
之乙丑綱銀二十萬兩如數籌措遴派妥員解赴西
安交納毋稍玩延楊岳斌林壽圖仍當於各該省協

餉解到時權衡緩急均勻搭放毋得顧此失彼貽誤
事機

同日誦爾濟奏言查東西南三路賊匪刻下雖
未侵犯巴境難保不乘閒竄擾防範堵禦在在
均關緊要聞回子郡王伯錫爾現在回城因回
賊太多不敢輕動專候大兵一到必將率領良
回協同攻剿今據委員佐領百喜等稟稱官兵

連獲勝仗賊匪西竄現在招集木壘奇台古城
等處戶民幾及一萬百喜現飭該處民勇慎守
地方該員卽前往濟木薩攻取逆賊糧草 臣伏
思木壘奇台古城等處旣已收復民勇實不可
靠自應安設官兵鎮守統俟大兵到來卽行分
投攻勦仰懇

天恩飭下成祿等迅速出關以收夾擊之效奏八

上命軍機大臣傳諭楊岳斌訥爾濟曰木壘奇台古城等處均已無賊訥爾濟派委佐領百喜等帶兵前往並招募兵勇防守地方該佐領等往濟木薩攻奪逆匪糧草如得大兵出關回子郡王伯錫爾等均可協同攻勦成祿一軍現在何處著楊岳斌迅檄該提督帶兵出關與伯錫爾等聯絡聲勢不得再有畏葸遷延致干重咎鶴齡一軍前次疊經降旨令其會同成

祿一軍出關剿賊嗣因蘭州兵變調鶴齡駐省防剿
現在省城情形能否安靜如曹克忠軍到省能否替
出鶴齡之軍仍令會合成祿出關並著楊岳斌妥籌
調度

中央民
學院圖書

欽定平定陝甘新疆回匪方略卷一百三十一

中書
學士
圖
書

四月十四日

壬寅

楊岳斌奏言

臣在慶陽

督
辦
軍
務

聞標兵內變之信一面奏報一面由慶折回於

三月二十二日馳抵涇州有自省城逃出商民

到涇據稱三月初三日之變營兵於初二日三

更時私啟內城門鑰放外城兵丁潛入旋沿街

糾黨齊隊及至五更該叛兵分股赴中軍副將

署內搶殺而以大股合圍督署署內及軍需局
所有槍礮火藥衣物器皿搶劫一空臣留省募
友委員及親兵人等概行殺害該商民知其姓
名者湖北候補道吳炳崑江蘇候補知府崔學
敏世襲雲騎尉周茂棟軍需局委員甘肅候補
知縣楊埭復在中軍副將署內殺斃甘肅候補
知縣盧樹芝貢生陳名煊臣委員劉畫堂亦於

距城十里之空心墩地方被殺署中軍副將羅
宏裕署城守營參將王金楷署前營遊擊李玉
安署後營遊擊馮名彩均被殺傷署皋蘭縣知
縣鄧承偉遇救得免該叛兵復在各處搶劫糧
運軍裝釐金等局並挨戶梭尋聲稱因臣裁汰
老弱派伊等巡守城垣藉此報仇雪恨左營守
備陸海適聞此言從旁禁止卽被戕害城門現

尙緊閉祇有東門日開片時仍爲兵丁把守有
逃出者均須搜檢公文俱行拆看等語 臣查該

商民所稱 臣 署幕友委員大小文武不下三十

餘人親兵亦有百餘人概行遇害容俟查明另

請

恩卹甘省營伍廢弛 臣 抵省後卽查明督標等營兵馬

多不足額而所支月糧必須照例定額數上下

瓜分臣因飭將官補足原額汰弱留強詎各將官瞻徇情面屢催罔應不得已先後改委隨營提督楊占鼇等接署中營副將各缺嗣楊占鼇等裁汰老弱有懸缺者卽以新三營之兵調補故臣上年有裁撤新三營之請至營馬除撥歸提督彭楚漢等隨征一百三十四匹外餘馬三十餘匹留營當差所有從前冒領馬乾銀兩一併

停發去年九月閒出有左後等營把總外委各

缺 臣將應行拔補之弁當堂考驗據稱不習騎

射是以懸缺未補此 臣整頓營伍之實在情形

也前護督 臣恩麟用民夫登城巡守 臣到省後

恐民夫不知戰陣卽以兵丁護守城池除正項

外每日另給口食銀四分免致瞻顧此 臣重省

防以紓民力之實在情形也此外如糧餉一項

馬兵一名月得銀一兩二錢四分步兵一名月
得銀九錢合之守城另給銀一兩二錢每月均
得實銀二兩有奇並無蒂欠月糧向支半色後
照市價折銀馬兵一名月折銀四兩二錢步兵
一名月折銀三兩如糧價昂貴仍隨時增添此
標兵糧餉兩足之實在情形也去冬臣派遊擊
德恩帶兵提餉路遇回逆該兵丁卽棄餉全逃

幸德恩自率親丁將逆回擊退旋將兵丁招回

護餉至省德恩向臣稟知前情以兵不可恃堅

求卸任臣未經允准令其勤加操演練習膽氣

儻以後仍敢似此恇怯立正軍法此標兵懦弱

無能之實在情形也以上各情臣原思徐徐而

理不意該叛兵肆行無忌至於此極聞是日兵

丁起事之時沿街喚人喧傳半夜若使林之望

等早出解散省垣何至遭此奇禍該司歸過於
羅宏裕撥糧不公查籌發糧價係該司專政不
得謂羅宏裕激變現值省垣喫緊臣惟有遵

旨速赴蘭州力顧大局至會靜之賊被曹克忠擊敗現
圍攻莊浪城堡隆德縣又有失陷之信臣連催

雷正綰譚玉龍等軍扼要截擊並飭譚玉龍先
援莊浪次攻隆德又恐省垣事急已飛催曹克

忠先行督隊往援當可剋日馳進平涼已責成
譚玉龍駐守固原經雷正綰派兵扼紮其慶防
事宜仍留張在山一軍堵勦佈置尙覺周密查
林之望此次奏報與臣所陳情節迥不相符明
係爲叛兵所脅省城出入公文該叛兵必先拆
看林之望自不敢以實情上達誠如

聖諭難免不僞用印文分向各路軍營並各郡縣逞其

詭計臣已飛飭各該文武嚴密防察至該叛兵
勾引北山回逆屯踞黃河北岸之廟灘聞於三
月初七日稍爲卻退惟狄河大股回衆由省南
尖山一帶徑竄省城近地經總兵劉祥勝等擊
退後又攻破金家崖附近民堡多處盤踞新營
一帶殺害人民甚多近省之地皆有賊蹤臣當
率領親兵趕緊繞赴蘭垣相機辦理

楊岳斌又奏言准提臣雷正綰咨稱回逆逼近

隆德縣城該提臣於三月十九日聞報卽督帶

親兵馬隊馳赴該縣賊見縣城守備甚嚴隨卽

遠竄嗣因與臣面商緊要軍務赴馬連鋪仍留

馬步親兵百餘人防守乃隆德縣官民因賊匪

距城稍遠亦卽弛備逆回乘夜爬城而入迨地

方文武官弁及雷正綰所派馬步親兵登陴抵

禦業已無及遂致縣城失守親兵大半傷亡地方官不知下落先後接據署平涼府知府李超羣等稟報臣已分別咨催雷正綰譚玉龍等軍即日馳往迅圖克復縣城並查明地方文武官失事情形另行嚴叅

楊岳斌又奏言蘭州省城亂兵及狄河回衆紛紛竄逼省垣近處連成一氣金縣安定諸路股

匪成羣會甯大股之賊鋌走於張家川蓮花城
一帶此外如固屬金積堡處處蟻聚蜂屯勢未
少戢兵力爲所牽掣實屬不敷分撥非得勁旅
協攻未易收蕩平之效聞浙江提臣鮑超經湖
廣督臣官文奏調赴鄂現在湖北一律肅清請

旨飭下該提臣卽率所部星馳來甘協剿奏入

上命軍機大臣傳諭穆圖善楊岳斌曰甘省營伍積弊

原應次第整理惟須體察事勢緩急不可偏執重勇
輕兵成見操切從事此時事變已成槍礮火藥俱爲
叛兵搶奪城門又爲所據該督現率所部折向省垣
自宜先將脅從各兵曉諭解散使其黨與離心方可
次第查拏首犯若先揚言督兵勦洗必致該叛兵閉
關拒守攻克需時現在省外各路回匪逼近省城儼
官軍頓兵堅城之下內爲叛兵所拒外爲回匪所乘

進退失據恐大局益形窒礙該督現今令曹克忠一軍
先回省城著卽飭令迅速前進楊岳斌務須審度機
宜謀定後動不可徒逞憤兵輕於一擲並著分飭將
領疏通道路將省外回匪擊退隆德縣城爲回匪襲
陷楊岳斌當分兵迅圖克復該縣文武下落查明具
奏鮑超所部兵勇現因擒匪滋擾亟須前往鄂豫助
剿斷難調赴甘省甯夏此時已無軍務卽著穆圖善

分撥得力將士前往靈固一帶勦辦騰出雷正綰譚
玉龍等軍由楊岳斌相機調遣互相援應以厚兵力
林之望前奏彭楚漢等所部十營屢次挫敗是否確
實並著查明具奏叛兵謀變既有三更後沿街呼人
之事羅宏裕何以未立時集勇彈壓該叛兵蓄謀旣
非一日林之望固未能豫籌解散羅宏裕豈竟漫無
見聞並著楊岳斌確切查明持平辦理

楊岳斌又奏言據總兵彭楚漢呈稱二月二十
六日守備裘德成督隊在金鈎口遇賊小勝副
將周鳴高見馬步賊千餘由棗樹坡徑往東灘
遂伏於坡後斷賊歸路黃昏時賊果由原路而
歸伏兵突起斃賊數十名生擒逆首僞元帥馬
從容等七名訊明正法該鎮於三月初七日探
聞金家崖一帶有回衆屬聚拔營往勦適遇狄

逆大股攻撲劉家崖民堡勢甚猖獗是夜四更
乘其不備舍馬斫營而入斃賊數十名我軍陣
亡哨官遊擊劉南瑞一員並兵勇三名因兵力
稍單未能前進又據總兵楊明海呈稱三月十
八日有回逆百五六十騎並步隊四五千入直
撲車道嶺卽令副將張定元等出隊迎勦鏖戰
移時賊勢不支紛紛敗遁我軍乘勝追勦共殺

斃悍賊百餘名奪獲槍刀等件無算惟張定元
中槍陣亡哨官參將會國福同歿於陣勇丁亦
有傷亡等語 臣仍飭該鎮等加意防勦毋稍疏
懈遊擊劉南瑞副將張定元參將會國福臨陣
捐軀均堪憫惻請

旨飭部從優議卹以慰忠魂奏入

上從之

楊岳斌又奏言據提督張在山探有逆回竄至高嶺子圍攻堡寨其後隊在馬家河川內滋擾隨飭在字前營等營由曲子鎮一路截堵馬家河自帶在字親兵等營直趨高嶺子跟縱追剿斃賊數人餘匪繞山越澗而遁路徑險窄未便窮追行至馬家河偵知該逆大股二三千人麕聚寇家塬慕家上塬一帶復率隊馳往該逆倉

皇失措墜崖跳澗舍命狂奔有騎馬悍賊十餘
名回身抵禦張在山親督馬隊刃斃一人追行
七八里餘匪四散無蹤當將寇家塬賊壘十四
處全行焚毀奪獲羸馬驢頭千餘匹斬馘回匪
十餘名生擒九名訊明正法現在慕家上塬巴
子塬環縣附近踞匪悉皆逃遁奏入得

旨知道了仍著嚴飭張在山豫防該匪乘閒復出整頓

部伍遇賊卽擊毋稍鬆懈

十七日乙巳穆圖善奏言臣前將收復甯夏回民

事宜馳奏後甯夏府城內外一律安堵如常平
羅十八堡及各莊堡回民陸續歸業所有唐漢
清惠等渠水利仍令回民捐資修濬業已興工
並籌借牛具籽種俾得及時耕作人心漸定其
靈州城市聞尙未甚蹂躪較之甯郡略爲完善

回日馬朝清卽馬化澂瀝稟求撫應俟奉到

恩旨遵行惟自入春以來探聞甘肅蘭州省城被陝回

馬生彥等四面滋擾阻截運糧多方牽掣致道

路日形梗塞三月二十八日復據報稱三月十

四日寅刻回匪三十餘人爬上靖遠縣城將門

鎖砸開放進賊匪數百名縱火焚燒守城官兵

迎敵失利軍民衝散賊已入協署難民由南門

逃出四五百人等情 臣查靖遠係蘭州府屬縣
距省近在二百里靖遠有失恐省城人心震動

臣紮營甯夏約距靖遠千里鞭長莫及且甯郡
回民甫經分別安插尤須重兵鎮守其竄撲靖
遠賊匪是否卽係前竄鎮番中衛之回逆馬生
彥楊文智等抑係河狄回匪乘閒竊發俱未可
定回目孫義章係陝回孫義保之弟前經雷正

緝收撫其衆無人約束仍派孫義章管帶取名
忠義營雷恆又勸令真心投誠現因雷恆正法
該回衆屬集固原會甯韋州半箇城一帶是否
尙屬安靜或竄赴靖遠已由 臣 確切偵察以憑
調撥截剿提督曹克忠已解鞏昌之圍 臣 當卽
飛咨該提督揀帶精銳就近星馳赴靖剿除踞
匪督 臣 楊岳斌現駐慶陽擬請

飭下楊岳斌迅速督率兵勇將近省滋優之陟

彥等節節掃蕩以期疏通糧路保衛省城臣俟甯靈事局大定確探何路喫緊卽行移師前進會合殲勦奏入

上命軍機大臣傳諭穆圖善楊岳斌曰靈州馬化澂到營求撫前據穆圖善奏到業經降旨准其投誠責令前赴各路開導回民立功自贖穆圖善此時計已接

奉此旨卽著懷遵妥辦勿稍大意靖遠縣城於三月十四日失守尙未據楊岳斌奏報著卽將被陷情形及該城文武下落查明具奏一面抽撥勁旅將隆德靖遠兩城迅圖克復現在該將軍檄調曹克忠馳赴靖遠剿除踞匪惟該提督一軍前諭令馳援省城自當先其所急著穆圖善楊岳斌速飭該提督趕緊援省毋令輾轉貽誤昨因蘭州軍情危急諭令穆圖善

分撥得力將士前往靈固一帶勦辦騰出雷正綰譚
玉龍等軍由湯岳斌調遣茲據該將軍奏俟甯靈事
局大定偵探何路喫緊卽行移師前進會合殲勦與
前旨昭合卽著迅速調派毋誤事機竄陷靖遠之匪
是否係回逆馬生彥楊文智等抑係河狄回匪乘閒
竊發孫義保投誠後雷正綰派令孫義章接統其衆
現在雷恆正法該回衆麴集固原會甯韋州半箇城

一帶是否尙屬安靜抑或竄赴靖遠著穆圖善楊岳
斌確切探明星速馳奏

二十二日庚戌吏部奏言甘肅按察使楊能格自

接辦糧臺後於支發糧餉意爲輕重以致物議
沸騰欽奉

諭旨先行交部嚴加議處應請將甘肅按察使楊能格
照不應重私罪律降三級調用例上加等議以

降四級調用毋庸查級紀議抵奏入

上諭內閣曰楊能格著照部議降四級調用不准抵銷

二十三日 辛亥 楊岳斌奏言上年秋閒雷軍潰散

經譚玉龍攔截招集成營 臣聞譚玉龍打仗頗
好潰勇爲其攔止意必撫馭有方遂卽派令統
率復勉以大義冀其振刷精神認真辦事乃譚
玉龍營規懈弛不以勦賊爲心作事猶豫不決

臣前令其帶隊往援莊浪竟沿途逗留其派防隴州四營忽於初四日夜閒正中營副將羅得勝營勇攻撲正後營副將余炳忠營盤旋又撲左後二營脅衆譁潰以致余炳忠及該二營散去勇丁三百餘人焚燬帳房四十三架遺失器械甚多羅得勝營勇五百人全行潰散並將帳房器械等件盡數捲攜而去查正中營乃劉正

高管帶此次拔往隴州交與羅得勝代管獨往
西安居住劉正高前因甯州案內革職今勇潰
又不在營難保非知情先避相應請

旨將副將羅得勝余炳忠一併革職羅得勝劉正高二
員均請

飭交署陝西撫臣劉蓉就近提訊有無主使情弊再由
該撫訊明分別叅辦查曹克忠威望素著向爲

將士欽服若改歸統帶必能善爲駕馭懇

恩傳諭提臣曹克忠併統譚玉龍所部各營以一事權

而收實效奏入

上命軍機大臣傳諭楊岳斌劉蓉曰譚玉龍自當統領
後性情疲玩不洽衆情以致隴州四營相率譁潰焚
燬帳房遺失器械似此驕縱僨事豈堪再令統帶貽
誤戎行曹克忠威望素著譚玉龍所統各軍著卽交

曹克忠統帶以期得力譚玉龍才略平庸若再不知奮勉卽著楊岳斌據實叅辦羅得勝余炳忠所部各營潰散甚多不能約束著一併革職正中營本係革弁劉正高管帶此次拔往隴州乃交與羅得勝代管而自居住西安難保非知情先避羅得勝劉正高均著交劉蓉就近嚴切訊究如有主使情弊卽著按照軍法從事毋稍輕縱

二十四日壬子劉蓉奏言臣初謂蘭州兵變陝回

或不預謀乃連日接據曹克忠譚玉龍及涼慶涇邠長汧隴等處文武員弁稟報河狄固原會甯諸逆相率蠢動隆德失陷莊浪被圍靖遠華亭併形危急現復擾及慶陽府屬之西峯鎮焦村等處駸駸將入陝疆並據曹克忠牘稱逆酋孫義章等將收降之馬德馨及總兵劉玉昌等

數人戕斃復逼脅靜甯蕭河城等堡降回隨同起事譚玉龍亦稱隆德失守實因雷正綰營中糧臺委員回官馬姓乘閒開城構變則該逆等之始而狙伏繼而蠢動先發難於蘭州誘督臣以必救然後四出紛竄圖併力以趨秦不待智者而後知矣此時爲陝甘兩省計宜姑置蘭州爲緩圖專用力於東北杜平固出竄之路通慶

涇饋運之途後顧無虞再轉而西向督臣忠誠
果毅出於性生聞回涇後曹克忠畫緩取蘭州
之策諸將進暫赴東路之議皆毅然堅持矢志
不奪臣查邠鄜汧隴實轉餉之咽喉平固慶涇
爲通甘之門戶今甘省北自涇州至慶環六七
百里東自蘭州至涇州一千一百餘里賊勢縱
橫連接若督臣繞由秦鞏南路深入省垣無論

前阻堅城後環賊壘糧斷援絕勢無瓦全而現
在隴東一帶譚玉龍張在山等均乏統馭之才
通計四十餘營及平涼慶陽涇州等屬二府一
州之地勢皆遼遠事無稟承稍有疏虞前功盡
棄是督臣此時之去留實兩省安危所繫且甘
回多爲陝逆迫脅今甯靈慶環平固河狄各路
陝回麴萃隴東苟趁此時奮力勦洗將陝省悍

黨埽盪無遺則甘回勢將聞風自戢仰懇

天恩迅飭楊岳斌先將華亭甯州等處保護無虞以次

克復隆德莊浪翦除強寇庶可移師西向由平

固靜會進規皋蘭不宜銳意西趨致誤機局

劉蓉又奏言據穆圖善函稱甯夏漢回已安插

歸業靈州回目馬化澂等亦率衆投誠現派幹

員馳赴靈州查勘辦理馬化澂馬萬選赫壯圖

等皆係甘回馬生彥楊文智任老五孫義章等
皆係陝回急之則合而爲一緩之則分而爲二
等情以臣愚見此時甘回可撫陝回尙無可撫
之機蓋甘回素多愚懦實爲陝逆迫脅與漢人
構怨並不甚深至陝回則狡悍性成屢撫屢叛
倡亂以來屠戮漢民以億萬計卽使曲加寬宥
而陝民念父兄之痛思子弟之仇必不能相安

無事且各屬叛產多經招徠墾種卽彼竭誠歸
命亦斷不能將客民已墾之田拱手相讓如謂
劃分畛域使漢自漢而回自回又安能取各屬
倖存之漢民逼勒移徙空其地以待降回之歸
且前日之怨毒旣深則將來之猜嫌易起今西
安省城所住回民約計五千餘衆安分自守未
與逆黨相通然與漢民同城已不能耦居無猜

開導撫綏頗煩心慮况欲令已叛已亂之逆衆
遠歸故居則他日安插之難不待再計而決矣
現在逆酋孫義章馬生彥等正在勾結巨股悉
衆東趨復迫脅靜甯蕭河城等堡降回隨同起
事惟有痛加剷洗以堅甘回向化之心俟將元
惡翦除再爲撫輯之計至該將軍所稱馬化澂
呈繳器械馬匹爲數無幾誠慮尙多隱匿未必

出於真誠竊查收撫回衆如近日曹克忠洮州之役較爲妥協 臣已將曹克忠來牘咨商該將軍查照伏乞

飭下穆圖善詳察情形分別辦理並派撥馬步二十餘營駐紮靈州鹽茶交界之地俾與督 臣楊岳斌東路各軍遙爲聲援絕陝回馬生彥等勾結之路堅甘回馬化澁等歸順之誠實於大局有裨

奏八

上命軍機大臣傳諭穆圖善楊岳斌劉蓉曰河狄固原
會甯諸逆相率蠢動隆德靖遠既已先後失陷莊浪
華亭並形危急現復擾及慶陽府屬之西峰鎮焦村
等處將入陝疆逆首孫義章等將前所收降之馬德
馨及總兵劉玉昌等數人戕斃復逼脅靜甯肅河城
等堡降回隨同起事爲今之計當專用力於東北杜

平固出竄之路通慶涇饋運之途後顧無虞方可節
節前進卽著楊岳斌派撥兵勇先將華亭甯州等處
力圖保護以次克復隆德靖遠翦除強寇引軍而西
向平固靜會以規皋蘭林之望呼援甚切曾諭令楊
岳斌調派曹克忠督兵赴援軍情變幻無常該督老
於行陣惟當通籌大局穩慎進取方爲不負委任陝
西汧隴等處逼近回氛並著該撫督飭在事將弁實

力防勦無稍疏忽穆圖善前奏馬化澂投誠呈繳軍械馬匹各情是否尙有隱匿該將軍派員查勘必須覈實辦理勿任再有搆煽穆圖善擬俟甯靈一律肅清察看賊勢何路喫重移師過征著卽懍遵前旨派撥馬步各營駐紮靈州鹽茶交界之地與楊岳斌東路各軍遙爲聲援據劉蓉奏甘回素多愚懦此次搆難實爲陝回所迫陝回狡悍性成屢撫屢叛此時甘

回可撫陝回尙不可撫等語並著穆圖善詳察情形
分別辦理無得一味姑息致貽後患

欽定平定陝甘新疆回匪方略卷一百三十二 丙寅年

四月二十八日 丙辰麟興奏言 臣奉

命統帶蒙兵援剿伊犁本不敢稍涉觀望無如該盟長等總以近來西疆不靖差務倍增蒙古窮迫萬難籌調爲詞即使勉強湊集亦屬爲數無多於事無濟惟有懇

恩准由關內各省賞撥數萬勁旅俾 臣統帶進剿並懇

天恩准 臣 來京跪聆

聖訓庶制勝決策有所遵循奏入

上命軍機大臣傳諭楊岳斌麟興曰伊犁軍情危殆萬分待援甚急內地之兵固應迅卽出關而烏城距伊犁較近尤宜簡練各軍以資協助著麟興懷遵前旨將調到蒙兵逐加訓練卽由該大臣統率前往伊犁毋再遲延干咎麟興奉命赴援正應趕緊起程以副

委任乃轉欲來京請訓實屬不知緩急有意取巧
與所請來京陛見之處著不准行仍傳旨嚴行申飭
前諭令楊岳斌於曹克忠軍到省後替出鶴齡之軍
會合成祿出關援剿卽著楊岳斌嚴催成祿帶兵出
關儻該提督再有畏葸遷延卽行嚴叅懲辦至鶴齡
一軍能否替出並著妥籌調派

二十九日巳
楊岳斌奏言
臣自聞蘭垣兵變之

信卽趕由慶陽折回沿途細思該叛兵等既有
變亂之心若卽帶隊赴蘭則彼必畏罪懷疑閉
關抗拒若竭力攻拔勢必玉石俱焚終非萬全
之策因思曹克忠威望素著在省各官亦屢請
其往援遂於抵涇時專弁持文請其就近帶隊
赴省臣仍馳赴平涼與雷正綰商議令其扼紮
固原派兵進剿並將東路諸事布置停妥卽擬

率部西行旋接派往隴州四營潰散之信又據
報稱莊浪被圍隆德失守炭山一股已竄甯州
東事甚急未便抽身西去因迅檄譚玉龍帶領
各營往援莊浪得手後卽進規隆德又令譚玉
明帶隊由平涼折回馳往甯州所屬之秦昌迎
頭截擊平涼城池暫令沈大興分軍防守現在
譚玉龍往援莊浪尙未得有捷報東竄之賊已

被慶防統將張在山擊退餘黨悉歸老巢臣一

面將譚玉明六營仍調回平涼駐守替出沈大

興之軍拔赴前敵助勦雷正綰帶隊已進固城

城中糧餉奇缺臣飭鎮原各縣趕籌運送據該

提督函稱固原諸回情願就撫已派令陝目孫

義章赴鄉催繳會名清冊並器械馬匹孫義章

之叔孫繼榮及頭目劉秉信等共五人亦於十

六日由固來涇向臣處遞稟投誠求歸原籍臣

面加詢問情詞尙屬真切惟回性反覆臣雖批

准尙須詳察陝西撫臣劉蓉定於十七日起程

來涇臣擬在涇州稍俟數日與之妥商一切曹

克忠擬率軍赴省先退逆回再進蘭城囑臣趕

赴鞏昌接辦軍務並籌糧運濟該軍臣已嚴札

鞏秦階道張瑞珍及各州縣迅速籌解隆靜一

帶路途梗塞尙未接其續報想該軍此時當已
徑達省垣臣刻下正在督率諸軍勦清東路並
趕籌糧石分運省會接濟曹軍以期曹克忠早
入省城臣亦卽趕赴省垣妥爲辦理奏入

命軍機大臣傳諭岳斌劉蓉曰楊岳斌行抵涇州
因莊浪被圍隆德失守炭山股匪已竄甯州東路事
急未便抽身西去著卽懍遵前旨速飭曹克忠帶隊

回援將近省回氛次第掃蕩再進蘭垣楊岳斌現在
督率諸軍勦清東路而省城糧食萬分缺乏該督務
當嚴飭張瑞珍等趕辦糧石分運曹克忠軍營兼顧
省城毋稍貽誤曹克忠業已起行該督應否另赴鞏
昌督辦軍務兼籌糧運之處並著酌度機宜妥籌辦
理劉蓉前奏甘回可撫陝回不可撫此次陝回孫義
章等由固來涇遞稟乞降求歸原籍業經楊岳斌批

准如該回等委係真心求撫自應網開一面但人數
尙多旣不便復令回陝別滋事端而浮住甘境亦非
長久之計劉蓉計已到涇卽著該督撫悉心籌畫妥
商安置毋貽後患

三十日 戊午 劉蓉奏言 臣 於四月十八日由省起

程赴涇十九日行抵醴泉接據提督劉玉興稟
報回逆大股於四月十五六日竄入隴州十七

日分由溫水溝塬子頭兩路撲出當卽督率所部英毅軍三營分布北山根一帶列陣迎擊鏖戰數時該逆突出馬隊從山後包抄繞出右營之後致被傷亡二百餘人裏去數十人劉玉興自率前左兩營退至城下奮力抵禦將賊擊退是夜該逆復率衆撲城劉玉興紮營城外扼守署知州湯敏亦督兵團轟擊賊知無懈可乘始

行卻退臣當飛飭提督邱時成等帶隊往勦該

提督等行抵汧陽探悉隴州撲城逆匪續被擊

走退踞州西四十里之咸宜關而汧陽境內寇

冢河一帶已有賊蹤竄擾旋逼縣城邱時成等

督率各營堵禦陣斬逸賊五人賊始披靡追逐

十餘里探知該逆大股盤踞寺溝一帶該提督

等約於二十一日黎明潛師掩擊行至距城五

里之保安堡逆衆已率馬步各隊蜂擁而來邱時成等督隊衝突賊拚死抗拒復糾寺溝悍黨繼至自辰至申鏖戰四時殺斃數十人該逆且走且戰追至新興鋪收隊其時寶雞一路先經臣派總兵蕭德見副將王九齡兩營扼紮縣頭鎮要道以杜逆蹤東竄現據鳳翔縣唐需霖報該逆知大道已經防守遂分馬賊繞由汧陽北

山小路竄踞鹽坎堡一帶岐山境內亦有賊馬

往來臣查前擾甘省甯靈慶環平固河狄之賊

皆陝省西同鳳三郡土著之回轉相勾結徘徊

於華亭崇信靈臺莊浪之間窺伺陝疆已非一

日刻值新麥登場意圖分路回竄飽掠臣現駐

乾州值署西安將軍德興阿派撥佐領色靈阿

帶領滿城馬隊二百員名前來助剿督臣所派

副將洪殿元新練馬隊二百餘匹正將赴甘臣
並飭令由岐山前赴鳳翔以資防禦並飛調潼
關防軍提督劉厚基親兵五營候補道黃鼎彝
字三營迅赴鳳翔會剿尙慮該逆騎隊太多非
步軍所能遏截復飛咨督臣楊岳斌派撥總兵
劉效忠帶領馬隊兩三起由邠乾進截其前並
撥步軍七八營由汧隴追躡其後冀合兩省之

力殄此狂氛

劉蓉又奏言 臣前因蘭州兵變司道各官多被
禁制請嗣後遇有章奏過陝就近拆閱卽將外
閒所聞情形敘述附陳以備

採擇欽奉

諭旨允行 臣此次出省赴涇取道咸陽醴泉乾州一帶
途次適逢林之望奏摺夾板兩件同時過陝當

卽就取拆閱其四月初二日所發之摺言擊退
逼城逆回情形陝中殊無所聞至謂自初三變
後兵民皆視楚軍如仇請以省城左右防勦責
成雷正綰曹克忠兩人將楚軍各營全數調赴
涇原一帶由督臣親自統帶等情似出於近省
兵回之意非該藩司之本心臣查楚軍自赴甘
省紀律頗嚴與地方百姓甚覺相安惟自變亂

以來仍舊駐紮省城左右實爲兵回之所共忌
現在陝回悉萃隴東若改派曹克忠分軍移護
省城而撥楚軍併力東勦以通糧道亦似合此
時權宜應請

飭下督臣楊岳斌籌酌辦理其初六日所發之件言北
山回會馬士彥一股傾心投誠請准其歸併甯
夏一帶與馬化澂等一律辦理或另就甘肅回

居舊地妥爲安插以安反側臣以爲實難遽信
緣此起回逆由陝入甘屢撫屢叛此次投誠之
說該藩司代爲陳請自係釜底抽薪之計查蘭
州省城糧食向恃北山秦旺川一路接濟馬士
彥盤踞日久若果能將此地退出使省城糧米
不致缺乏亦尙未爲失策所慮該逆曾別蓄狡
謀姑以甘言誘我則以後變故仍未可知至甯

夏靈州一帶向被陝回迫脅近日甘回相率投誠若使馬士彥復居其地實慮勾結煽誘併壞穆圖善現辦之局似不如另擇甘肅回居舊地暫爲安插以示羈縻以後再察情形真僞隨時處置應請

飭下甯夏將軍穆圖善會同督臣楊岳斌妥商籌辦

劉蓉又奏言四月十六日省城東南角雷聲大

震煙氣上衝 臣卽親往查勘至清軍廳地方居
人僉稱火藥局忽被雷火轟擊旋據西安清軍
同知張鴻績稟報製造藥局全行震塌計火藥
十萬六千餘斤硝一萬九千餘斤磺二萬一千
餘斤柳炭四千九百餘斤悉被焚燬在局工匠
及撫標領藥弁兵十餘名同時轟斃查火藥爲
行軍要需况值回匪紛竄需用尤急卽使設法

趕造亦屬緩不濟急請

旨飭下湖北河南山西各撥火藥三萬斤迅派委員解
陝以資攻剿奏入

上命軍機大臣傳諭劉蓉穆圖善曰陝省逆回盤踞甘
省日久現復勾結各路大股撲犯陝境隴州汧陽兩
城均經防兵擊退現由小路竄至鳳翔境內邊馬已
至岐山該逆自三月以來徘徊於華亭崇信靈臺莊

浪之閒窺伺陝疆已非一日非厚集兵力不足以遏
狂氛劉蓉現飭各路防兵分投堵截並調潼關駐紮
各營馳往鳳郡一面咨令楊岳斌派撥馬步諸軍截
前躡後卽著楊岳斌劉蓉合力會剿盡殲醜類毋令
擾及陝疆林之望摺內所陳擊退逼城逆回各情據
劉蓉奏稱陝中並無所聞西安距蘭州較遠該藩司
所奏情形是否確實著楊岳斌就近探明具奏該督

所部楚勇爲蘭州兵回所共忌而於百姓則素無積
怨林之望所請將楚軍各營全數調往涇原而以省
城左右防勦責成曹克忠等辦理顯係被叛兵所脅
飾詞入奏並非該藩司本意惟陝回近已悉萃隴東
據劉蓉奏以曹克忠分軍移護省城而撥楚軍併力
東勦以通糧道尙協此時權宜等語卽著楊岳斌統
籌全局酌度情形妥爲調派省城糧米告罄勢頗岌

岌並著楊岳斌飛飭曹克忠購辦麥麩雜糧隨時接濟毋稍遲誤馬士彥由陝入甘屢撫屢叛此次復向林之望投誠該藩司請歸併甯夏一帶與馬化澂一律辦理難保不與該處回匪勾結復生枝節著穆圖善楊岳斌妥商另擇甘省回居舊地暫爲安插以示羈縻火藥被轟至十餘萬斤之多該管局人員漫無防範非尋常疏忽可比著劉蓉查明叅辦

上又命軍機大臣傳諭官文曾國荃李鶴年王榕吉曰
陝省火藥局四月閒不戒於火所存火藥硝磺悉被
焚燬現值回匪紛竄火藥需用甚殷著官文曾國荃
李鶴年王榕吉各撥火藥三萬斤迅派委員解赴陝
西以利攻剿毋稍延誤

劉蓉又奏言提督邱時成等稟報擊退寺溝回
逆後該匪仍盤踞泝邑之新興鋪寇家河等處

經該提督等會商各派隊伍乘夜攻擊該逆驚
惶遽向草碧鎮一路奔竄四月二十二日探知
該逆由草碧鎮小道竄向鳳郡黃里鋪一帶邱
時成當派通判周宏謨等率隊攻擊該逆盡向
洛城河灣一帶奔竄我軍馬步並進斃賊約數
十名生擒二名周宏謨督隊在後遇賊力戰衆
寡不敵受傷殞命二十三日該提督等復追至

離郡城二十里之柳林鋪該逆復列隊抗拒我
軍奮勇迎敵往來衝殺復斃賊數十名等語臣
現飭該提督等奮力擊勦迅殄逆氛其陣亡之
鹽提舉銜候選通判周宏謨力戰捐軀深堪憫

惻請

旨交部從優議卹以慰忠魂奏入得

旨周宏謨著交部從優議卹

同日林之望奏言狄河二州及東路各股逆回
竄踞空心墩等處雖經兵勇先後勦退仍盤踞
距城二三十里以內往來游弋臣與署臬司崇
保等商籌派員潛提糧餉並請提臣曹克忠就
近來援東路車道嶺股匪楚軍堵擊未能得手
督臣前派赴西北路之提督王仁和五營亦在
平番境內久被賊困東西兩路阻塞不通三月

十八十九等日狄河回衆陸續逼城二十日五
鼓賊竟闖西關臥橋口焚燒搶掠二十一日黎
明關入土城是時官民多半斷炊司庫久空如
洗臣等激勵軍民背城一戰委員挨戶湊糧分
給兵勇臣鶴齡豫派協防四川副將陳應有等
帶領川兵會同署蘭州城守營參將陳應春等
督率標兵扼要轟擊斃賊百餘名賊始誓退復

繞水磨溝而南欲據皋蘭龍尾兩山瞰城俯擊
副將張玉春等營豫伏龍尾山下搶上山坡四
墩乘高下擊鏖戰數時斃賊多名另股悍賊又
越皋蘭山至橫溝地方直撲五泉民居臣等飛
調川兵黔勇由東西兩路齊進署督標後營遊
擊德恩亦領標兵出城而南三面兜剿斃賊三
百餘名二十二日賊兩次撲進土城甫經擊退

忽又竄往山南二十三日突由山南越嶺而下

二十六日直撲東關疊經副將張克勝李春身

迎勦擒斬三百餘名奪馬四十餘匹其另股狡
回與海家灘奸民約會混入民居藏匿意圖抄
襲我軍亦經官兵搜殺數十名內應奸回遂乘
夜逃走訊據獲匪供稱逆回已退至岡家營商
請前次來城之阿渾等人趕緊進省議撫又恐

我東路兵到不允特令馬及老三等率馬賊來
援臣等查阿渾頭人等前已允回河狄商議投
誠現各股又來撲犯其反復無常已可概見但
省城食盡援絕支撐殊難提臣曹克忠處經臣
十餘次文催接其三次覆函僅屬臣等設法維
持並言狄河之回現有投誠之請亦經設法羈
縻等語或該回被勦窮蹙因伺省城之釁藉求

緩頰亦未可知 臣等固不敢畏葸不戰亦不敢
拘執一端該回頭目如果傾心前來仍當相機
開導不絕其向化之誠惟東南各路之糧有無
撥運接濟總無消息兵飢勢危大局實不堪設
想 臣等仍當飛催援兵糧餉督率在城文武竭
力籌辦

林之望又奏言陝回馬士彥向充甘肅茶商去

秋由甯夏率衆西來游弋北邊一帶無地安身

自本年正月以後屢遣人來省遞稟求撫時臣

鶴齡駐紮七里河地方因就近輕騎前往剴切

開導據馬士彥稟稱儻蒙允准情願捐辦糧石

以濟軍需並保護北山一帶居民復業種地卽

便勦賊自效鶴齡督同官紳往返再四察其情

詞懇切且所請安插之外並無他說尙係出於

至誠當商將馬士彥先賞給四品頂戴花翎功
牌及茶布等物諭令仍回北山聽候安插現其
所捐糧石已經陸續運省其部下各股回衆亦
能約束守法並稟請准予調遣指勦何處賊股
以便立功贖罪 臣 因權宜辦理札飭卽赴東北
一帶幫同進勦懇

恩俯念陝回馬士彥等尙知悔罪自新准其歸併甯慶

一帶與馬化澂等投誠事宜一律辦理抑或另就甘肅回居舊地妥爲安插以安反側

林之望又奏言楚軍各營皆督臣所募其簡練

未嘗不精但省垣自正二月閒斗米價銀三十

兩楚軍非食米不飽措辦維艱現散紮東路一

帶自兵變後皆視楚軍如仇若任其照舊屯紮

非惟尋釁日多兼恐積爲怨府兵與勇旣不相

安必致民與官亦不相安於大局殊有關繫可

否

飭下督

臣

楊岳斌以省城左右之賊責成提

臣

雷正綰

曹克忠兩人各率勁旅用爲前驅卽將楚軍各

營全數調赴東路涇原一帶合以譚玉龍等所

部以控制西南該處距關中較近飲食較便督

臣力據上游調度策應實爲居重馭輕之道奏

八

上命軍機大臣傳諭林之望曰甘肅省城糧食久缺狄
河回匪數萬環逼省垣焚搶滋擾經鶴齡等督軍奮
擊張玉春等軍分路兜剿疊獲勝仗賊衆敗退剿辦
甚屬出力卽著林之望激勵兵勇扼要嚴防遇賊卽
擊毋得稍有疏虞省城糧米罄盡飢困情形實深塵
系前已疊諭楊岳斌等迅速設法解濟並令其檄調

曹克忠一軍赴省救援現聞曹克忠已購辦麥麩雜糧隨時解送蘭垣而林之望摺內則稱僅接曹克忠三次函覆而於運糧一節並未聲明究竟有無接濟現在如何籌辦並著林之望隨時具奏陝回馬士彥等既據林之望奏稱傾心投誠並將所捐糧石陸續運省是其悔過自新尙屬出於至誠自應寬其既往另予安置本日已諭令穆圖善楊岳斌擇地安插林

之望當靜候該將軍等籌商妥協札飭遵行馬士彥等現經林之望飭赴東北一帶助剿如能將省城糧食源源解運尤足徵向化之誠林之望當激勵馬士彥等勉圖報效力贖前愆至逼城回匪詭言投誠其居心殊不可測林之望惟當就現有兵力認真堵剿不得稍涉大意致墮詭計楊岳斌現在涇州辦理甘省東路軍務所部楚勇自應調赴東路以厚兵力已

論該督迅速調派其曹克忠一軍距蘭較近業經疊
次諭令進援林之望俟該提督到省即可將防勦事
宜與之妥籌辦理

林之望又奏言川兵三營因平涼餉銀被劫川
省撥解愆期上年冬閒在平番一帶餓斃已多
旋因城防空虛由平番調赴蘭州藉資保衛兼
爲就食之計雖由省局借給麩斤總以斗價太

昂難於一飽且不接川餉已逾一年之久兵士
存者皆困莫能支二月閒有餉銀抵鞏之信 臣
鶴齡派兵前往迎提先後凡五百餘人計現在
省者不過六百餘人乃當賊匪屬集之時 臣等
激以忠義竟能以數百飢疲之師禦數千兇悍
之寇實屬異常出力惟前餉未來後期又屆由
川入甘時虞梗塞請

飭下川督設法源源接濟以應急需奏入。

上命軍機大臣傳諭崇實駱秉章曰鶴齡所帶川兵三營由平番調防蘭州省城因糧餉缺乏餓斃甚多川省應撥之餉何以一年之久未經解到該軍現在蘭州勦賊頗能得力亟應源源接濟以固軍心著崇實駱秉章卽將鶴齡一軍餉銀迅速撥解不得稍存膜視現在由川入甘之路時虞梗塞並著咨會楊岳斌

劉蓉添派兵勇協同解餉委員探明道路護送前進
仍一面知照林之望於川餉抵甘時派兵迎提務須
設法解到毋得畏難坐視致誤要需

古今圖書集成

目錄

欽定平定陝甘新疆回匪方略卷一百三十二

丙寅年

五月初一日己未官文奏言道員蔣凝學招勇赴

甘於本年二月內路經鄂省當卽發給帳棚槍
彈火藥等項於二月二十二日起程前進現在
楚省整頓營務備勦髮捻未便鬆勁俟此間接
統有人當於朱南桂劉連捷藍斯明等營內酌
撥赴甘以紓

宸廬奏入得

旨現在甘肅軍務緊要仍著官文等於朱南桂數員內酌派一二員帶兵前往助剿毋得稍分畛域

同日成祿奏言臣去冬駐紮涼州爲規取肅州

之計嗣因永昌告急遂派已革知縣竇型帶隊馳往先固城防復飭趙德正等赴援山丹而東樂城堡卽於是時失守迫我師方次東樂賊已

往圍甘郡維時黎獻一軍由肅州潰敗退駐甘
州賊見黎軍西來我軍東至卽撤圍竄入南山

本年正月初旬臣令竇型督同張超龍進紮距

肅六十里之黃泥堡以遏賊勢又飭已革總兵

慶瑞統營進發駐紮雙井子互爲聲援臣親率

衛隊及新募數營自涼啟行二月初二日已抵
甘郡擬將全隊整飭剋期進逼肅州查黎獻所

轉南北兩營與賊相持一載撫馭乖方衷心不服請

飭楊岳斌令南北兩營歸臣調遣以一號令至黎獻勞

師糜餉久無成功肅甘兩屬紳耆僉以受賄緩

師縱勇殃民爲詞紛來呈控臣已請督臣查辦

該道所領馬步尙有六營弁驕卒橫非加鈐束

萬不可用署肅州鎮黃祖淦年力强富曉暢戎

機若帶領此軍與臣協力勦賊必能收指臂之助

成祿又奏言去冬黎軍潰敗肅城踞逆時出竄擾東南兩路賊卡林列臣正飭慶瑞等督營進

援旋據稟稱二月十二日肅城踞逆突至黃泥鋪分三路直撲我軍奮勇勦殺賊衆敗退十三日復圍我營經慶瑞等飭令各營出隊迎擊賊

三國志卷之三十三
三
衆敗走慶瑞等率隊壓追擒斬五百餘名奪獲
槍礮羸馬甚夥已革總兵銜副將王夢齡藍翎
把總秦飛龍礮子洞腹立時陣亡請

旨飭部從優議卹王夢齡係遣戍新疆之員如蒙

加恩寬免仍照總兵陣亡例議卹出自

迺格鴻施現在我軍乘此聲威進紮臨水俟東南逆營

掃蕩當節馳赴前敵奏入

上命軍機大臣傳諭楊岳斌成祿曰甘涼一帶賊壘林立經成祿派撥已革知縣竇型等帶隊陸續由涼州前進進紮黃泥鋪已革總兵慶瑞等進紮雙井子互爲聲援將疊次撲營之賊先後擊敗追殺甚多著成祿乘此聲威激勵諸軍迅將肅州城垣攻克毋稍遷延伊犁被圍日久危急萬分該提督於攻克肅城後卽當星夜督軍出關馳援新疆各城以解倒懸不得

少存觀望道員黎獻前已有旨令楊岳斌察看如不
勝任卽由該督叅奏現據成祿奏稱該員被肅甘兩
屬紳耆控告有受賄緩師縱勇殃民等情情節較重
著楊岳斌確切查明據實嚴叅不得稍事徇隱所有
黎獻前轄之南北兩營均著專歸成祿調遣卽由該
提督派員管帶其黎獻所領之馬步六營卽著交署
肅州鎮總兵黃祖淦帶領申明紀律嚴加鈐束此次

在肅州勦賊陣亡之已革總兵銜副將王夢齡著加
恩開復原官原銜交部照陣亡例議卹把總秦飛龍
著交部從優議卹該提督前次奏請以降調鎮迪道
文麟督辦行營糧臺文麟現已簡放哈密辦事大臣
著楊岳斌趕緊另派妥員前往經理該軍營糧臺事
務並飭甘涼兩府地方官將該軍營日食麩斤草料
就地設法供支源源協濟不得稍存玩視

初八日

丙寅

劉蓉奏言據各路探報回逆分前後

兩股招誘潰勇東趨前股係逆會崔三統帶約

四五千入叛弁袁奎等附之已竄鳳歧一帶後

股係逆會穆三統帶約萬餘人叛弁李朝慶附

之由水落城故關撲出分踞隴境臣卽飛飭提

督劉玉興會同署隴州知州湯敏嚴密堵禦督

飭提督蕭德揚邱時成率隊迅掃鳳翔各處踞

匪仍令總兵蕭德見副將王九齡兩營扼紫縣頭鎮杜其偷越渭河之路催調提督劉厚基等齊集鳳郡聽臣親往督辦旋據蕭德揚等稟報該逆崔三等於四月二十三日被勦後退屯董家河孫家堡一帶經該提督等派隊將兩堡攻克殺斃百餘名逆回紛紛向汧屬之老爺嶺翻山逸去蕭德揚督隊跟勦至汧屬之倉房溝逆

首崔三馳馬抗拒我軍傷其右手追斬五百餘人拔出被擄難民千餘人二十五日追至甘肅靈臺縣之新集鎮探悉逆衆分散四竄始振旅而還其後隊穆三巨股方踞隴州近城白牛堡太沖堡等處刈麥劉玉興與湯敏商定乘夜斫營鼓譟直前穆三率衆西遁死傷多人遺棄羸馬牛羊甚衆隴州境內一律肅清又據報稱陝

回由靜甯西北曹婺川一帶結衆東趨約二三
萬人臣現派黃鼎等分率各軍駐紮隴州汧陽
及汧陽交界之縣頭鎮邠州之亭口鎮而以邠
時成與色靈阿滿城馬隊共紮鳳翔郡城以備
策應並咨催漢中鎮總兵蕭慶高進紮鳳郡劉
厚基一軍督駐省會兼顧東西兩路防務隴州
汧陽與靈臺崇信交界之區山徑紛歧現飭各

軍探明路徑並逆匪巢窟所在再爲越境雕勦
之計在事出力員弁可否由臣存記彙案擇尤
請獎出自

天恩奏入得

旨覽奏均悉仍著督飭各軍嚴防回竄並挑選精銳越
境雕勦掃蕩逆巢在事出力員弁准其存記彙案擇
尤請獎勿稍冒濫

劉蓉又奏言督臣楊岳斌接曹克忠函述蘭州

城中飢窘該提督軍中乏食未能起程赴省須

督臣親至鞏昌辦糧接濟庶可抽身前往楊岳

斌遂單騎西行臣此次馳赴涇州本期與楊岳

斌商度隴東戰守事宜今督臣旣已赴鞏臣自

可無庸往涇惟涇防爲東路總匯不可無員鎮

涇適甘肅安肅道蔣凝學率所募楚軍二千餘

聞

人行抵武功臣卽檄飭由邠長徑趨涇州駐紮
藉遏狂氛奏入報

劉蓉又奏言頃據派防保安之鎮西軍同知鄢
太愚稟稱回逆盤踞該處之吳家口三合棠一
帶經該員督率各營進剿該逆聞風逃遁並據
派防定邊之總兵段登雲稟稱回逆竄踞該處

西南之黨家塬藥王洞狼兒溝等處該總兵率
隊進攻斃賊百餘名餘衆逃竄又據派防鄜州
邊境之總兵楊得勝稟稱回逆由油源竄至二
將城距該營約百餘里該總兵現派隊進據合
水縣屬之華池隘口列陣以待等情 臣查該逆
股數衆多沿邊窺伺東北各路山徑叢雜實屬
防不勝防陝省兵力旣單惟有督飭防邊各將

聞

互相策應相機迎勦以靖逆氛奏入報

初十日戊辰穆圖善奏言靈州前被逆首馬兆沅

等轟陷漢民逃散嗣經回弁馬朝清卽馬化澂
等設計將馬兆沅殺斃嚴禁靈回不准出外滋
事地方粗安本年三月馬朝清在臣營捐交銀
米呈繳軍械馬匹哀懇投誠並據靈州紳耆以

近日漢回陸續歸業呈請設官安撫 臣當委前
中衛縣知縣尹泗代理靈州營參將朱子峻赴
該州任事復派佐領豐紳等前赴該州查看倉
庫據稟尙未損壞並據甯夏副都統金順查明
該回民金積堡並無私藏器械現在州城收復
漢民安堵如常

穆圖善又奏言據探報三月初三日督標兵丁

因數月未給口糧聚衆變亂陝匪聞風到河北
廟灘橋頭一帶聲言來解兵勇之危經林之望
等准其投誠始撤隊離省聽候安插初十日河
狄各回麴至兵勇聞風潰散賊匪在省城西稍
門外大肆焚殺幸漢回紳士前往開導賊始暫
退等語臣接閱之下萬分焦急聞楊岳斌出省
前赴涇州慶陽時陝回於途中遞稟投誠楊岳

賊不肯批准該匪等衆逾數萬無路可歸到處
剽掠以致鹽固等處逆氛徧地臣竊以爲甘省
兵連禍結起於陝回竄入陝回一日不靖甘回
一日不安奈陝省漢紳嫉回如讐不願議撫地
方官吏曲徇衆情現在甘省產糧之區皆因設
兵不能耕種大營買糧遠在千餘里萬一兵糈
告匱何變不生靈州回弁馬朝清已准投誠其

平涼通渭伏羌各縣回民亦由馬朝清代遞稟
呈哀求收撫 臣擬委知州曹熙帶同馬朝清馳
赴各路相機妥辦請

旨飭下陝甘總督楊岳斌陝西巡撫劉蓉悉心體察分
別招撫並

密飭楊岳斌慎固省垣毋再別生枝節奏入

上命軍機大臣傳諭穆圖善楊岳斌劉蓉曰靈州回弁

馬朝清捐交銀米繳械投誠經穆圖善派令佐領豐紳等前往收復州城委知縣尹泗等代理知州參將等缺並查明該回民金積堡並無私藏器械現在漢民安堵如常辦理尙妥卽著穆圖善楊岳斌督飭該處地方文武將撫恤難民清查地畝一切善後事宜妥速籌辦以期各安生業所陳省城兵變各情與楊岳斌前奏大略相同其河狄各回撲犯省城亦經諭

令楊岳斌催督曹克忠帶兵進援穆圖善所稱陝甘
回衆宜分別招撫楊岳斌前赴涇州時陝回於途中
遞稟投誠該督不肯批准該回衆逾數萬到處剽掠
以致鹽固等處逆氛徧地等語朝廷於回衆本無岐
視如果真心悔罪自當予以自新惟陝回竄甘者陝
省旣不能相容甘省自當妥籌安插著楊岳斌劉蓉
恪遵前旨悉心籌辦以期節餉休兵無得偏執平涼

各縣回民均由馬朝清代遞稟呈乞撫穆圖善擬委曹熙帶馬朝清馳赴各路相機妥辦並著該將軍總督等和衷商辦無致勦撫兩歧

十三日 辛未 楊岳斌奏言賊酋孫義章馬殿甲等

現經 臣 與雷正綰暫示羈縻尙未出擾惟崔三一股自陷隆德圍莊浪後急思還陝時逞兇鋒前派譚玉龍往援莊浪並攔其東竄詎該回逆

翻山越澗竄及隴州不數日遂及鳳岐臣令劉

效忠率隊擊退該逆又竄回甘境擾及南路並

有馬隊由華亭縣所屬馬峽口小道橫突而過

勢復東趨臣卽飛咨撫臣劉蓉以重兵嚴防汧

隴督飭劉效忠赴陝與洪殿元馬隊蔣凝學步

隊會合協同陝軍竭力追勦復調陳德隆迅率

陝防數營卽赴馬峽口扼紮截其後股踵竄之

路至慶陽府屬等處已飭張在山所部十數營
隨機防勦復以沈大興數營扼平涼譚玉龍十
餘營由莊浪進擊規復隆德現在省北之靖遠
北山省南之河狄省西之西甯肅州省東之金
安會靜賊股屬集連接曹克忠函謂該軍糧缺
殊甚深慮飢譁且竄賊時窺馬營通渭圖擾南
路臣擬暫赴鞏昌力籌軍糧俾曹克忠迅速抵

蘭以救根本奏入

上命軍機大臣傳諭穆圖善楊岳斌劉蓉曰逆回崔三
竄擾鳳岐經陝軍擊退旋復回竄甘境現又有回逆
馬隊由華亭所屬馬峽口小道橫突而過勢復東趨
該逆食匱計窮時思竄擾陝疆以圖狂逞汧隴一帶
前經劉蓉派令蕭德揚等分投防守蔣凝學所部楚
軍前由邠長徑趨涇州計已到防著楊岳斌劉蓉卽

飭各軍聯絡聲勢探明賊蹤合力兜擊毋令闖入陝
疆復形滋蔓並著楊岳斌責令譚玉龍迅速進兵將
隆德縣城力圖攻拔節節掃蕩疏通糧路孫義章馬
殿甲等既有反正之意自當暫示羈縻俾免與各股
逆匪勾結楊岳斌仍當妥籌防範勿稍大意平涼地
方雖有沈大興數營扼紮恐兵力尙單現在靈州回
弁馬化澂已經投誠東北一路漸次綏定著穆圖善

仍遵前旨酌撥兵勇分紮鹽固等處與平涼官兵互相策應以免賊匪再圖窺伺曹克忠一軍現在曾否進省楊岳斌現赴鞏昌籌運糧餉務當源源接濟俾免匱乏省城一帶羣回環伺應如何分兵防剿之處並著妥籌布置毋稍疏虞

十四日 壬申 穆圖善奏言刻下省城變出非常全

局震動楊岳斌此時必須謀定後動若遽爾回

省查辦亦當嚴防省中叛兵勾結陝回馬生彥
等及鹽固河狄各回衆羣起抗拒可否

飭令楊岳斌暫緩進省並請

簡派威望大臣馳赴蘭州省城一面嚴扼陝回及河狄
回衆不使勾結滋亂一面設計安輯省城軍民
責令獻出倡亂首惡數人正法示衆用昭炯戒
奏入得

旨該將軍籌辦各情昨已有旨寄諭矣該將軍仍當恪
遵前旨進兵平固等處相機勦辦迅殄逆氛以副委
任

十六日甲戌塔爾巴哈台領隊大臣圖庫爾奏言

呼畢勒罕喇嘛棍噶札拉叅援救塔城患病初

愈正在移營二月初七日忽有逆回馬步數百

並哈薩克等前來撲犯臣等當卽督兵抵禦奈

官兵因糧絕食乏抵禦不往致將營盤失陷二十六日夜閒該逆復攻破塔城參贊大臣武隆額力戰陣亡臣等實深惶悚相應請

旨將臣等從重治罪至武隆額力竭捐軀忠義可憫懇恩從優賜卹以慰忠魂現在臣等收集各游牧並額魯

特烏梁海等處兵丁七八千人豫備攻戰口食牲畜雖費籌畫當與棍噶札拉叅設法辦給惟

此項兵丁應在何處駐紮伏乞

訓示遵行

圖庫爾又奏言喇嘛棍噶札拉叅前經參贊大臣武隆額頒給關防令其辦理軍務該喇嘛以並未入奏爲疑伏查蒙古官兵游牧野處紀律毫無惟知崇信喇嘛現值多事之秋請仍令該喇嘛棍噶札拉叅執掌關防以資統帶

同日廣鳳奎昌奏言據報二月二十六日夜間
塔城被回匪及哈薩克攻陷領隊大臣圖庫爾
帶領額魯特男婦數千移至科屬烏梁海土爾
扈特地方紮營咨請調撥兵馬前往伊犁 臣查
塔城淪陷理應卽時援救何以圖庫爾私出本
境欲往伊犁且來咨含糊支離殊難憑信相應
請

旨嚴飭該大臣等迅將所帶人衆折回原處力圖收復
均奏入

上命軍機大臣傳諭明誼麟興車林敦多布廣鳳奎昌
明瑤李雲麟圖庫爾布爾和德德克吉訥曰塔城被
困日久該逆突於二月初七日糾同哈薩克撲陷官
軍營盤旋於二十六日攻破城池圖庫爾有帶兵之
責乃於賊匪攻撲塔城並不趕緊救援以致城池失

陷實屬咎無可辭著先行交部嚴加議處圖庫爾旣
聞塔城失守之信卽應商同棍噶札拉叅督率官兵
力圖克復乃竟帶領額魯特等移至科屬烏梁海土
爾扈特地方竟置塔城於不顧尤屬荒謬棍噶札拉
叅從前勦賊頗能得力業經有旨賞給呼圖克圖名
號此次因病移營遂致失利尙屬可原著圖庫爾卽
行商同該呼圖克圖統率額魯特蒙古官兵迅回舊

地挑選精銳規復塔城力圖自贖儻再遷延不進定
將圖庫爾從重治罪決不姑寬武隆額前給棍噶札
拉桑關防著准該呼圖克圖執掌以資統帶圖庫爾
等移營西進需用糧食軍火等項著廣鳳奎昌迅籌
撥給俾利通行本日已諭令山西巡撫趙長齡將晉
省應解新疆協餉並添籌火藥軍器陸續由烏城轉
解一俟解到廣鳳等卽源源運解毋稍延緩塔城被

困年餘明誼麟興車林敦多布廣鳳奎昌坐視鄰境
之危並不設法援應以致終於淪陷亦屬有負委任
著傳旨嚴行申飭現在塔城旣失難保該匪不伺隙
東趨烏科兩城防守亦關緊要著明誼廣鳳等豫籌
布置嚴密防維勿稍疏懈廣鳳現在病假未滿本日
已降旨令奎昌署理科布多參贊大臣其幫辦大臣
就近令明瑤署理該大臣等責無旁貸務當力圖振

作毋得因循苟且坐誤事機塔爾巴哈台參贊大臣
已簡放德興阿未到任以前令李雲麟署理李雲麟
係棄瑕錄用之員尤當激發天良勉圖報稱著卽率
同圖庫爾等迅速前進規克塔城布爾和德德克吉
訥均在科境並著幫同李雲麟等前赴塔城辦理剿
匪事宜不得遷延觀望致干重咎

上又命軍機大臣傳諭趙長齡曰塔爾巴哈台城被回

匪攻陷圖庫爾收集潰散並額魯特蒙古七千餘人
退至科布多境內該城存項無多不敷分給亟須迅
籌接濟著趙長齡卽將各省解到新疆餉銀並晉省
應協之餉迅速派員解赴綏遠城咨照該城將軍剋
日設法轉運烏城由明誼等撥解科布多發給圖庫
爾等以拯飢困其軍火米麪並著添籌若干陸續趕
解不得稍分畛域致誤要需新疆各城大半淪陷須

由科布多轉運糧餉以便圖庫爾等力圖恢復趙長齡務當顧全大局隨時接濟毋稍膜視

上又命軍機大臣傳諭楊岳斌成祿曰塔爾巴哈台城被回匪攻陷額魯特人衆逃至科城關外情形日益糜爛成祿奉命西征爲日已久乃因肅州未復節節逗遛楊岳斌身任兼圻勦辦回匪是其專責並不選派勁旅協同成祿規復肅州以致關外各城援絕被

陷楊岳斌成祿均著傳旨嚴行申飭楊岳斌計已行
抵鞏昌著卽飭曹克忠馳赴蘭州妥籌布置並選派
得力兵勇前赴肅州一帶勦洗催令成祿迅速出關
將各路回匪次第掃蕩儻再玩延必將成祿治罪懷
之

上諭內閣曰塔爾巴哈台參贊大臣武隆額於賊匪攻
城時力戰陣亡深堪憫惜武隆額著照都統陣亡例

從優議卹

欽定四庫全書

卷三十三

欽定平定陝甘新疆回匪方略卷一百三十四 丙寅年

五月十七日 乙亥 總理各國事務衙門奏言接據

署伊犁參贊大臣榮全等咨報伊犁大城於正月二十二日失守閣城官員殉難現籌恢復伊犁固守塔城等情咨請代奏 臣等查該處失守總由兵孱餉絀應請

飭下烏里雅蘇台將軍明誼遵奉前次

諭旨迅派精兵六千名星夜馳赴塔城會商榮全計圖
收復其附近伊犁南北各城應一併嚴密防範
慎勿墮逆回求和詭計以待大兵雲集併力兜
剿伊犁軍務雖與別處情形不同總以厚集兵
力爲尤要應請

飭令甘肅前派官兵一併馳赴該處會同明誼大軍相
機妥籌奏入

上命軍機大臣傳諭神機營主大臣庫克吉泰穆圖善
德興阿劉長佑曰據總理各國事務衙門奏接據榮
全咨稱伊犁大城於正月二十二日失守等語現在
伊犁兩城既經失陷若不迅調勁旅前往勦辦難保
該逆不駸駸東犯大局益難收拾庫克吉泰前經簡
放西安將軍現在行抵何處卽派該將軍督辦新疆
北路軍務取道草地由烏科兩城進發神機營兵及

直隸綠營官兵素經訓練勦賊必能得力卽著神機
營王大臣劉長佑商同將旗綠各營共湊調兵二三千
名派員管帶由北路草地前赴科布多聽候庫克
吉泰調遣所需軍火器械等件著該王大臣及該督
妥籌應付以便遄行甘肅甯靈現已安定情形稍鬆
著穆圖善先其所急挑選精兵一二千名遴派得力
將領卽由甯夏北路取道出口馳赴科布多會齊一

併歸庫克吉泰調遣不得稍有延誤穆圖善辦理招撫事宜何時可以竣事能否酌留兵勇彈壓甯靈等處降回而自率精兵與庫克吉泰會剿並著該將軍通盤籌畫奏明辦理德興阿昨已有旨補授塔爾巴哈台參贊大臣卽著迅速起程赴任毋稍延緩

上又命軍機大臣傳諭明誼麟興車林敦多布廣鳳奎昌明瑤李雲麟圖庫爾楊岳斌成祿曰伊犁大城困

守已久終以援兵不至爲賊攻破明誼等坐視鄰封
之危不思設法援救實堪痛恨本日已令西安將軍
庫克吉泰督辦新疆北路軍務並令神機營王大臣
直隸總督挑選旗綠各營精兵數千前赴科布多聽
候庫克吉泰調遣惟道路遼遠庫克吉泰由廣東副
都統升任西安將軍一時尙難行抵新疆明誼麟興
車林敦多布廣鳳奎昌明瑤務當就現有兵力將烏

科兩城防守事宜妥籌布置麟興並遵前旨將調到
蒙古官兵趕緊訓練剋日統帶前赴李雲麟等軍營
妥籌規復伊塔各城現在時勢已急所調蒙兵亦不
拘定六千之數致滋遲誤伊犁將軍已令榮全署理
榮全未回以前卽著李雲麟暫行代辦將伊城潰散
兵勇設法招集重振軍威塔爾巴哈台城卽責成李
雲麟圖庫爾等督同呼圖克圖棍噶札拉叅統率額

魯特等蒙兵迅卽前進力圖攻拔一俟塔城收復卽
行合兵進規伊犁爲次第掃蕩之舉廣鳳奎昌明瑤
仍將圖庫爾等糧食軍餉籌畫撥給毋稍歧視至各
省指撥伊城餉銀已諭令戶部咨催各該督撫迅解
烏里雅蘇台由明誼等酌量緩急均勻撥用新疆全
局糜爛非南北兩路合力進剿不足以挫兇鋒著楊
岳斌懍遵昨日諭旨迅派得力兵勇前赴肅州一帶

勦匪以便成祿迅速出關將各路回匪以次掃除儻成祿仍事稽延必當重治其罪鶴齡一軍本爲出關之用曹克忠抵省後卽可騰出此軍西行助勦著楊岳斌相機調派毋稍玩延

上又命軍機大臣傳諭榮全曰伊城業經失陷自應迅圖規復以冀挽回西陲大局關內之兵相距窳遠雖經疊催成祿等剋期出關恐其到尙需時本日復諭

令烏里雅蘇台選撥蒙古兵由該城大員統帶前往
伊犁將軍卽著榮全署理以重事權榮全現署伊犁
將軍責任綦重其中進止機宜務須審機度勢以策
萬全榮全未到任以前伊犁將軍篆務已諭李雲麟
代辦並令庫克吉泰統帶內地旗綠官兵由草地先
至科布多城整頓土馬大舉西征矣現存喀帕兒庫
內及斜米等處餉銀旣經榮全派員看守自必妥協

此項餉銀轉輸匪易如有亟需之處准由榮全酌量
提用毋得稍事虛糜

上又命軍機大臣傳諭明誼李雲麟曰本日所寄榮全
諭旨印封一件係由烏里雅蘇台轉遞卽派明誼揀
派能事委員一二人將接到印封資送榮全拆看並
密飭派往委員傳知該署將軍相度機宜先行馳赴
伊犁邊境收集潰兵遣勇整練成軍李雲麟亦卽統

率所部迅拔塔城會同麟興督催蒙兵前赴伊城與
榮全合力規復伊犁李雲麟代辦伊犁將軍事務身
膺重寄尤當迅速圖功力顧全局不得遷延觀望坐
誤事機

二十三日辛巳劉蓉奏言臣旋省後接據提督劉

玉興等稟報回會馬生彥孫義章等糾集靖遠
靜甯固原隆德各處巨股陸續竄至隴州其前

經敗竄之穆三崔三馬萬祥等亦卽折轉盤踞
固關咸宜關神麻鋪曹家灣太沖峪王馬嘴高
嶺子白牛峪高方菴蒲峪川等處村堡蔓延數
十里聲稱先踞隴州爲巢穴拚死竄擾陝中臣
先派提督蕭德揚率湘果左翼軍駐紮汧陽副
將洪殿元率精騎營馬隊駐紮邠州之亭口鎮
均在鳳翔未發迨爾回逆環竄之信當卽會同

派紮鳳郡之邱時成各率馬步拔赴隴州 臣亦

飛催黃鼎督率彝字全軍並前紮縣頭鎮之蕭

德見王九齡兩營兼程前進以厚兵力劉玉興

湯敏在隴州城內督飭勇團登陴防守該逆峰

擁來撲城上槍礮齊施賊卽卻退另股已向東

奔維時蕭德揚邱時成洪殿元各率馬步由草

碧鎮進發適與賊遇列隊衝擊該逆勢不能支

奪路向西奔竄蕭德揚等亦卽分路追至杜陽
河該逆後隊踵至回旗猛撲我軍分隊禦之洪
殿元手刃悍賊數名各軍奮進共斃賊三四百
名生擒八十餘名奪獲旗幟羸馬甚多該逆悉
向隴州敗竄劉玉興督隊出城夾擊城外之賊
相率遁去蕭德揚等駐軍晁家坡探悉高陵子
麻黃鋪一帶逆賊已率馬隊前來蕭德揚命參

將蕭玉田列隊北阜以禦北路之賊張英衡率
右營當其中路劉玉興毛福益蕭德見王九齡
等各率隊伍排列河干蕭德揚邱時成洪殿元
等督率馬步親兵往來策應並飭隴州團練分
列後隊以壯聲威該逆見我軍陣勢整齊隨將
藏匿樹林馬賊左右抄出我軍屹立不動相持
數時賊氣頗疲蕭德揚等傳令進剿該逆紛紛

敗竄次日該逆復調集各路馬步悍賊約二萬餘人由小河東南隅抄出我軍營壘之後蕭德揚等督飭馬步各自爲陣逆騎往來馳驟我軍堅陣不動俟其逼近始將槍礮轟擊該逆見無隙可乘悉向北面太陽溝併力衝突參將蕭玉田奮勇衝鋒手刃悍賊數名百長夏忠堂周玉龍率隊繼進賊勢披靡正在鏖戰蕭玉田忽中

槍陣亡蕭德揚急率前左兩哨橫貫賊陣截爲
兩股適黃鼎督率彝字全軍趕到整隊繼進士
氣愈奮共計斃賊二百餘名賊衆分竄帶傷而
逃者無算我軍傷亡亦多繼又探悉該逆分股
一由王家背竄踞蒲峪焦家山太沖峪白牛峪
一帶圖犯寶雞一由閻家灣竄踞白家灘麻子
山把關口溫水溝一帶圖趨汧陽蕭德揚等亦

移營由北而南自晁家坡至南源河岸分築十
餘壘以禦之該逆復分馬步數起各萬餘人直
衝河岸蕭德揚率師先據坡頂分派各弁列於
太陽溝左右賊騎衝突而前我軍用劈山礮擊
中白巾賊酋兩名餘衆扶創飛奔洪殿元策馬
追逐左腕中槍不及而返查此次逆回因甘省
糧食窘乏糾結各處黨羽空壁而來衆至四五

萬人我軍逆擊於隴州者合馬步不滿七千而
該逆馬隊已分股由麟游繞至鳳翔屬之橫水
鎮石羊鋪汧陽屬之杜陽鎮巴都等處臣現飛
飭劉厚基率親兵五營折赴鳳翔以遏橫水石
羊一帶之賊並咨催漢中鎮蕭慶高率湘果三
營趕赴寶雞以截杜陽巴都一路之匪復飛咨
督臣楊岳斌甯夏將軍穆圖善各撥馬步大枝

赴陝會勦庶期兩面夾擊以收合圍聚殲之功
此次參將蕭玉田奮勇捐軀深堪憫惻應請

旨交部從優議卹以慰忠魂

劉蓉又奏言逆酋馬生彥前踞靈州金積堡今
歲三月竄陷靖遠孫義章久踞固原其身股竄
陷隆德今皆棄城挈眷東竄其他靜甯會甯渭
源華亭莊浪首陽場蕭河城等處之賊亦皆互

相糾結傾巢而來計陝回之擾甘者所存無多
就賊勢而論前散而今聚因思歸之衆懷狂逞
之心所謂必死之寇其勢若不可禦就勦賊方
略而論與其令賊分踞城池遍布要害勦一處
復有一處翦一股又聚一股攻城擣堅曠日持
久又不若使賊麇聚一隅合圍野戰之易於奏
功且逆匪前擾甘省陝邊到處設防每思派兵

越境鷓擊苦於防兵難撤糧運難通今幸竄入
陝邊正可變防爲剿轉運軍糧亦易爲力誠合
陝甘兩省精銳併力圖之或亦天滅此賊之會
伏懇

聖恩卽飭甯夏將軍穆圖善先令副都統金順督帶各
起馬隊迅由定邊取道邠長趨赴鳳翔隨卽分
撥得力步隊繼進並

飭下陝甘督臣楊岳斌先撥現駐秦州之提督王得勝

一軍由蓮花城趨赴隴州仍抽調各路得力勁
旅親督會剿如能於數月之間將此巨股悉數
殲滅則甘回固將望風傾附而陝回餘孽歸於
先聲亦可成迎刃而解之勢矣

劉蓉又奏言逆回馬隊由汧陽黃里鋪竄至距
鳳翔數里之十家營古城一帶當經提督劉厚

基派防郡城之西安滿營佐領色靈阿帶隊出
城甫抵玉皇閣逆騎千餘四面抄至參領恩祥
當先迎敵受傷陣亡劉厚基由武功兼程馳至
列隊接仗賊騎分三股來撲各營分頭截擊擒
斬數名奪獲賊馬十餘匹餘衆悉遁劉厚基正
欲入城忽聞後路軍裝車輛弁勇被賊圍困劫
去礮位該提督立率親兵馳救突入重圍該逆

馬隊愈來愈多層層包裹劉厚基往來馳擊殺斃悍賊數十名身受矛傷十餘處始將礮位車輜奪回該逆以大隊牽掣隴軍另以騎賊繞路分竄誠慮闖入腹地益肆鴟張陝省別無騎兵可資抵禦查穆圖善所統甯夏馬步五十餘營休息日久而金順所領馬隊最爲得力現在靈州續經招撫安帖請

旨飭催金順帶領各起馬隊兼程來陝以資埽蕩黑龍
江參領恩祥力戰捐軀殊堪憫惻並懇

飭部從優議卹以慰忠魂

劉蓉又奏言甘省逆回董幅祥高萬鎰叛弁會
得勝等聚衆萬餘竄踞安化屬之棗子扁王家
凹范家凹黑老虎山一帶地方經派防保安定
邊麟州之同知鄒太愚總兵段登雲楊得勝等

定議越境會剿各率隊伍前進四月二十二日
抵王家凹該逆設伏要隘列隊山頭懸互十餘
里我軍分路併擊並出奇兵越溝翻嶺橫擊其
腰該逆勢不能支敗至危凹回旗抗拒我軍直
前迎剿陣斬悍賊十餘名餘匪紛紛逃竄我軍
追殺十餘里斃賊千餘名解散脅從亦以千計
並截獲賊會眷屬就地正法我軍稍有傷亡二

十五日回逆由甘屬之三道川竄擾蔡家澗龍
鳳掌林家園吳家水口等處該二將親率各營
由頭道川二道川三道川捲旗疾進出其不意
四面掩擊該逆左右衝突奪路狂奔我軍跟蹤
追殺勇氣百倍復斃賊五百餘名墮巖落澗死
者無數查此股回逆馬隊衆多東擊西竄飄忽
靡常該處地勢遼闊山徑紛歧防不勝防該將

三原王義臣之戰一百三十四
十三
等身先士卒越境雕剿邊陲藉以肅清實屬著
有微勞鎮西軍疊次冒險遠征勞績尤著所有
尤爲出力員弁可否由 臣彙案保獎出自

天恩奏入

上命軍機大臣傳諭穆圖善楊岳斌劉蓉曰逆回馬牛
彥孫義章等糾集靖遠靜甯等處巨股陸續竄至隴
州經劉蓉派令蕭德揚黃鼎等迎擊屢獲勝仗該逆

馬隊分股由麟遊繞至鳳翔勢頗蔓延駸駸有內竄
腹地之勢劉蓉現飭劉厚基率親兵五營折赴鳳翔
並令蕭慶高率湘果三營趕赴寶雞著卽催令該二
軍趕緊前進迎頭截剿隴州賊衆兵單該撫務當督
飭蕭德揚等奮力堵剿勿稍大意陣亡之參將蕭玉
田黑龍江參領恩祥均著交部從優議卹此次賊衆
傾巢犯陝計圖大逞較之各聚一隅似易殄滅惟陝

省只此兵力若任其內竄又將不可收拾著穆圖善
先撥金順帶領得力馬隊由定邊取道邠長馳赴鳳
翔隨卽分撥得力步隊繼進竄甘逆回現俱棄城輟
眷回竄陝境甘省情形稍鬆著湯岳斌先撥駐秦州
之王得勝一軍由蓮花城趨赴隴州仍抽調各路得
力勁旅親督會剿務須趁各逆會濶聚之時合力兜
剿以收聚殲之效甘回董幅祥等竄踞安化屬之棗

子礪等處同知鄢太愚等越境會勦出奇制勝屢次
獲捷鎮西軍疊次冒險遠征勞績尤著所有尤爲出
力員弁著劉蓉彙案覈實保獎毋許冒濫

同日塔爾巴哈台領隊大臣圖庫爾阿隆阿伊
犁領隊大臣布爾和德棍噶札拉叅奏言查前
任參贊大臣武隆額於去歲七月內奏請

飭下烏里雅蘇台將軍科布多參贊大臣在所屬蒙古

官兵內各派精壯官兵一千名前來進剿並由
科布多倉存糧石內撥糧五千石交官兵解運
塔爾巴哈台以便兵民食用迄今半年之久官
兵既未前來糧石亦未解到疊經 臣等咨催未
據咨覆伏思行軍剿賊事關緊要現在公同商
議 臣圖庫爾布爾和德擬暫留游牧管束蒙古
臣棍噶札拉叅阿隆阿擬同往科城請兵剿賊

赴援伊犁奏八

上命軍機大臣傳諭明誼麟興車林敦多布廣鳳奎昌
明瑤李雲麟圖庫爾阿隆阿布爾和德曰塔爾巴哈
台失陷亟應派兵進剿現在呼圖克圖棍噶札拉叅
阿隆阿前赴科布多請兵援剿以圖恢復該呼圖克
圖志切同仇殊堪嘉尙卽著廣鳳奎昌明瑤趕緊調
撥兵弁交李雲麟督同棍噶札拉叅等剋日進剿毋

稍遷延所需糧食軍火等項著廣鳳等懷遵疊次諭旨迅籌撥給塔城難民現在何處廣鳳等務當妥爲布置毋令失所滋事圖庫爾本有應得之咎若不亟圖補救奮勉立功其罪更不可追卽著統兵前進毋許徒託空言李雲麟代辦伊犁將軍事務又任參贊尤當督率圖庫爾等迅速進兵將塔城相機恢復方爲不負委任前諭明誼等調撥蒙兵交麟興統帶規

復伊落各城現在是否調撥殊深慮念明誼車林敦
多布務當迅籌挑選不許任意遲延麟興於蒙兵訓
練成軍後剋日統率赴李雲麟軍營會商辦理阿隆
阿布爾和德均著隨同李雲麟圖庫爾進剿不准遷
延觀望致誤事機

二十五日癸未戶部奏言臣部前後奏撥新疆經

費軍餉二百一十一萬兩內專撥伊犁軍餉五

十六萬兩各省多未報解總由各該督撫以新
疆無關緊要是以報解寥寥近日塔城失守皆
因餉絀兵單所致現在大兵進剿需餉緊迫儻
各該省仍前玩誤危疆何以能支請

旨飭下直隸四川總督山東山西河南各巡撫迅卽籌
撥不淮推延再庫克吉泰督辦新疆北路軍務
需餉尤急擬撥山西地丁銀六萬兩河南地丁

銀二萬兩山東地丁銀二萬兩請

飭各該撫迅速解往以濟要需奏入

上命軍機大臣傳諭劉長佑崇實駱秉章閻敬銘趙長齡李鶴年曰新疆軍務緊要經戶部先後奏撥新疆經費軍餉二百一十一萬兩專撥伊犁軍餉五十六萬兩疊經降旨嚴催各該督撫仍未能源源接濟現在伊犁塔爾巴哈台等城均因餉需不繼相率淪陷已

令李雲麟圖庫爾等收集潰散重整軍旅力圖恢復
並特派西安將軍庫克吉泰帶領旗綠各營相機進
剿需餉甚鉅儻各該省仍前玩誤必至新疆全局淪
胥莫能收拾著劉長佑崇實駱秉章閻敬銘趙長齡
李鶴年各將未解新疆伊犁餉銀迅卽籌款撥解除
山西餉銀自行解交綏遠城轉解烏里雅蘇台外其
直隸山東河南應解銀兩卽著解交山西由山西巡

撫遞解烏城聽候撥用至四川應解銀兩並著按月
解交陝甘總督酌量分撥均不准藉詞推延自干咎
戾庫克吉泰督辦新疆北路軍務餉需尤應急爲籌
備著照戶部所議酌撥山西地丁銀六萬兩河南地
丁銀二萬兩山東地丁銀二萬兩卽著趙長齡閻敬
銘李鶴年如數籌撥遞解烏城聽候庫克吉泰提用
毋稍延宕

三十一
二十七日本酉乙醇郡王奏言近年以來各省軍務

漸就肅清而鴟張日甚爲我邊疆之患者則以
西北兩路爲最查回匪攻城戕官本極强悍又
因兵單餉絀各路援兵鞭長莫及釀至今日已
成燎原之勢茲復攻陷伊犁大城兼扼要隘該
處官兵疲於戰陣諒難得力西安將軍庫克吉

泰奉

旨督辦北路軍務甯夏將軍穆圖善亦出關會剿臣猶
有過慮者庫克吉泰行抵何處尙在未知且查
京兵直隸兵爲數僅二三千名以之分防各城
兼令剿賊實屬單薄無濟於事且恐有損軍威
剿辦更形費手臣竊謂兵少不敷防剿莫若將
臣營現練馬步京兵迅發八千名直隸兵一二
千名再調吉林黑龍江精壯馬隊三千名取道

張家口嚴密設法節節前進如庫克吉泰穆圖
善業由甘省出關即可撥隊會剿如尙需時日
亦可暫駐科布多等處相機進取至西北各蒙
古王公等亦應一體飭令撥兵助剿並各設嚴
防以固邊圉如此辦理雖用餉較多而歲事可
速否則誠恐軍情遲速靡定儻稍延時日再有
警信議防議剿更難裕如至

臣渥承

特達之知俾管營務前蒙

文宗顯皇帝

溫諭訓示策勉將來現值邊疆多事非復內地軍務可

比唇亡齒寒其來有漸敬溯

列聖開創輿地之難仰瞻

九重宵旰憂勤之苦五內焦灼寢饋難安惟披瀝懇誠

籲懇

天恩俯准 臣督軍出口辦理防勦事宜俾 臣稍遂報效
之心激勵諸軍迅求蕝事如蒙

允准並請

簡派重臣襄同辦理以昭慎重俟

命下之日卽選現經教練京兵剋期先發酌留帶隊得
力大員候東省馬隊到時統領繼進其直隸官
兵應請

飭下督臣劉長佑派委官弁管帶兼程出口庶防勦可
敷調遣而聲勢亦較聯絡奏入得

旨覽奏具見惻忱可嘉之至惟東豫捻患尙未肅清北
路防務未可稍懈若照該郡王所請迅發京兵八千
名京畿重地未免空虛所有神機營現練馬步各兵
著暫緩調撥其直隸吉林黑龍江等處如有可調之
兵著神機營王大臣籌議具奏候旨調派至西北各

蒙古王公等應如何各令設防固守並派兵助剿之處均由該王大臣等妥籌辦理